

WANTOK

NIUSPEPA BILONG YUMI OL PAPUA NIUGINI STRET! 27 YIA NAU

32 pes

Namba 1,423

Wik i stat long Fonde Oktoba 4, 2001

70t

LUKIM OL RIPOT
LONG WANTOK
NIUSPEPA TUDE

Mausman
bilong
Pop
i dai



- pes 2

Planti komplek
long Tok Pisin
bilong AIDS
kempen

- pes 3



Ol ripot na
piksa bilong
2001 skul soka
tonamen

- pes 27-28

Bulolo gavman
opis i paia

- pes 9

Sauten Hailans
pipel laik save
long ripot
bilong mani

- pes 7

Pes 30
Winim
prais,
painim
hal resis

Stori bilong Osama bin Laden ... Birua man bilong Amerika

OSAMA bin Laden em dispela man Amerika i laikim tru long holimpasim em bikos ol i tok em tasol i bin plenim na bagarapim New York siti long Septemba 11, 2001.

Tasol bin Laden i no isi man we ol inap long go stret na kisim em. Man ya em bilong lotu ol i kolim Islam na papa bilong em wangepela bilienia bilong ples Saudi.

Ol spesel plis fos long Amerika i tok em i stap insait long pes tenpela man em plis i laik holimpasim ol long 1999.

Stet Dipatmen long U.S i bin putim mani long 5 milien Ameriken dola sapos wangepela i holimpasim em na givim em i go long han bilong U.S.

Ol man bilong mekim wok painimaut i tok olsem bin Laden em i gat ol strongpela sapot grup tru na ol i save makim ol lain Amerika long kilim ol i dai.

Long toktok bilong bin Laden tasol ol sapota bilong em i laik sip tasol Amerika long kantri Yemen na tu ol i laik bomim embesi bilong

Amerika long Tanzania na Kenya.

Belhat bilong bin Laden wantaim Amerika i stat taim Amerika i bin pait wantaim ami bilong Iraq we i lukim Amerika i win.

Bin Laden i bin tokim CNN televisen stesen olsem ami bilong U.S i rong long stap long Saudi Arabia bikos em i kolim Saudi holi graun.

Long 1991 em i lusim ples bilong em na kisim mani mak long 250 milien dola na i wok long bungim sapota long bagarapim Amerika.

Sapot bilong em i stat long 1979 taim em i bin sapotim Afghanistan long pait egensim Russia.

Em i yusim nem bilong famili bilong em na planti mani bilong em long baim moa gan na trenim moa soldia long pait wantaim Afghan na Russia i lusim dispela pait.

Bin Laden i gat moa sapot long olgeta hap long wol na ol sapotas bilong em i save gat strongpela bilip long lotu bilong ol Islam na ol i save pait strong long bagarapim Amerika.


Em yet i bin tok em wantaim ol sapota bilong em i bin kilim i dai 18 sevisman o volentia husat i bilong Amerika na ol i bin laik go long helpim ol pipel long Somalia long 1993. Ol i bin kilim ol Amerika ya na pulim bodi bilong ol long strt nabaut.

Long 1997 em yet i bin tokaut olsem em na ol sapota bilong em i bin kilim ol man ya.

Bipo Presiden bilong Amerika Bill Clinton i bin givim wangepela tok orait long ami bilong U.S i go bomim ol hap ples ol i ting bin Laden i stap tasol ol i bin abrus long kilim em i dai.

Wangepela man husat i laik bomim Los Angeles Intanesenel ples balus long Amerika long Niu Yia de long 2000 na plis i bin stapim em i tokim plis long Amerika olsem bin Laden i save givim trening long we bilong holim ol gan na yusim ol bom tu.

Em i tokaut olsem bin Laden i gat planti sapot tru na bikpela tingting bilong em i save belhat tru long kantri Amerika.



• Osama bin Laden.

Amerika i laikim Afghanistan long givim em i go long han bilong ol bikos ol i laik olsem em i mas kisim mekim save long rong em i bin mekim tasol Afghan i tok ol i no ting olsem bin Laden i mekim wangepela rong.

Nogat lo i stapim pilai bilong ol meri long hotel

NOGAT lo i tambuim sampela kain so ol meri i save mekim insait long ol klap haus o disko ples hia long Papua Niugini, Sief Sensa Tibe Diweyuia i tok.

Bos bilong Nesenel Sensasip opis Mista Diweyuia i tok ol i wari long sampela kain so we i wok long kamap insait long sampela nait klap haus tasol ol i nogat pawa long stapim ol dispela kain pilai ol so.

Ol dispela so we yumi lukim ol meri i save werim pens tasol na danis o sampela kain bilas we inap pulim tingting bilong ol man o ol yangpela meri i save soim bodi bilong ol na bai ol jas i skelim husat meri i gat naispela bodi bai winim prais na sampela moa pilai we bikpela hap bodi bilong ol meri i save stap ples kia.

Mipela i lukim sampela kain pilai olsem na mipela i tingting planti. Mipela i bin salim pas i go long ol bos bilong sampela hotel pinis tasol em samting bilong ol yet long stretim, Mista Diweyuia i tok.

Em i tok sapos ol komyuniti grup i autim bel hevi long dispela kain pilai, orait ol i ken toktok na glasim dispela. Tasol nau yet ol hotel o nait klap i fri long go het wantaim dispela kain pilai bilong ol.

Em i tok dispela kain



Marasin bilong Kalina Helt Senta • Helt Minista Assik Tommy Tomscoll i opim bokis bilong marasin we em i givim i go long dispela ol Komkui lida bilong ples Tiling long Westen Hailans. Marasin bai helpim moa long 4,000 pipel long dispela hap. Foto: IVAN BAYAGAU.

pilai i kamap bilong kirapim tingting na interes bilong ol kastoma long kam moa yet long dispela klap, tasol ol i mas mekim long mak we i bihainim lo bilong nait klap na i noken kirapim o surukim tingting bilong ol kastoma i go krangki.

Mista Diweyuia i tok i bin gat sampela komplek ol i kamap pinis tasol ol i no kamap stret long pepa. Tasol em i askim opis bilong em long lukluk insait long ol dispela wari na komplek.

Sampela kampani i save singautim mipela i

go na lukim wanem samting ol i laik kamapim pastaim long ol i kisim i go aut long pablik. Tasol dispela i kamap long laik bilong ol tasol na i no wantaim lo.

Wantok i bin traim long toktok wantaim

Lizard Lounge, wangepela nait klap we i save kamapim sampela kain so bilong ol meri tasol nogat bekim i kam bek.

Wangepela wokmeri i no laik toktok wantaim Wantok long dispela na em i askim Wantok long go na lukim.

Plis Ripot

Popondetta: Plis sutim wanpela man na narapela i stap long kalabus bihain long tupela i stilim wanpela ka na kamapim raskal pasin. Faivpela tasol narapela tripela i ronawe. Wanpela i stap long haus sik. Narapela man husat kilim man na merkim pasin nogut long ol meri em ol pipel yet i kisim na givim long plis long Sairope viles.

NCD: Plis i holim pasim pinis faivpela bilong ol 63 kalabus man husat ronawe long Bomana kalabus. Ol wada na plisman i wok hat yet long painim aut ol narapela husat ronawe. Plis i askim ol manmerihusat lukim o holim ol raskal i stap long ripot na givim bek ol dispela kalabus lain.

Eking Plis Komisina Joseph Kupo i tok ol plisman mas noken sutim nating ol raskal husat nogat gan long pait bek. Em i mekim tok bihain long ol wantok bilong wanpela man plis sutim tok man ya i no raskal. Plis sutim em nating.

Ol ami long Murray Bareks i kros nogut tru na askim dipatmen long tokaut long wanem samting tru i bin kamap wantaim mani bilong ol. Ripot kam aut long epa i soim olsem mani paul na husat man mekim paul pasin mas kam tok klia.

Plismanmeri long NCD i bin tingim ol plisman husat dai long wok. Faivepla plisman i bin dai, triepela long Kimbe na tupela long Kainantu.

Mt Hagen: Plis husat paitim manmeri nating bai sanap long kot. Dispela toktok i kamap bihain long ol plisman long Mt Hagen i bin paitim wanpela man na klostu kilim em.

Mendi: Plis long lalibu i lukluk i stap na ol manmeri bilong Makai na Ekai i givim K70,000 kompensesen. Dispela i kamap bihain long ol pipel i sutim tok i go i kam olsem wanpela haus lain i yusim posin long kilim ol man bilong narapela haus lain.

Bulolo: Plis long Bulolo i mekim wok painim aut i go insait long sekim husat kukim opis. Opis bilong distrik i paia las wik na plis i mekim wok painimaut yet.

Kokopo: Olgeta plismeri insai long kantri bai bung long Kokopo long toktok long komyuniti polising na narapela hevi we save kamap long wok. Moa long 100 plikismeri bai kamap long dispela bung.

Ambaseda bilong Vatikan long PNG na Solomon Ailan i dai


VERONICA HATUTASI i raitim

PLANTI lain i kirap nogut long dispela wik long dai bilong Nunsio Asbisop Hans Schwemmer, mausman bilong Pop na ambaseda bilong Vatikan long PNG na Solomon Ailan.

Leit Asbisop i bin wanpela man i sanap strong long lukautim sosel jastis na pis. Putim i go long Tok Pisin, em i bin sapotim strong pasin bilong mekim gut long wanpela arapela olsem yumi wankain pipel, i no bagarapim wanpela arapela na sindaun gut insait long komyuniti, kantri na wol.

Jenerel Seketeri bilong Katolik Bisops Konfrens (CBC) Lawrence Stephens i tok "leit Asbisop i wanpela gutpela man we em i save amamas long wok wantaim. Em i man bilong luksave long ol kain hevi na sapos samting i kamap, em i isi long toktok wantaim em long dispela."

"Mi luksave long bikpela intres bilong leit Asbisop long ol



• (Lephan) Leit Bisop Hans Schwemmer wantaim Asbisop Brian Barnes long memoriol sevis lotu long tingim ol lain dai long Amerika.

sosel jastis long PNG na Solomon Ailan.

"Mi bin bungim em bihain tasol long em i kisim wok olsem mausman bilong Pop long PNG na Solomon Ailan long 1997. Long dispela taim, em bin kam bek long Bogenvil wantaim

nogat gutpela sevis na ol pipel i stap long hevi.

"Em i wanpela diplomat we mi save lukim em i stap long ol ragbi lig fanresing bilong ol PNG Kumul.

"Planti lain i save long en, em i gat ol netwok poroman husat i kirap nogut na sori stret long harim nius long dai bilong em," Mista Stephens i tok.

Em i tok leit Asbisop Schwemmer i bin pilim sik long nait bilong las Sarere na em i ringim Bruder John long Dove Travels husat i kisim em i go long Imejensi wod long Pot Mosbi Jenerel haus sik. Em i wok long trauf planti na sik i go nogut.

Mista Lawrence i bin go lukim em long Sande na dispela taim em i stap long Intensiv kea yunit. Bikos em i sik nogut tru, ol i hariap putim em long balus i go long Calvary Haus sik long Kens we em bin dai long bikmoring Mande.

Mista Stephens i tok pos motem o wok painimaut long sik we i kamapim dai em ol i wokim long Australia yet.

Gutpela wok long Bogenvil bihain long Arawa pis saining

VERONICA HATUTASI i raitim

OL TOKTOK long ol samting i sut long Bogenvil i wok long go gut bihainim Ogas 30 Pis Agrimen long Arawa.

Man i lukautim Pis Proses Komiti wantaim Interim Provisnel gavman John Siau i bin tokim Wantok long dispela wik olsem gutpela toktok na wok i kamap namel long ol Bogenvil

lida na tu wantaim Nesenel Gavman lain.

Lusim ol samting bilong pait em i bikpela samting na ol Bogenvil Revoluseneri Ami komanda na lida na tu ol resisten lain i wok long bung na toktok long dispela samting. Long neks wik Tunde na Trinde, tupela grup bai bung long glasim na skelim ol samting na wokim kombain agrimen bilong go hetim plen long lusim ol gan

na ol arapela samting bilong pait. Mista Siau i tok long edministresen na ligel sait bilong nupela Bogenvil gavman, ol wok i go gut tasol.

Em i tok tupela wik i go pinis, ol loya bilong Bogenvil na Nesenel Gavman i bin bung long lukluk long draf lo bilong nupela gavman we ol i mas kirapim bipo long ileksen taim long Jun, neks yia.

Mista Siau i tok em i bilip olsem ol palamen miniba bai sapotim dispela bil long kamapim senis long mama lo i sut long kirapim nupela Bogenvil gavman.

Em i tok ol wok bilong painim gutpela sindaun i kamap long hatwok na sapot bilong olgeta grup na bai dispela rot i go het inap olgeta samting i kamap gutpela gen.

Bogenvil Afeas Minista Moi Avei taim em i amamas long gutpela wok go het i kamap bihainim saining i tok ministri bilong em i wok long toktok wantaim Treseri na ol ausait dona ejensi long mani ol i nidim long kirapim nupela Bogenvil Gavman. Long narapela nius, Presiden bilong Bogenvil Pipel's Kongres Joseph Kabui i tok Bogenvil i gat planti poroman tumas long Nesenel Palamen na em i no inap sapotim wanpela pati.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

General Manager and Group Editor in Chief: Anna Solomon.
Acting Advertising Manager:

Editor of Wantok: Yakam Kelo.

Papers distributed by air throughout PNG. Available by air mail subscription within Papua New Guinea and overseas.
Email address: word@global.net.pg

Advertising deadlines: Display bookings: Tuesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Saveman tok turis em bikpela bisnis

TURIS Indastri em wanpela bikpela bisnis tru long Wol, olsem na yumi long Papua Niugini mas train na bringim dispela bisnis i kam daun long ol planti lain bilong yumi long ples.

Dispela em toktok i kam long Nelson Paulias, husat em olpela Sekreteri bilong kalsa na Turis na nau em lokol bisnisman long Rabaul.

Mista Paulias i tok, em wanbel wantaim eking Provisnel Edministresen bilong Madang olsem, turis bisnis em wanpela

bikpela bisnis tru tru, we bai stap olgeta taim. Olsem na yumi mas train na kirapim na bringim i go daun long levul bilong planti ol pipel bilong yumi long ples.

Em i tok, turis bisnis em bikpela tru long wol, na em lukim olsem Madang yet i gat olgeta samting we bai pulim moa turis long olgeta yia. Olsem na em laik lukim olsem olgeta pipel bilong ples mas i mas gat rot bilong pulim na i no ol lain holim ol Hotel long taun tasol.

Mista Paulias i mekim dispela toktok, bihain tasol long Madang Provisnel Gavman i givim wanpela kontrak bilong raitim faiv yia developmen plen bilong Turis Indastri long Madang long Fraide.

Eking Provisnel Edministresen Galun Kassas i tok olsem, em amamas na laik lukim olsem olgeta pipel bilong Madang mas kamap long dispela indastri, we Provisnel Gavman i gat luksave long en na putim insait long faiv yia developmen plen

bilong provins.

Eking Gavman Pengan Nengo tok, gavman bilong em i luksave olsem, dispela em wanpela bikpela indastri olsem na gavman laik strongim dispela na kamap wantaim ol sampela ol gutpela rot we ol pipel mas kisim helpim long en.

Em tok saining ya em bikpela tru bikos ol ripots developmen plen ya bai go insait long faiv yia plen bilong Turis Indastri.

Mista Paulias i gat 8-pela wik tasol long pinisim dispela ripot.

TORO

LONG TABUBIL TOROUKIM OLSEM OLOK TEDI I WOK LONG PEIM OL LAND-OWNERS KOMPENSE-SION MONI...

SANS FRI MONI YAH!

NOTIS OK TED PEIM KOMPEN

PABLIK AFEA

TORO INO LANDOWNER, TASOL EM TINGTING LONG GO KISIM MONI NATING...

EM DRESAP OLSEM OL ASPLES MAN NA TEK-OFF I GO LONG KISIM MONI...

EM NAU!! HAU BAI OLI SAVE OLIBI TING MI BILONG WANGBIN!

LONG HAP, BIKMAN I ASKIM EM...

NET MI LU-KIM LIST PASTAIM... UAN... SORI NOCAT NEU HA... SEKURITI, RAI-SIM MAN YA EM KON YAH!

LISTA

NEU PLUS..

TORO OF WANGBIN!!

OL SEKURITY KIRAP NA RONIM TORO... TORO RAN IGO LONG MAINSAIT NA OL BIKPELA TRAK INO ISI LONG EM...

KATAMONO

BAGA KISIM TAIM STRET.

Lida tokim ol yut long wok hat

OLPELA Karkar Presiden bipo na biknem film ekta Turuk Wape i tok strong long olgeta yut bilong Karkar Ailan long lusim ol bikhet pasin na kamap gutpela manmeri na wok hat.

Em i tok wok het na tuhat em bikipela samt-ing long laip tude bikos sapos yu wok hat bai lukim bilong em long tumoro. Em bai min, yu bai gat gutpela haus, gaden, mani na sin-

daun bilong yu long ples bai senis na kamap gutpela.

Sapos smok mari-wana, stii, mekim raskol pasin nabaut bai yu no inap helpim yu yet. Em yu bagarapim yu yet na olgeta komyniti bai i no inap laikim yu.

Mista Wape mekim dispela toktok long Mande bihain tasol long em kisim 26 Independens Silva Jubili Medol bilong em long

ples But.

Em tokim ol yut olsem, yupela mas bihainim gutpela pasin we ol dispela ol 25 man na wanpela meri husat bin mekim bipo i kam inap nau na gavman luksave long hatwok bilong ol na givim ol medol.

Yupela tu inap kisim medol. Olsem na yupela mas wok hat na bihain wok hat bilong yupela bai baim kaikai, em tok.

Pablik egensim AIDS kempein i yusim tok nogut

PLANTI memba bilong pablik i no amamas long strongpela toktok i no gutpela em Nesenel AIDS Kaunsil i(NAC) yusim insait long kempein bilong em long daunim sik nogut ya long kantri.

Plantii famili i no amamas long etvetismen i kamap long Tok Pisin long EM TV na ol liklik kempein infomesen buklet na posta we long em ol i yusim dispela wod i stat wantaim K...P.

Plantii komplem i kamap long ol famili na moa yet long ol mama husat i tok dispela wod i stat long K we AIDS kempein i wokim long Tok Pisin i no gutpela long ol pikinini i harim.

taim yu tanim dispela wok i go long Tok Inglis, bai yu kisim dispela wod i stat wantaim F na i no gutpela long yusim long ai bilong ol pikinini na ol mama.

Plantii i tok i moabeta long AIDS Kaunsil i yusim narapela wod na i no dispela K wod.

"I gutpela long NAC i ken yusim narapela wod. Sapos ol liklik pikinini i


askim long mining bilong K wod, bai mipela i tokim ol wanem? taim yu tanim dispela long Tok Inglis, yu kisim dispela F wod," wanpela mama i tok.

Jenerel seketeri bilong Katolik Bisops Konprens Lawrence Stephens i tok tru em i orait long wonim pablik long dispela sik nogut, moa yet long bamim long het bilong plantii, em i no gutpela long yusim dispela K wod we plantii Tok Pisin spika i tok em i tok nogut.

"Mi kirap nogut long dispela, watpo ol i no toktok long ol famili long kisim tingting bilong ol. Watpo na kempein i no laik yusim narapela wod na i no dispela tok nogut we i wok long kamap nau long Tok Pisin kempein? Long PNG, ol i no inap yusim dispela K wod long ai bilong ol pikinini, ol mama na ol meri bikos em i no gutpela toktok," Mista Stephens i tok.

Em i tok plantii mama i tok dispela Tok Pisin etvetismen i no gutpela na ol bai sutim tok long gavman long yusim dispela tok nogut wod long pablik.

Toksave bilong AIDS kamapim kros



• Wanpela sain bilong NAC long intenesenel eapot long Mosbi we dairekta bilong CAA Miria Ume na siaman bilong NCDC Jamie Maxtone-Graham i bin putim i go antap. Wankain sain bai stap long olgeta eapot insait long kantri: Foto: Ivan Bayagau.

PEKU PILIMBO i raitim

SAMPELA pipel i kros na sam-pela tok em orait long ol tok-tok Dairekta bilong Nesenel AIDS Kausnel (NAC) Dokta

Clement Malau i mekim long redio na televisen.

Sampela manmeri i tok olsem wanem toktok i kamap long ol toksave i nogut bikos plantii liklik pikinini i save lukim na harim redio. Long wankain tu ol Kristen i kisim tingting olsem em i tok nogut.

Long EMTV na ol redio, Dokta Malau i yusim dispela toktok 'koap' na ol pipel i kros liklik olsem dispela i no gutpela.

Dokta Malau i tok long taim ol opim ol dispela kempen olsem: "Mi i sori tru olsem plantii pipel i no inap wanbel long toktok mi laik mekim.

"Tasol sapos yumi no tokaut, sik HIV/AIDS inap kamap bikipela tru bikos ol manmeri i no inap klia long birua," em i tok.

Dokta Malau i tok taim em yusim tok nogut, ai bilong ol manmeri bai op na ol bai lukluk gut na laik harim wanem kain toktok em i mekim.

Plantii taim ol pipel i no save bisi long ol toksave olsem kamap long redio na televisen. Nesenel Dipatmen bilong Helt i

kamapim NAC long toksave na lukautim ol manmeri wantaim sik AIDS pinis.

NAC bai go pas long karim aut aweanes kempen long pipel i ken luksave gut wanem kain bikipela birua i stap namel long yumi pinis.

Olgeta pipel i no kros long wanem toktok i kamap. Ol i tok maski yu pikinini, Kristen o wanem kain manmeri, sik AIDS i birua leng olgeta.

Sapos ol manmeri i no save long birua, plantii moa inap dai nating na dispela taim bai yumi sutim toktok long husat.

Ol pikinini i mas save long birua taim ol liklik yet na ol i kamap bikipela wantaim tingting olsem i gat birua i stap.

Plantii yangpela bilong tude i no save gut na mekim nabaut. Dispela inap kamapim dai bilong plantii.

Maski pikinini i yangpela tru, em bai kamap bikipela yet na em i mas kamap wantaim tingting na save long birua.

AIDS bai kilim plantii manmeri

OLGETA manmeri mas wok bung wantaim long paatim sik HIV/AIDS long kantri.

Dispela toksave i kam long Nesenel AIDS Kaunsel (NAC) long taim ol i putim aut kempen bilong ol las wik long paat egensim sik HIV/AIDS we i kamap bikipela wanwan de insait long kantri.

NAC i wanpela han bilong Helt Ministri i statim pinis kempen bilong traim daunim AIDS insait long kantri.

Namba bilong ol manmeri wantaim HIV/AIDS insait long kantri i sanap

olsem 3,901. Dispela em ol manmeri husat go sekim blut pinis long haus sik tasol namba tru bilong manmeri wantaim sik inap sanap klostu long 13,000 i go 15,000 olgeta.

Seketeri bilong Helt Dokta Puka Temu i tok wanwan mun moa long 100 manmeri i save kisim HIV na bihain long 10-pela yia, olgeta haus sik long kantri inap pulap long sik manmeri. Sapos dispela i kamap gavman bai lusim K1.2 milien long lukautim ol sik AIDS manmeri tasol.

Long karim aut pablik kempen, i gat wanwan provinsel AIDS komiti i

stap pinis. I no longtaim i go pinis AusAID i bin givim 20-pela ka long wanwan komiti insait long provins i ken mekim wok.

Long wankain taim ol i givim K10 milien bilong mekim pablik kempen na toksave long ol pipel long wanem kain hevi inap kamap sapos ol i no harim tok na mekim nabaut raun.

Kempen bilong toksave long ol pipel i kam long ol redio, niuspepa, televisen, mak long bas, sain bod, liklik buk na piksa na tok-save nating long maus.

Long mun Jun dispela yia 2575 manmeri long

Nesenel Kapitel Distrik i gat sik HIV na 994 bai klostu dai.

Long ol provins NCD i kam pas, WHP i kam namab tu, bihain Goroka na Lae, Enga na bihain ol narapela provins i kam.

Ol manmeri wantaim krismas namel long 15 - 30 i winim ol narapela krismas grup na i gat AIDS.

Manus provins i kam las wantaim liklik namba bilong manmeri wantaim sik HIV/AIDS.

Bikipela bilong sik HIV/AIDS i kamap taim manmeri i siip wantaim narapela i gat binatang bilong AIDS.

Pawa bilong makim ol Gutpela Lida o Lida Nogut i stap long vot bilong yumi



ELECTION 2002

POLIS i save pinis long nem bilong ol stilman husat i bin stilim 4000 vota enrolmen fom bilong Ilesken 2002 long Madang namel long dispela yia tasol.

"Ol polis bilong Madang i wok hat tru long dispela bikipela hevi na ol i kisim pinis nem bilong ol dispela lain nogut," bos bilong ileksen Mista Reuben Kaiulo i tok tudei.

"Olsem na mi askim ektung Polis Komisina long tokim ol CID bilong em long hariap na arestim ol dispela stilman na kotim ol.

"Mi mas tok bikipela tenkyu tru i go long ol polis na tenkyu tu i go long ol pipel bilong Madang husat i bin ripotim

ol dispela man nogut."

Mista Kaiulo em i Iektorol Komisina na em i mekim dispela bikipela tokaut long Pot Mosbi hetkwota bilong Iektorol Komisin.

Em i tok ol dispela stilman ino stap long wanpela ples tasol. Ol i ronawe i go long ol haphap nabaut bilong Papua Niugini tasol polis i save long pes bilong ol na ples hat bilong olsem na ol i no nap ronawe moa.

Mista Kaiulo i tokim ol polis long lainim gut ol dispela stilman wantaim bos bilong ol. "I noken isi long ol," em i tok. "Olgeta manmeri pikinini i mas save olsem yu bai kisim taim sapos yu laik

paulim o bagarapim ileksen."

Mista Kaiulo i tok gen olsem Iektorol Komisin i no nap yusim ol dispela 4000 vota enrolmen fom ol man nogut i bin stilim.

Em i tok ol ofisa bilong em bai sekim gut olgeta nem ken bipo ol i salim ol nupela enrolmen fom i go long Madang.

Ol stilman wantaim ol bos bilong ol i bin stilim 4000 vota enrolmen fom bilong Madang namel long dispela yia taim Iektorol Komisin i bin redim wok bilong vota enrolmen na salim ol fom i go long Madang.

Polis bilong Madang i helpim Iektorol

Komisin long kisim bek olgeta dispela 4000 enrolmen fom em ol stilman i bin paulim.

Mista Kaiulo i tok Iektorol Komisin bai salim ol nupela enrolmen fom i go long Madang taim polis i givim bek Iektorol Komisin ol dispela 4000 enrolmen fom nogut.

Em i tok ol polis bilong Madang i holim yet ol dispela enrolmen fom nogut long sajam na arestim ol stilman wantaim ol bos bilong ol husat i bin plenim wok bilong stilim ol dispela fom.

• PNG Iektorol Komisin i sponsorim dispela Ilesken Tok Save.

Ningo laikim bai gavana saspending ENP LLG

WALTER DARIUS i raitim

PRESIDEN bilong Toma Vunadidir Lokol Level Gavman Kaunsil Henry Ningo i tok i moabeta long saspending ol LLG long provins bikos long hevi we provins i bungim long mani i sot.

Em i tok sapos hevi long mani i orait em ol i ken kirapim bek gen ol wok.

Mista Ningo i tok i nogat poin long giaman olsem olgeta samting i stap orait na ol LLG i wok gut bikos i nogat.

Em i tok gavman bilong em i rausim pinis sampela wokman olsem ol draiva, ol taipis na kuskus. Em i tok long tripela krismas, Toma-Vunadidir em bin modol LLG.

"Wok i bin kirap gut long 1996 taim gavman i kirapim nupela rifom sistem na i gat mani long karimaut ol wok long dispela.

"Tude olgeta wok em mipela i pasim bikos nogat mani long ol projek bikos Nesenel Gavman i no givim mani long mipela," Mista Ningo i tok.

Em i tok Gavana Leo Dion i nogat toktok moa tasol askim Nesenel gavman long saspending ol LLG long provins.

Tabu selmani i helpim long baim ol samting

WALTER DARIUS i raitim

OLTolai pipel long Is Nu Briten i wok long yusim Tabu em tumbuna kastom sel mani bilong ol long baim ol samting taim kantri, gavman na pipel i bungim hevi long (Kina na Toea) mani.

Long 1996, Is Nu Briten Provinsel Gavman i bin putim wanpela lo i tok orait long Provinsel na Lokol

Level Gavman insait long Is Nu Briten i yusim "Tabu" selmani long baim ol samting long em olsem Kina na Toea.

Nau taim provins i sot long mani, ol i laki liklik bikos tabu i helpim ol.

Long Is Nu Briten, hevi bilong mani i sot i go nogut bikos stat yet long 1995, Nesenel Gavman i no givim gren mani bilong Provinsel Gavman we i save tilim i go tu long

ol LLG.

Mekim na Gavana Leo Dion i sambai tasol long kisim Nesenel Gavman i go long kot.

Planti lida long Provinsel na LLG i bin redi o luksave long mani hevi inap kamap taim gavman i kamapim provinsel gavman senis long 1995.

Mista Dion i tok "olsem wanem bai ol pipel i save taim ol dispela bikman husat i

sapotim strong nupela gavman rifom i wokim ol gutpela gris toktok. Ol i tok bai ol LLG na wod presiden i kisim planti mani. Long dispela taim, bikpela promis i go long ol olsem mani bai go stret long han bilong ol na i no long Provinsel Gavman pastaim.

"Dispela em rot we dispela gavman rifom komiti i save karimaut ol aweanes long ol provins Olsem na plan- ti bilong ol i no bisi long painim ol arapela rot long kisim mani long em we i ken helpim sait bilong ol we i ken redim ol long taim kain hevi long mani i sot kantri i bungim i kamap long en.

Long dispela taim, Is Nu Briten Provinsel Gavman i bin smat liklik taim ol dispela samting i kamap bikos em i no trastim tumas Nesenel Gavman long dispela nupela senis em i laik kamapim long provinsel na LLG Gavman level.

Olsem na em bin go het na tok oraitm lo

bilong gavman bilong em i kisim Tabu na yusim long baim ol samting long stoa, maket, skul fi na ol arapela rot.

Planti Tolai pipel i save yusim selmani i bin amamas tru na ol i tok dispela samting i gutpela na i bihainim raitpela rot long en.

Tasol bihain long dispela, nogat gutpela sapot i kam na lo i tok oraitim yus bilong tabu i stap nating ol pepa long tok orait i stap nating long opis na pulim das wantaim ol arapela dokumen pepa i stap long Vunadidir opis.

Presiden bilong balatanamn LLG John Topeono i tok i no gutpela long Provinsel gavman i abrusim rot we iken helpim em na lukluk tumas long helpim mani i kam long Nesenel Gavman.

Em i tok taim Provinsel Gavman i wet long kisim mani long Nesenel Gavman i gat ol arapela rot olsem yusim tabu mani long helpim daunim mani i sot hevi.

Balatanaman LLG i yusim tabu long ol wok bilong em

PRESIDEN bilong Balatanaman Lokol Level Gavman John Topeono i mekim ol toktok i karim kaikai taim em i tokim ol woklain long yusim tabu selmani long ol wok insait long ol wok long LLG.

Em i odaim ol woklain long kolektim selmani olsem het takis long ol pipel, peim ol viles kot, kompensesen fi, skul fi, ka rejistrasen na tred stoa laisens.

Em bin tok ol bai yusim selmani ya long baim ol kaikai samting long ol stoa sapos ol pipel i tok orait long nupela polsi.

"Gavman i bin lukim olsem tabu em bikpela samting long

yusim long baim ol samting olsem tasol mani tru tru na olsem, em bin tok orait long lo bilong dispela samting long 1996.

Mipela i bin pilim olsem em i bikpela na gutpela samting long yusim tabu bikos ol pipel i no inap long kamap ris wantaim kina mani.

"I no gutpela long fosim ol pipel bilong yumi long baim ol het takis long kina mani taim ol i nogat, moa yet bihainim hevi long maunten praia we ol pipel bilong Is Nu Briten i lusim ol samting bilong ol.

"Tasol long wankain taim tu, mipela i tokim ol pipel olsem

mipela i mas ranim Provinsel Gavman na mipela i mas gat Kina na Toea long wokim dispela. na i no selmani.

"Mipela i kamapim wanpela sistem o rot we i larim ol pipel long long larim ol pipel i peim ol het takis, kot fai na kompensesen wantaim selmani. Bihain mipela i tanim dispela i go long Kina na Toea mani. Stat yet long 1996, dispela sistem i woku na LLG bilong mipela i no bungim wanpela hevi," Mista Topeono i tok.

I kam inap nau Balatanamn LLG i resim K20,000 long tanim selmani i go long Kina na Toea. Mista Topeono i bilip olsem i

gat inap tabu selmani long Is Nu Briten insait long Gesel Peninsula we ol i ken bungim na kirapim wanpela beng yet bilong dispela tabu mani long en.

Em i poinim aut olsem sapos LLG bilong em i kolektim K20,000 long tabu mani insait long tripela mun Provinsel gavman i ken bihainim wankain rot long kolektim mani bilong em.

Long dispela yia, Balatanamab LLG i bin kisim tasol K13,000 taim ol arapela bikpela LLG olsem Toma-Vunadidir, Bitapak na Sinivit long Pomio distrik i kisim bikpela mani mak.

Plening em gutpela long developmen

FRED RAKA i raitim

DIPATMEN bilong Nesenel Plening na Monitoring i bin holim wanpela plening wok-sop long Liamorif Risot long Kimbe, Wes Nu Briten.

As tingting long holim wok-sop em long skruim plen long kamapim gut-

pela plen long bihain. Ol divisinenal etvaisa, distrik kodineta, ol Lokol Level Gavman manesa na sampela opisa bilong provinsel edministresen husat i bin sindaun long dispela wok-sop i tok kos ya i gutpela tr bikos em bai helpim ol long wok bilong ol.

Wok-sop i bin lukluk long skil developmen na ekspiriens long kolektim

data, glasim na skelim na go hetim ol plen.

Wes Nu Briten i bin wanpela long ol faipela provins long go insait long dispela program. Ol arapela em long Sandaun, Isten Hailens, Nu Ailan na Enga.

Ekting Edministreta Paul Rame i bin tokim ol lain long wok-sop olsem plening em bikpela samting long kamapim

nesenel developmen. Na em bin tok moa olsem i gutpela long kamapim yunifom plening.

"As long ol rurel etpos bilong yumi i pas, ol han rot i bagarap, ol tisa long ol rurel eria i lusim ol wok em bikos long ol developmen plen bilong yumi pastaim i stap aninit long mani na i no long plening sait," Mista Rame i bin tok.



• Dispela em "Tabu" selmani bilong ol Tolai pipel nau i helpim Is Nu Briten provins taim em i bungim mani hevi. -File Piksa

Ol NGI lida glasim hevi bilong ol ples pipel i kam long taun

VERONICA HATUTASI i raitim

HEVI long ol man i lusim ples na kam long taun i bikpela samting long PNG.

Insait long wanpela bung bilong ol Niugini Ailans rijen lida long dispela yia, ol bin glasim na skelim dispela bikos hevi long rijen i wok long go antap. na sampela ol samting we ol lida i kamap wantaim long traun daunim dispela hevi em long:

• Strongim gutpela wok long lukautim ol

samting i sut long dispela eria taim ol lida i lukluk long ebenaisesen o pasin ol manmeri i lusim ples na go long taun. Wanpela gutpela rot em long strongim infomol sekta na rurel developmen;

• Karimaut publik edukesen na aweanes insait long ol komuniti;

• Kodinetim gut ol plen long graun na ol developmen isu long abrusim ol hevi inap kamap long yusim graun long futja;

• Stretim gut pasin bilong yusim papagraun long yusim long eben

developmen; • Stretim gut ol samting wantaim ol papagraun bipo kisim graun long kamapim developmen long taun;

• Stretim ebenaisesen hevi wantaim publik sekta na ol arapela rifom long rausim olgeta samting i pasim rot i stap insait long gavman; na

• Noken kamapim ol nupela lo long ebenaisesen. Glasim na skelim gut ol samting na bai painim gutpela rot long karimaut ol wok i sut long dispela.



Nogat sevis stapim ol gavman opisa long wok long bus ples

FELIX RAMRAM i raitim

PLANTI gavman opisa i save wok insait long ol bikbus long Wes Sepik i save ronawe hariap, bikos planti sevis i no save go long hap ol i save wok.

Hetmasta bilong Guriaso Komyuniti Skul insait long Ananeb sab distrik long Vanimo Grin, Andrew Noinbi i tokaut olsem ol ples i memba yet long lukim o kism ol gavman sevis olsem ol taun i save kism sapos gavman i laik lukim ol gavman opisa insait long ol ples i mekim wok bilong ol gut.

"Mipela i nogat sol, nogat sop bilong wasim siot, nogat stua, nogat suga na ti na balus i kos tumas. Guriaso na ol narapela ples olsem i nogat pawa na lait,

olsem na ol gavman opisa na ol wanwok tisa bilong mi i save ronawe hariap. Mi stap tupela yia long Guriaso na ol wantaim famili na ol pipel tu i kism bikpela taim nogat long i nogat ol gavman sevis long hia. Taim ol dispela gavman sevis i no stap na ol gavman o ples i ronawe, dispela i no maus bilong olpela ol gavman opisa", Andrew Moabi ol mekim dispela toktok taim memba bilong Vanim Grin Micah Wes i bin go long Guriaso na stap wantaim pipel long amamasim 26 Independens bilong Papua Niugini.

Long dispela taim wanpela Aitape komyuniti lida, i tokim Wantok olsem Nesenel Gavman na Sandaun Provinsel Gavman i mas skelim ol tingting na kamapim sampela kain rot bilong helpim ol gavman opisa husat i save wok na ol bikbus

ples. Long peim "balus kos long taim ol gavman i salim kago bilong ol long balus, bikpela tru long go long ol bikbus ples na ol i save stap wok long en.

"Sapos dispela helpim i stap bai i givim bikpela helpim tru long ol opisa bilong mipela husat i save wok insait long ol bikbus ples.

"Mi sapotim tingting tu olsem gavman i mas helpim hap mani long taim balus bilong ol liklik bisnis manmeri bilong bikbus ples. As bilong en em olsem ol dispela lain i save baim takis i go long gavman na bikpela as tingting em ol i stap long ples we i hat tru long ol rot bilong wokim bisnis na sapos ol i gat bisnis, turangu ol i nogat rot long kism bisnis bilong ol i go daun long Vanimo o Aitape na salim," Bikman ya i tok.

Bikpela krused bai kamap long Wewak

EDWARD MEATA i raitim

BIKPELA krused bai kamap long Prins Charles oval long Wewak long naks wik Oktoba 10 i go long Oktoba 11.

Dispela krused em ol i kolim Evangelism by Fire na pasto Paul Huaembukie bilong Asembli ov God long Wewak i tok dispela bai wanpela bikpela krused na planti manmeri tru bai i kam long olgeta hap provins.

Biknem Evenjelis, Reinhard Bonnke bai kamap na autim tok bilong God long dispela taim.

Pasto Huaembukie i tok ol arapela evejelis i bin kam long PNG long bipo em ol i bin mekim gut plen na stretim rot pastaim long ol i kam. Tasol long evenjelis Reinhard Bonnke i nogat kain wok olsem. Em wantaim grup bilong em i bin prea long God i soim wanpela kantri long Not na long dispela God i soim ol long kam long Wewak insait long Papua Niugini. Olsem na em i askim ol manmeri bilong Wewak long amamas na

welkam long evenjelis Reinhard Bonnke bikos God i laik soim ol bikpela sain na ol gutpela samting long ol manmeri tude.

Pasto Joseph Walters bilong Mosbi bai go wantaim Reinhard Bonnke long Wewak.

Pasto Huaembukie i tok long mekim dispela krused i kamap gut, pasin bilong helpim na givim han wantaim i save kamapim gutpela samting. Olsem na komiti i askim ol manmeri bilong ol Pentikostel, Evenjelikel na ol bikpela lain sios long Wewak long helpim long kamapim dispela krused i kamap na ron gut. Ol Sepik husat i stap ausait tu long provins i ken helpim wantaim mani na wanem kain helpim ol i ken givim.

Ol lain husat i laik givim helpim wantaim mani i ken salim mani long dispela akaun. Ministers Fraternal Westpac Wewak Account No: 1984483. Ring long dispela namba long kism moa toksave. Telepon namba em: 856 1072 o go long AOG Taun Opis na lukim ol.



Tromoi lek • Ol meri long ples Koragu long Gawi eria i bilas na redi long samsam.

Ol mama Wes Kos askim long K5,000 bilong ol

OL mama memba bilong Vanimo Wes Kos i mekim wanem samting i kamap long K5,000 Distrik baset (JDSP & PPOL i bin oraitim long ol mama i kism long 1999, tasol inap nau dispela mani i no go yet long han bilong ol.

Dispela askim i bin kamap long taim ol memba bilong Fichin Katolik meri i bin holim wanpela bung kaikai long liklik ples Fichin. Taim Memba Micah Wes i bin givim ol K1,500 long 1999. Mani ya i bilong ol meri long ples Fichin long wokim wanpela Risos Senta bilong ol meri.

Presiden bilong ol Fichin Katolik meri grup, Mis Mary-Bauai i tokaut olsem. Dispela i namoa tu taim grup bilong ol meri long Pichin i kism helpim

mani i kam long ol Nesenel palamen Memba bilong Wes Sepik. Olgeta wantaim i no abrusim mak bilong K2,000 maski bikpela o liklik mipela i kism, mipela i tok tenkyu," Mis Tauni i tok.

Samting olsem 2000 manmeri na pikinini i bin bung long dispela bung kaikai long ples Fichin.

Bihainim askim bilong ol Fichin Katolik meri grup, Misis Wes i tok olsem wanem samting Presiden bilong ol i askim long en. Bai em wantaim helpim bilong distrik edministresen i painim aut moa long dispela samting. Sapos i gat paul long dispela mani, ol lain husat i stap insait long dispela pasin bai kism taim nogat bihain lo i stap pinis.

Asples katim telefon waia long Wewak

ADAM ELLIOTT i raitim

OL papagraun bilong Maun Albowagi klostu long Wewak i bin brukim Telikom ripita stesin we planti hap bilong Is Sepik na Sandaun provins i nogat telefon sevis.

Ambunti, Angoram, Maprik long Is Sepik provins na Aitape, Nuku na Lumi long Sandaun provins em ol eria we i bungim hevi long telefon sevis. Dispela hevi bilong telefon i kamap tupela mun i go pinis.

Ripot i kamap olsem sampela liklik lain papagraun bilong Maun Albowagi eria i

singautim Telikom long baim ol mak olsem K13,000. Insait ripot i tok ol papagraun i wok long wetim wanpela kot disisen bilong graun olsem na ol i laikim mani bilong baim ol kos bilong dispela kot.

Ol asples i rausim 84 sola panel we i kos olsem K5,000 long wanwan wantaim ol arapela masin long Maun Albowagi ripita stesin long strongim: dispela singaut bilong ol. Ol asples i tok ol bai givim ol samting ya i go bek sapos Telikom i kam givim mani long ol.

Spika bilong Nesenel Palamen na memba bilong Wewak Bernard Narokobi i tok ol ples lain bai bungim bikpela hevi olsem na em i singaut long ol komyuniti lida long sapotim wok bilong ol plisman long tram bringim bek telefon sevis.

Dispela i no wanpela hevi bilong politiks, tasol em i hevi bilong lo na oda nau olsem na mi laik sapotim ol plisman long wanem samting ol i ken mekim long dispela hevi. Long taim bilong hevi olsem, lo i mas wok strong, Mista Narokobi i tok.

Taim dispela hevi bilong telefon i stap yet na givim hevi long ol bisnis na kampani long tupela provins wantaim, wanpela Telikom wokman i tokaut olsem ol i no ting bai ol wokman bilong Telikom i stretim dispela hevi hariap.

Komyunikesen bagarap long Aitape

KOMYUNIKESAN hevi long Aitape, Sandaun provins bai klostu kam bek, dispela em toktok bilong Momase Rijen, Telekom Menesa Peter Laina.

Mista Laina i mekim dispela tok, taim Wantok i ringim em long opis bilong em long Lae long painimaut, wai na komyunikesen i go long Aitape i no wok inap long tupela mun nau.

Mista Laina tok, komyunikesen i bagarap bikos ol papagraun bilong maunten Albowagi bin go bagarapim ripita stesin na ol samting bilong komyunikesen. As em bikos ol laikim mani.

Bikos long dispela em salim ol teknisen i go pinis long Aitape na Vanimo long dispela wik long stretim komyunikesen bilong Aitape stret wantaim Vanimo yusim setolait na i no moa long Wewak olsem bipo.

Mista Laina tok em bilip olgeta wok long dispela bai pinis long tupela wik taim na komyunikesen tu long Aitape bai kam bek gen.

Dispela Wantok pepa kism ripot tu olsem bos bilong Plis long Momase rijen na PPC long Wewak i no mekim eksen bikos tupela i kam long dispela eria olsem na tupela i no salim ol plisman i go long helpim ranim dispela hevi.

Mista Laina tok tu olsem em i no amamas tumas long Sandaun Provinsel gavman long i no mekim wanpela samting long tram helpim na putim komyunikesen bek long Aitape wankain tu long ol bisnis haus.

Vanimo Wes Kos pipel nogat nogsport

MOA long 200 pipel bilong ples Musmu, painim hat tru long go kam long taun. Ol pipel ya i nogat trenspot moa long 12-pela mun bihain ol PMV bilong ol i bin bagarap. Ripot i tok ol pipel i mas wokabout bipo long ol i ken kism PMV na go insait long taun.

Ripot Wantok i kism i tokaut olsem ol lain husat i save wok long gavman opis na ol bisnis haus na tu ol sikmanmeri na pikinini na ol mama husat i save salim gaden kaikai long taun maket. Na pipel nau i autim tok long ol lida bilong Nesenel Palamen long i nogat luksave long dispela hevi Mushu pipel i gat long-pela taim.

Wod memba bilong Mushu insait long Bewani/Wutung/Onei, Alis Armi i tokaut olsem sampela memba i wok long taim ol banana bot wantaim ensin na givim aut i go long ol wanwan lain na wantaim bilong ol na ol i lus tingting long pipel

bilong Mushu.

Pas bilong Kaunsela Arni i tok olsem: Mipela i nogat wanpela bot i stap long komyuniti long helpim ol mama long kism na salim gaden kaikai bilong ol. Nau yet mipela i save wokabout na kism ka long Tako i go long lain kam bek long ples tu, ka i save lusim mipela long ples Tako na mipela wokabout i go long ples. I nogat ka tu long helpim ol lain, husat i sik long go long haus sik taim ol i sik", pas bilong Kaunsela Arni i tok.

Ol lain bilong ples plenim i gat laik long wanpela bot wantaim ensin. Ol bai i yusim dispela bot long ka long Jayapura long salim na baim tu samting long belpis sindaun bilong ol long ples. Kaunsela Arni i tok, taim ol i ro go long Jayapura, dispela bot ken helpim ol yangpela bilong ples long painim pis bilong kaikai na salim long pablik.

Minista Waiko sapatim ol rurel tisa

EDUKESAN Minista DoktaJohn Waiko i tok i mas gat sampela kain presen o riwod i go long ol tisa i wok long ol rurel eria we i ken mekim ol i strongim ol long wok long hap.

Memba bilong Sohe insait long Oro provins, Dokta Waiko long dispela wik i bin katim K1,000 insait long wanpela yia long wan wan tisa i kisim wok long tis insait long ol rurel eria. Dispela mani em i kam long distrik plening na baset prairiti fan bilong em na em i tok dispela bai helpim strongim ol tisa husat i wok long ol rurel eria na ol i no lusim wok nmma ronawe.

Dokta Waiko i bin stap long lons bilong edukesen plen long wankain taim we ol sinia Sohe distrik tisa i sindaun long ripot raiting kos bilong ol. Em bin sponsaim lonsing wantaim K2,000.

Dokta Waiko taim em i salensim olgeta long lons na kos i tok "Salens i stap long yumi em wanem samting

yumi ken mekim long helpim ol dispela lain i no go long skul na ol dispela i no inap long rit na rait.

Bihain long em i harim ol elementeri skul pikinini bilong Koipa na Agenahambo i singim nesenel entem em bin salensim ol tisa i bin sindaun long ripot raiting woksop long tanim nesenel singsing i go long tokples bilong ol taim ol i go bek long ol wan wan skul bilong ol.

Ol arapela bikman i bin stap long dispela seremoni em long provinsel edministreta Raphael Yibmaramba, deputi gavana Wilson Wase, provinsel edukesen edvaisa Paul Namono, kurikulum developmen grup bilong Por Mosbi na ol arapela edukesen bik manmeri.

Bihain long lons, grup ol bin singautim grup bilong Mista Baki long wanpela "pondo" kaikai we ol bin givim ol wanpela laip pik, planti taro, banana na sugaken.

Woksop i bin pinis long las Fraide.

Ol Sohe tisa sindaun long ripot raiting woksop



• Wanpela komyuniti skul long rurel eria insait long Oro provins i kisim sola lait. *Fall foto.*

Gutpela wok painimaut mas kamap long Flai Riva gavman saspensen

FOMA Westen provins nesenel palamen na Saut Flai memba Parry Zeipi i laikim Nesenel Gavman long skruim saspensen bilong Westen Provinsel Gavman inap ol i karimaut gutpela wok painim, ol samting i kamap orait na gavman na ol pipel long provins i amamas.

Mista Zeipi i tok Nesenel Gavman i bin saspensim Flai Riva Provinsel Gavman bikos ol lida long provinsel na nesenel level na ol pablik sevan long provins i paulim pablik mani.

Em i singaut long ol atoriti long karimaut ol wok painimaut, painim rong na kisim ol i go long kot bilong stretim dispela hevi.

Em i tok Westen Provinsel Gavman i kisim sas long paulim bikpela hap mani inap long K20 milien na dispela em i bikpela mnimk tru, olsem na nogat gutpela samting i kamap long provins.

Em i tok

Em i tok dispela sas long paulim K20 milien em i bikpela sas tru stat long taim ol i kirapim Westen Provinsel Gavman long 1978.

Em i war na i no amamas long pasin we ol foapela nesenel pala-

men memba bilong provins i wokim long stap isi na i no wokim wanpela toktok long sampela samting we i karamapim laip na sindaun bilong ol pipel. wanpela em long pasim Ok Tedi main insait long 10-pela yia i kam.

"Olsem wanem na ol lida bai givim lidasip taim rimot kontrol i ranim provins?" Mista Zeipi i bin askim.

Em i tok ol nius ripot i sutim tok long Saut Flai memba Gabia Gagarimabu na loya Samson Jubi i bin laikim Ok Tedi Main i dipositim K600 milien long wanpela Swis beng akaun olsem kompensesen long tilim i go long ol pipel i "giaman pipia toktok".

Mista Zeipi i sutim tok long Mista Gagarimabu long wokim wankain trik long 1996 taim em i kisim kampani i go long Suprim Kot long Victoria, Australia tasol i kam inap nau, ol papagraun bilong Ok Tedi main na Flai Riva eria i no lukim dispela mani yet.

Olsem na em i salensim Mista Gagarimabu long mekim kla i go long ol Flai Riva pipel wanem sam-

ting i kamap long Melbon kotkes, hamas mani ol bin peimaut, husat i bin kisim kompensesen na amas long wan wan grup na man.

Em bin tok 8-pela saplimen agrimen namel long Nesenel Gavman na Ok Tedi em ol i brukim pinis na ol memba bilong provins, moa yet, Gabia Gagarimabu husat i bin sempionim envoirnmen isu i no moa askim.

Em i tok planti moa lida i stap we ol i mas mekim wok painim long ol, wanpela bilong ol em Sale Subam husat i bin mini fainens minista bilong Flai Riva Provinsel gavman long 1997/98 taim pasin bilong paulim mani i go nogut.

Mista Zeipi husat i bin lus long 1977 nesenel ileksen bikos em i sik na stap long haus sik long Australia long dispela taim bai sanap long 2002 ileksen long mun Jun.

Em i no tok wanem pati em bai joinim.

Em i laik sanap resis bikos em i lukim olsem lidasip bilong provins bilong em i go nogut na em i laik stretim dispela na ol pipel i ken kisim ol gutpela sevis.

SAMTING olsem 70 hetmasta na ol sinia tisa bilong Sohe distrik long Oro provins i bin sindaun long wanpela ripot raiting woksop.

Kos ya i bin kamap long Agenahambo Praimeri skul ausait tasol long Popondeta taun.

Long dispela taim tu, ol tisa i bin witesim namba tu lonsing bilong tupela edukesen plen dokumen bilong Kurikulum Rifom Implimentesen Plen 2001 inap long 2005 na Insevis Menesmen Plen 2001-2005.

Ol bin lonsim dispela tupela plen pastaim long ples Tubusereia insait long Senrel provins tupela mun i go pinis.

Siaman bilong Tisas Sevis Komisn Allan Jogioba taim em i edresim woksop i bin tok i moa-beta long ol i lukautim gut ol tisa na ol wari bilong ol na ol i ken skruim gut ol rupela gavman na edukesen rifom.

Mista Jogioba i tok ol tisa i mas lainim gut ol pikinini maski ol i bungim ol kain hevi taim ol i karimaut wok bilong ol.

Tasol long planti taim ol i kisim hevi bilong ol i go long ol bos, ol no save bisi tumas long stretim ol. Olsem na Mista Jogioba i bin strongim ol ol pati i stap insait

long dispela long lukluk gut long ol hevi na wari bilong ol tisa na ol i ken mekim gut wok bilong ol.

"Ol dispela polisi senis bai no wok gut inap yumi lukautim gut 34,000 tisa bilong yumi long kantri," Mista Jogioba i tok.

Em i tok strong long olgeta pati long wok bung gut wantaim long edresim ol samting we i sut long wanpela bikpela woklain grup long kantri.


Edukesen seketeri husat i bin stap long lons i bin tok inait long nupela edukesen kurikulum ol i rivuyim na wok long en long dispela taim, ol bai putim i go insait tu histri bilong kantri.

Em i tok dispela i kamap bikos histri em i bikpela samting na ol bai putim olsem wanpela sabjek we olgeta elementeri na praimer skul sumatin i mas lainim.

Em i tok ol yangpela i mas lainim histri bilong kantri bikos hap long ol hevi i kamap long dispela kantri em planti pipel i no save long ol trupela samting. Na em i tok histri em i hap long ol dispela samting i tru.

Em bin tok PNG em wanpela kantri long wol we i tokaut olsem ol 800 tokples bilong em i stap laip yet na ol pipel i yusim i kam inap nau long toktok wantaim wanpela arapela.

Painim Long WANTOK NIUSPEPA Tasol !



Niugini Ailans Nius

Sepik Nius

Sauten Rijon Nius

na Hailans Nius



WANTOK

NIUSPEPA BILONG YUMI PAPUA NIUGINI STRET!

Gavana askim ol pipel long wok gaden

PIUS MON I raitim

GAVANA bilong Westen Hailans provins Pater Robert Lak i tok strong long ol pipel bilong em long provins i noken mekim mani kamap olsem wanpela god bilong ol.

"Mani i no olgeta samting long laip na yumi mas save olsem i gat gutpela na nogut samting i stap taim yumi tingting tumas long mani," Pater Lak i tok.

Long wanpela lonsing bilong tokaut long gutpela bilong samting save kamap long provins, Pater Lak i tokim ol pipel i bung olsem provins i gat gutpela graun long planim ol gutpela kaikai na ol pipel i noken tingting tumas long mani tasol na ol i mas wok long gaden long lukautim ol yet.

... Planti ol yangpela i lusim tingting long gutpela pasin bilong ples

"Ol gaden kaikai i stap bipo i kam inap nau na ol tumbuna bilong mipela i save lukautim ol yet taim ol i save wok long gaden," em i tok.

Em i tok planti pipel long provins i lusim wok long gaden bilong ol na tingting long holim mani tasol long baim kaikai na dispela pasin em i tok i mas senis.

Pater Lak i tok nau long dispela taim kantri i painim bikpela hevi long mani na ol pipel i mas tingting gut long wanem kain we ol i ken wok long helpim ol yet.

Planti taim em i tok ol yangpela manmeri i save raun nating long ol buai maket ples na pilai kas na ol i no save tingting

long helpim ol papamama na lapun long ples.

Em i tokim ol yangpela olsem ol i strongpela pipel bilong kantri na ol i mas wok long helpim long bringim developmen i kam insait long kantri.

Gavana Lak i tok planti ol yangpela i wok long lusim tingting long ol gutpela pasin bilong ples na kalsa tasol dispela tingting i mas senis na ol studen i mas holimpas ol samting bilong mipela na noken tingting olsem waitman.

Em i tok yet olsem ol mama em ol gutpela menesa bilong famili bilong ol na ol yut na ol man i mas sapotim ol mama long mekim gutpela wok long helpim provins na famili.

Kabinet bai mekim disisen long Enga provinsal gavman

JOE KANEKANE i raitim

OL ripot olsem i gat paul na hai pasin i kamap long opis bilong bipo Enga gavana Peter Ipatas i stap nau long opis bilong Provinsal na Lokol Level gavman.

Sekretari bilong Provinsal na Lokol Level gavman Leo Meninga ol toktok olsem gavman bilong Peter Ipatas i no ranim provins gut i stap pinis long opis bilong em.

Em i tok ol i makim wanpela grup long mekim wok painimaut na lukluk i go insait long dispela ripot.

"Mipela i makim ol opisa long lukluk i go insait long dispela ripot na taim ol pinis bai mipela i mekim wanpela submisen i go long kabinet," Mista Meninga i tok.

Em i tok wanpela samting we i mekim wok i go isi isi tru em bilong ol opisa long lukluk gut long dispela ripot na painimaut sapos i gat rong i stap.

Mista Meninga i tokaut olsem ol opisa i wok long lukluk yet long ol samting na bai ol i kamap wantaim wanpela tems ov refres bihain long ol i glasim gut ripot.

Em i no tokaut long wanem bikpela samting bai kamaut long dispela ripot bikos wok painimaut i stat nau tasol

na bai em i no klia yet long mekim wanpela toktok long dispela ripot.

Mista Meninga i tok wok bilong dipatmen em long lukluk long ol ripot na mekim submisen i go long kabinet na bai kabinet yet i yusim pawa bilong em long toktok sapos rong i stap.

Bipo Enga gavana Peter Ipatas husat i Minista bilong Maining i no laik mekim wanpela toktok long dispela samting tasol em i tok olsem em i save ripot bilong em i stap wantaim dipatmen pinis.

"Mi harim olsem ripot em dipatmen bilong Provinsal Afeas i kisim pinis olsem na nau mi ting mipela bai wet tasol na lukluk long wanem samting bai kamap long ol dispela wok painimaut bilong dipatmen," Mista Ipatas i tok.

Pawa bilong Mista Ipatas long stap gavana em ol i bin rausim tupela yia i go pinis.

Bihain long dispela ol i makim em kamap Maining minista bihain long em i go joinim gavman.

Bipo keteka edministreta Kundapen Talyanga em ol i bin rausim em tu na makim Penjore Pilyo long kisim ples bilong em.

Provinsal gavman i bin kisim dispela rausim bilong pawa i go long stretim long Suprim Kot tu.

Kodineta tok rifom nogat sapot bilong gavman

HILDA WAYNE I raitim

PROVINSAL Rifom Kodineta bilong Isten Hailans provins Peter Hoyato i tok ol edukesen rifom long provins i kamap gut tasol nogat sapot i kam long provinsal na nesenel gavman.

Tasol em i tok bikpela amamas bilong em i go long ol bod memba bilong ol skul na ol papamama bilong ol pikinini husat i pilim hevi tru long helpim ol skul long Isten Hailans.

Ol biling bilong klasrum na ol narapela biling long skul em ol komyuniti na bod yet i

save bungim tingting long mekim long sapotim ol rifom i ken go het yet.

Mista Hoyato i tok ol yet i save mekim ol fandering long kisim mani bilong bildim ol klasrum.

Narapela problem tu em i tok ol rifom skul kurikulum i no save go hariap long ol skul long taim stret na dispela i save mekim hat tru long ol tisa na ol studen bilong ol.

"Mi no save bilong wanem dispela samting i kamap bikos em ol lain long Mosbi yet i save tasol ol i no tokim mipela long provins," Mista Hoyato i tok.

Em i tok yet olsem ol sekondari skul i kisim planti gutpela helpim long edukesen rifom na mak bilong ol studen long go moa yet long skul i kamap gut tasol ol elementari skul i gat hevi yet.

Em i tok planti ol elementri skul i wok long painim hevi long kisim graun bilong kamapim ol skul na klasrum bilong pikinini.

Mista Hoyato i tok yet olsem ol tisa tu i no save kisim gutpela kain trening long helpim ol long lainim ol elementri pikinini.

Em i tok planti tisa i stap tasol ol supavaisa i nogat long lainim ol gut long we bilong lainim ol

studen.

Dispela wankain hevi em wanpela praimari skul inspekta long Madang, Issac Sikit tu i bin autim na em i tok kros olsem ol edukesen rifom i no kisim sapot i kam long edukesen dipatmen na nesenel gavman.

Mista Sikit i tok ol rifom bai kamap gut tasol bikpela sapot i mas kam long dipatmen na nesenel gavman.

Sauten Hailans provins nogat mani

PEKU PILIMBO i raitim

OL pipel long Sauten Hailans i laikim sampela toksave long wanem hap mani bilong provinsal gavman i bin go bikos planti mani tru i lus long provins.

Wanpela komyuniti lida bilong Imbongu distrik husat i no laik givimaut nem bilong em i tokim *Wantok Niuspepa* long dispela wik olsem bipo edministreta Pila Niningi i mas tokim ol pipel stret long ol mani bilong provins i go we.

Em i mekim dispela toktok bihain long sampela ripot i tokaut olsem planti kampani na manmeri i mekim sampela klem long mani mak long K10 milien na K3 milien i no stap insait long provinsal tresari dipatmen.

"Ol pipel long provins i mas save bilong wanem na nogat mani insait long provins long sapotim ol wok projek bilong provins," em i tok.

"Planti pipel i toktok yet olsem i bin gat sampela rong i stap wantaim bipo edministreta," em i tok.

Dispela lida i tok ol i mas kamap wantaim wanpela ripot we i tokaut long ol pipel long ol dispela mani.

Em i askim ol atoriti olsem Frod Skuat wantaim opis bilong Odita Jenerel long sekim ol dispela samting na tokim ol pipel long wanem hap mani i go.

Em i tok planti bilong ol dispela klem i kam long Imbongu distrik na planti bilong ol dispela projek wok we i kamap em ol i bihainim politiks tasol na mekim.

Kain samting olsem fanding bilong wanpela kopi plentesen, komyuniti skul na tu haus krai bilong ol man i dai tu em ol i save fandim tu.

Lida ya i tok Imbongu distrik tu i bin gat faiv yia plen bilong em tasol ol i no tingting long dispela plen na ol pipel i wet yet.

Em i tok em i sori tru long nupela edministreta Uhae Yabo bikos em i nogat mani long ranim provins gut.

Em i tok planti bilong ol distrik na senta long provins i kisim taim tru long ol rot i wok long bagarap bikos mani i no go insait long stretim ol rot.

Ripot i kam long Mendi i tokaut olsem K10 milien klem bilong ol kampani na wanwan manmeri em ol bai kukim long ai bilong olgeta publik bikos planti bilong ol dispela em ol giaman klem nabaut.

PINA
2001
PNG

MEDIA COUNCIL
OF PAPUA NEW GUINEA



unicef



Prime Minister
Sir Mekere Morauta
will open



THE 2001 PINA CONVENTION IN
MADANG ON OCTOBER 14, 2001

(Pacific Island News Association)

* All news organisations in the region will be represented by their Publishers, Editors, Program Editors and Managers.

The Theme is: **Media and the Pacific Child.**
The role of the media in helping,
protecting and developing our children.

* Key note address by UNICEF's
Asia Pacific Director,
Mehr Khan
*Guest speakers

Pacific Islands News Association
comprises media organisations
from the region.

Convention week Oct 14 - 21
at the Madang Resort Hotel and
Divine Word University

FOR REGISTRATION & INFORMATION CONTACT:

Tonny Yianni Phone : 309 0000
Email : tyianni@spp.com.pg
Justin Kili Phone : 320 1996
Email : jkili@naufm.com.pg
Peter Aitsi Phone : 320 1996
Email : pjaisi@naufm.com.pg



Pacific Child is Pacific Future



• Wanpela tieta grup i soim stail bilong ol long Independens de long Karkar.

Plis komplek long Task Fos

I GAT sampela toktok i kam long Madang olsem ol bik bos bilong plis i mas tingting gut na rausim ol Task Fos Yunit plis long provins.

Dispela toktok i kamap bikos ol plis long Madang i tok wankain wok em ol yet i mekim em ol Task Fos tu i mekim na dispela i no stret bikos ol yet inap long mekim ol wok bilong ol.

Ol plisman husat i mekim dispela toktok i no laik tokaut long nem bilong ol i tok ol i lukim olsem ol narapela seksen bilong plis olsem CID, Trefik, Prosekysen na Komyuniti Plising i no save kisim planti sapot tumas i kam long ol het lain bilong plis fos na provinsal gavman.

Ol i tok dispela kain pasin i no stret bikos ol i save mekim sem kain wok tasol long lukautim gut lo na oda long provins olsem na provins i gat gupela nem.

Wanpela sajen i tok CID i gat planti wok painimaut long mekim long sampela samting tasol ol i no inap wok bikos nogat ka long ol i go raun mekim wok bilong ol.

Wanpela olupela opisa bilong Provinsal Plis Komanda Sinia Inspekta James Kupi i tok em bai hat long rausim ol Task Fos i go bikos ol i stap redi tasol long stapim wanem kain bikpela trabel i kamap long provins na ol i mas stap.

Inspekta Kupi i tok yet olsem provinsal gavman

i no stap nating tasol i gat rot we ol plis i ken bihainim long kisim helpim. Em i tok sapos ol i gat hevi ol i mas kam long PPC na em bai kisim hevi bilong ol i go long provinsal gavman.

Inspekta Kupi i tok i tru olsem olgeta yunit i nidim planti helpim long mekim wok bilong ol gut na liklik mani i kam long provinsal gavman em ol i mas skelim gut.

Em i tok komyuniti plising i gat bikpela hevi tu bikos ol i nogat opis na ol plis manmeri i stap nabaut long olgeta hap na mekim wok bilong ol.

Inspekta Kupi i tok ol komyuniti plis i nogat kain samting olsem pepa na pen nabaut long helpim long mekim wok bilong ol.

Simok brus gat bikpela mani

HILDA WAYNE
i raitim

PLANTI pipel long ol rural eria long Papua Niugini i save painim bikpela hevi tru long kisim mani long isi we bikos ol gavman sevis i no save sapotim hat wok bilong ol.

Dispela tingting em Charles Pope bilong Wangil, Sumkar distrik long Madang provins i gat bikos em i save pilim dispela ol hevi.

Long viles bilong em long Wangil nogat rot bilong ka i save go na ol pipel i save silip tripela nait olgeta long rot inap ol i ken kamap long bik rot na painim ka bilong go long Madang taun.

Mista Pope i bin wok wantaim wanpela logging kampani long ples

tasol em i wok sotpela taim tru bikos kampani i lusim na go bek long 1998.

"Bihain long mi lusim wok em mi planim kokonat na buai tasol em i kisim longpela taim tru long redi na taim em i redi mi save painim hat tru long kisim i go salim long Madang bikos rot i nogat," Mista Pope i tok.

Em i tok dispela hevi em i no wanpela tasol i save pilim tasol olgeta lain pipel bilong em i save pilim tu.

Ol i save karim ol bikpela bek kaikai long tripela nait olgeta inap ol i kamap long rot na kisim ka i go long Madang long painim maket. Nau em i les long dispela na em i stat long planim simok brus bikos dispela em i save gro hariap tru

na nogat hevi bilong em long karim long rot i go long Madang taun long salim.

"Pastaim mi ting mani bilong brus i no gupela tasol taim mi lukim mani bilong brus mi amamas tru," Mista Pope i tok.

"Brus em i no liklik samting, i gat mani i stap long dispela simok," em i tok.

Ol pipel i statim bisnis long salim brus nau na ol i bin go long bikpela simok kampani Wills long Madang long salim brus long ol tasol kampani i tok ol i no laik baim olsem na ol pipel i salim long maket.

Long brus tasol Mista Pope i salim na bungim mani na kam long Mosbi long lukim siti pestaim tru. Em i tok long Mosbi em i lukim olsem planti

sevis na rot nabaut i kamap bikpela stret na em i tingim ples na em i sori olsem gavman i no save pilim pen ol pipel i save pilim.

Mista Pope i tok i tru Mosbi em i bikpela siti tasol em i lukim olsem olgeta samting i mani tasol na em i les long stap long Mosbi.

Em i tok mani i stap long graun long ples na em i amamas olsem em i no man bilong siti.

Mista Pope i tok long raun bilong em long Mosbi long tupela wik tasol em i lukim planti yut i stap nating na raun raun tasol i stap na em i tok dispela i nogupela.

"Mi ting ol yut i mas go bek long ples na putim han long graun bilong ol bikos mani i stap long graun," em i tok.

PNGBC kastoma askim long gupela sevis

BEN TAUMAI
i raitim

SAMPELA problem wantaim ol benk masin bilong Papua Niugini Benking Koporesen long Madang i mekim na ol kastoma bilong PNGBC long hap i kisim taim tru.

Tripela bilong ol dispela masin i bin bagarp long de 21 i go 25 long mun Septemba na

planti famili bilong ol kastoma i bin painim hat tru long baim kaikai na kisim mani bilong ol long dispela ol de.

Dispela hevi mekim na planti ol kastoma i komplek long dispela na laikim ol menesmen bilong PNGBC long Mosbi long ol i mas kam long Madang na stapim dispela kain hevi long noken kamap gen.

Ol kastoma i tok maski ol kastoma i go long benk long kisim mani ol i save sanap long longpela lain tru na lusim planti taim tru long sanap long lain inap tupela aua na wok bilong ol i no save kamap gut.

Wanpela tisa husat i

bin lusim skul bilong em long Bogia na kam long Madang i no bin amamas taim em i lukim olsem ol masin i no wok. Em i tok olsem bai em i no inap go bek long skul inap ol masin orait na em i mas kisim mani bilong em.

Ol kastoma i laikim olsem PNGBC i laikim olsem benk i mas putim sampela moa masin long sampela ples klostu long provinsal hetkuata long sevim ol kastoma bilong Niutaun, na ol rural eria tu husat i kam long taun.

Planti pipel tru long provins na planti bilong ol i save laikim benk na sevis bilong em olsem na ol i laikim olsem

benk i mas helpim ol kastoma long givim gut ol sevis i kam long ol. Menesa bilong PNGBC long Madang Cecilia Basum i no bin stap long givim toktok long dispela samting tasol wanpela sinia opisa i tok i gat problem long ol telepon sistem we i save join wantaim ol benk masin olsem na hevi i kamap.

Provinsal menesa bilong Telekom Leo Wamo i tok ol yet i nogat hevi wantaim ol telepon na ol i no save wanem samting i rong.

Em i tok sapos hevi i stap long ol telepon lain bai olgeta kastoma bilong telekom tu bai kisim hevi tasol dispela i no kamap.

Madang gat nupela telepon sistem

BEN TAUMAI
i raitim

OL Telekom kastoma long Madang i gat nupela sistem ol i bin kamapim long olupela enalog sistem i go long nupela digitel sistem.

Provinsal Telekom menesa Leo Wamo i tokaut long dispela olsem nupela sistem em moa gupela na kwik tru long salim ol toksave.

Dispela nupela sistem

bai helpim tru ol 480 telepon lain na bai ol i kisim ol sevis long lukluk long komputa na intanet long painim ol kain samting ol i laikim long em.

Mista Wamo i tok long taim ol i senisim sistem long olupela i kam long nupela sistem ol i no bin painim wanpela hevi na ol pipel i bin amamas tru long gupela sevis ol i kisim long Telekom.

Menesing darekta bilong Telekom PNG, Sunil Andradi i bin

mekim wanpela tok promis tu taim em i bin go bung wantaim ol memba bilong memba bilong Madang semba ov komes long mun August olsem bai sistem i senis na kamap moa gupela olsem na dispela wok i bin kamap.

Telekom i mekim planti wok yet na wankain olsem Madang NCD, Lae, Hagen, Goroka na NGI.

Dispela sevis i helpim ol manmeri gut tru.

PEA kotim Madang edministresen

BEN TAUMAI
i raitim

NESENEL kot long Madang i tok orait long Pablik Emplois Aso-siesen (PEA) brens long Madang long go bek long kot sapos ol i laik bikos ol i no bin bihainim stretpela we bilong kot.

Lo bilong kot i olsem yu mas givim toksave long ol man yu laik kotim 72 aua pastaim long yu laik kisim ol i go long kot. 72 aua bai givim inap taim long ol lain yu laik kotim i ken redi long kam long kot na tu bai ol i save long wanem kain

as yu laik kotim ol. PEA laik kisim Madang provinsal edministresen, Dipatmen ov Pesenel Menesmen na stet i go long kot.

Tasol PEA i no bin mekim dispela samting na kot i rausim kot bilong ol inap ol i stretim dispela samting. Loya husat i makim ol lain PEA laik kotim, Simon Albarick i mekim wanpela sabmisen long ol rausim dispela kot bilong PEA bikos ol i no bihainim lo long go long kot.

Kot i givim taim long PEA i ken go bek na mekim dispela samting

stret na tu kot i askim long ol i mas gat ol gupela evidens o as bilong bringim samting i go bek long kot.

PEA i laik kisim dispela ol dipatmen i go long kot bikos em i laik stapim ol long noken go het wantaim ol seleksen bilong ol pablik sevns long Madang edministresen we i bin kamap long tripela wik i go pinis.

Dispela nau em namba tu taim nau long PEA long Madang i mekim dispela wantaim 12-pela memba tasol i sapotim na i nogat olgeta memba long provins sapotim.



Tok Sori

Spika bilong Nesenel Palamen na memba bilong Wewak Open, Hon Bernard Narokobi i makim opis bilong Spika, olgeta memba bilong Papua Niugini Palamen, ol wokman na famili bilong ol na ol pipel bilong Wewak Open na i laik salim bikpela wari na tok sori bilong ol i go long Opis bilong Seketeri bilong Stet ov Vetiken Siti, i go long Het bilong Stet bilong Vetiken Siti, Pop John Paul 2, ol famili na wanwok na tu long Asbisop bilong Pot Mosbi Bisop Brian Barnes, olgeta Papua Niugini na Solomon Ailans Katolik na ol pren long dai bilong:

Asbisop Hans Schwemmer
Apostolik Nansio long Papua Niugini

"Mi vet bikpela God i tokim yu olsem, mi yet em wasman long ol sipsip bilong mi na mi bai painim ples bilong ol long kisim malolo" (Ezekiel 34: 11-15) God i singautim em i go long gupela ples long heven we em bai stap gut na bai i nogat pait na birua moa olsem long Papua Niugini na Solomon Ailan.

Em i ken kisim gupela malolo bilong God.

HON BERNARD M. NAROKOBI, LLB, MP
Spika bilong Nesenel Palamen

Bulolo distrik opis i paia

YAKAM KELO i raitim

BULOLO distrik opis i paia long Fonde moning long las wik we nogat man i save yet long stat bilong dispela paia.

Planti manmeri bilong Bulolo taun i kirap nogut long painimaut olsem dispela bikpela opis i no sanap moa olsem bipo. Ol i lukim tasol ol das na smok tasol i stap.

Memba bilong Bulolo i tok kos bilong dispela bagarap na moa long sampela hundred tausen Kina.

Mista Napo i tok dispela opis i kamap bihain long bikpela hatwok insait long 10-pela krismas long sanapim. Dispela opis tu i holim ol bikpela wok bilong gavman olsem Distrik Treseri Opis

na Bulolo Distrik Kot Haus.

Mista Napo i bin kirap nogut long harim dispela nius na em i ting dispela em wok bilong ol trabel lain. Olsem na em i askim ol plisman long hariap painim ol dispela trabel lain na sasim ol.

Em i tok dispela opis i kisim 10-pela krismas olgeta long wokim wantaim mani bilong lilektorel Developmen Fan (EDF) bilong em. Olsem na long wokim nupela opis olsem gen bai kisim narapela 10-pela krismas long sanapim.

Bikpela hatwok insait long 10-pela krismas i lus nating nau. Mi kirap nogut long harim dispela olsem na wanem kain tingting husat trabel lain ya i gat, plis i mas holim ol na sasim ol long dispela bagarap na tra-

bel ol i mekim, Mista Napo i tok.

Mista Napo i no amamas tru long dispela bagarap na em i askim ol pipel long luksave long wanem kain sevis em i wok long putim long distrik, na i no gutpela long putim gen wankain sevis long distrik sapos ol raskol pasin olsem i go het yet.

Yumi olgeta i ken tingim sapos em i gutpela long tromoi mani long kamapim sevis insait long distrik na ol man nogut bai bagarapim. Mi ting em i no gutpela tru long putim mani long kamapim sevis na bihain sampela lain i bagarapim, Mista Napo itok.

Bulolo plis i wok long kari-maut wok painimaut i go insait long dispela hevi. Ol i no sasim wanpela man yet.



• Ol Morobe studen long Lae Teknikol Koles i mekim save long singsing long Kalsa de bilong skul las wik i go pinis.

Trinita paris kamapim gutpela menesmen konfrens

OL papamama bilong 3 Mail Trinita paris long Lae Morobe provins long las wik i go pinis i bin holim wanpela konfrens bung bilong lukautim wok bilong sios na long menesim mani bilong ol wok sios na bilong ol liklik han-wok sios olsem, mama

lotu grup, wokmisiin o mentenim wok lotu i bagarap na sting na wokim haus bilong pasto o Sande Skul haus o liklik fainensing bisnis long helpim sios na kainkain wok bilong sios.

Dispela bung i bin kamap insait long 3

Mail Trinita Luteran sios long Lae. Misis Makiri Meagang i tokim Wantok nius.

Tasol dispela bung i bin kamap insait long tupela wik tasol Misis Meagang i tok. Em i pestaim tru long kamap insait long 3 Mail Trinita Paris.

Dispela em i namba wan taim bilong dispela konfrens i kamap olsem na ol hetmanmeri na lida bilong yuts na tisas bilong Sande skul tu i bin kamap long dispela bikpela bung bilong 3 Mail Trinita Paris long las wik go pinis.

Luteran Developmen Sevis amamas long agrikalsa program

BOD bilong Luteran Developmen Sevis (LDS) i holim las bung bilong ol long Malahang Lae. Dispela em namba tu bung we i las bung bilong dispela yia.

Bod memba Ub Iss i tok 6-pela bod memba i kamap long bung na ol i toktok long ol wok bilong Luteran sios insit long ol Luteran distrik bilong Papua Niugini.

Mista Iss husat i makim Madang na Karkar i tok ol i lukluk moa long ol polisi na developmen wok bilong Luteran sios.

Mista Iss i tok dispela program i wok gut tru longpela taim i kam moa long 25 krismas na olgeta bod memba i sapotim tru.

Namel long ol arapela gutpela program, Luteran Developmen Sevis (LDS) i salim ol yangpela

didiman na meri long go stap wantaim ol komyuniti long strongim wok agrikalsa insait long ol ples, Ol i save wokim ples balus tu long ol ples.

I gat tupela program ol i save lukluk moa long en. Ol isave salim ol didiman na meri i go long ol ples na tu ol i save helpim wantaim developmen bilong ol sevis olsem rot, bris na ples balus, wara saplai, rop bris, liklik ples balus bihainim wanem kain hap ol i stap long en.

Ol bod memba i save stap long sia inap 8-pela krismas. Na long dispela taim ol bod memba i save gat gutpela piksa na luksave long ol wok bilong LDS na save wok bihainim ol program.

Ol dispela yangpela didiman na

meri i ken stap wantaim ol ples lain inap 5-pela krismas na slip kaikai na wok wantaim ol asples. Dispela em long mekim ol ples lain i ken kisim helpim tru ol i laikim long en.

Em i tok long dispela taim bai ol dispela didiman na meri i ken soim tru ol rot na pasin bilong planim kaikai long gaden, lukautim ol abus na statim ol pis pon na lukautim graun i stap gut wantaim gris.

Mista Iss i tok ol yangpela didiman na meri i ken amamas long wok bilong ol long komyuniti bikos kaikai bilong wok bilong ol i ples kia. Ol bus ples long gavman sevis i lainim nupela save bilong planim kaikai long gaden na pulim gutpela klin wara.

Bulolo plis askim pablik long givim ripot long paia

PLIS long Bulolo i singaut long ol manmeri i mas tokaut long wanem samting ol i lukim o save long bagarap we paia i kukim distrik opis long Bulolo taun long las wik Fonde.

Sief Inspekta Joseph Noah i tok plis i mekim wok painimaut bilong ol i go insait long dispela bagarap tasol sapot bilong pablik long givim wanem kain stori ol i gat long dispela bagarap bai helpim tru olgeta wok bilong traim holim ol trabel lain.

Mista Noah i tok pablik i mas helpim plis long dispela samting bikos dispela opis em bikpela opis tru we i stap bilong helpim ol pipel bilong Bulolo taun na olgeta ples manmeri long Bulolo ilektoret.

Mista Noah i tok dispela opis i gat olgeta gavman opis we ol wokman bilong gavman i stap na wok long en long givim sevis

long ol pipel bilong ples.

Em i tok sampela toksave ol pipel i givim ol em, paia i bin stat pastaim insait long Treseri opis na bihain paia i kirap bikpela na go aut long olgeta arapela opis. I nogat wara tu long stapim paia olsem na paia i mekim-save stret long bagarapim opis na ol manmeri i sanap lukluk tasol.

Ol manmeri i bin traim tasol long sevim Kot Haus tasol opis bilong Kot Klak em paia wantaim olgeta kot pepa nabaut.

Mista Noah i tok plis i ting paia i bin stat pastaim long Treseri opis na ol i ting dispela em pasin bilong trabel lain long kukim dispela opis.

Planti ol projek menesa i nogat opis long wok na ol i save go kam long plis stesin long yusim ol telefon na feks masin long hap.

Mista Noah i tok olgeta manmeri i mas helpim plis long dispela wok painimaut bilong ol. Na ol i mas traim long mekim isi bel bilong ol turangu pablik sevans lain long ol i ken pilim gutpela na go bek long wok bilong ol.

Ol pablik sevans em ol bikpela samting tru long wok bilong bringim sevis na helpim i go long ol pipel bilong yumi long ples olsem na mipela olgeta i mas wok wantaim long helpim na sapotim ol long wok bilong ol, Sief Inspekta Noah i tok.

Wok painimaut i wok long go het yet na ol trabel lain bai hait yet, tasol wanpela taim bihain bai ol i kamap ples kia. Nogat man i save hait long trabel bilong em, Mista Noah i tok.

Mista Noah i tok em i wari nogut tru long lukim dispela opis bilong sevim pipel i paia.

Studen lida askim Morobe studen long bung

OL Lae Teknikol Koles long Lae i holim pinis wanpela bikpela kalsarel so bilong ol long laspela mun Septemba.

Studen Clement Yang i tokim Wantok nius olsem taim em i kam insait long Lae Teknikol Koles i nogat wanpela Momase olsem Madang Sepik grup i bin i stap.

Mista Clement i tok olgeta i bin lusim long dispela yia tasol. Em i tok planti hevi namel long skul i bin stap.

Mista Clement i tok ol ol studen painim hat long i go kam bilong ol long wanwan ples long viles bilong ol long ka o balus na sip, bikos long fainensait i no

gutpela tumas.

Olsem na Mista Clement i tok long fainensait ol save soim vadio so long helpim ol yet na ol arapela ektivitis olsem ol liklik projek long hepim ol yet long i go kam bilong ol long wanwan ples bilong ol.

Clement i tokaut tu long toktok bilong skul fis tu olsem, planti ol studen i no peim skul fis yet.

Clement Yang i bin askim honarabul memba Andrew Baing long helpim klab bilong Morobe Studen Asosiesen long Lae Teknikol Koles long K1,000.

Dispela bai helpim ol studen long sik o

trenspot o brukim lekhan o emejensi. Olsem na Yang i tok amamas long memba Andrew Baing long gutpela helpim bilong em.

Dispela em i plen bilong em yet long ol studen i mas fomim wanpela Morobe asosiesen tim. Studen Yang i tok nau yet mi tok pinis olsem Lae Tek i gat bikpela aut-standing skul fi i stap yet.

Em i toks seken wik bilong tem foa ol manki bai kisim woning leta long bai ol i go aut o nogat.

Clement i tok ol i putim wanpela notis, bilong pablik long luksave.



• Morobe gavana Luther Wenge i toktok long ol pipel bilong Morobe long Independens de.

MOROBE PROVINCE

AGRICULTURAL SOCIETY INC.

i laik toksave long ol singsing grup bilong ples husat i tingting long stap insait long 200 Morobe So

Singsing olsem ol i mas rejista nau.

Ol registresen fom yu ken kisim long: The Professional Real Estate Opis

5th St. Lae.

Olgeta registresen bai pas long

Oktoaba 7th.

Fax: 472 5141 - Tel: 472 2887

Morobe So Singsing Tumbuna,

28 Oktoaba

Morobe So

26th, 27th na 28th Oktoba

COCA-COLA AMATIL
PAJIA NEW GUINEA

ELC-PNG kristen pasto holim namba foa nesanel pasto konfrens

PAULUS TALI i raitim

EVANJELIKOL Luteran Sios bilong Papua Niugini i holim namba foa nesanel Pastos Konfrens long Ogelbeng Semineri Hagen distrik inap long Septemba 26.

Moa long 650 pasto bilong 15 ELC-PNG i kamap long dispela bung. Em long Emmanuel Hagen, Jiwaka, Simbu na Goroka, Kainantu, Yabim, Kate Siassina long Niugini, Karkar na Ukatu.

Olgeta pasto i kamap na bung long Hagen Pak Ovel i mas na rautim i go daun long Pope

Ova long opening seremoni.

Oi kristen bilong Luteran sios bilong Hagen tu i soim gutpela pasin long ol manmeri taim ol i bihainim ol pasto bilong ol i go daun long ples bilong bung. Moa long 4-560 manmeri i kamap long dispela taim.

Asisten Bisop bilong Luteran sios Rev. Kiage Matoro i opim dispela namba foa konfrens na program i go het. Ol trampet grup bilong Onerunka i go pas long konfrens bilong dispela de.

Prinsipel bilong Matin Luta Semineri Rev. Oren Dokta Cekung Zrukao i kisim ples

bilong Het Bisop bilong na autim tok bilong God bihainim hetwok bilong pasto konfrens. Mi pasto mi hetman Rev. Dr Eyderukao i autim tok bilong God long Rom 12:1-2 na tok, "Yumi mas givim bodi bilong yumi i go long God olsem ofa."

Em i tok moa olsem ol pasto i gat wok long autim dispela Gutnius long ol manmeri.

Tu Rev. Skeruku i salensim ol Luteran pasto na i tokim ol long i no ken wokabaut olsem ol man nating bilong dispela graun, nogat, ol spesel man bilong dispela graun long ai bilong God long karimaut wok bilong

em yet."

Yupela i mas givim bodi biong yupela olsem ofa i go long God olsem smel pauda. God inap long yusim yupela long kainkain rot bilong bringim ol sip bilong em i lus pinis i kam insait long banis gen.

Katolik bisop bilong Hagen Daiosias Pater

Francis tu i bin stap long dispela taim bilong witnesim dispela namba foa nesanel pastos konfrens bilong ELC/PNG.

Deputi Gavana bilong Sauten Hailans provins i tok husat i witnesim dispela bung tu i tok i amamas tru long dispela kain bung i kamap long kain ples olsem Hagen.

Wabag holim Katolik yut reli

BRADLEY NAVI i raitim

OL KATOLIK yut bilong Wabag Daiosias i bin holim bikpela refi long Holi Spirit Pastoral senta long Par las mun. Moa long 120 yut na ol waslain bilong ol i bin kam long reli. Yut Kodineta Lawrence Kimale i tok reli ya i bin go gut na ol yut i kisim sampela gutpela skul long en. Bikpela samting i bin kamap long dispela taim em Gospel singsing resis.

Planti lain i stap klostu long Pastorel senta i bin go witnesim dispela samting. Long ol yangpela long ples husat i no bin stap long reli, Redio Enga i bin katim ol singsing we ol bin pilaim long program bilong ol long ol lain long harim.

Oi yut i bin kisim save na skul long HIV/AIDS, ol senis i wok long kamap long kaiserel, sosel na politikel sait we i wok long staim laip na sindaun bilong ol. Oi bin gat taim tu long serim bilip na ekspirians bilong ol, ol hevi na traim bilong ol na ol wainlain yangpela bilong ol. Planti yut long ol wan wan peris i bin tingim ol toktok bilong Pop John Paul 11 olsem yut em i presen bilong spirit long sios. Bihainim dispela, planti yut i bin painim luksave long dispela toktok we i sut long famili na komyuniti bilong ol.

Long pinis bilong reli, Bisop Arnold Orowae i bin tokim ol yut olsem Bikpela i givim ol wan wan wok long ol na i moabeta long ol i yusim ol gut long helpim ol famili na komyuniti. Bisop i bin salensim ol yangpela olsem rot bilong bilip i go long Jisas i mas go het na i mas noken pinis long dispela yia sios i makim olme Yia bilong Kraus na Yut.

"Laip i mas go eht na ol i singautim yupela long wokabaut wantaim Jisas, givim witnes long em long taim bilong amamas na taim bilong sori.



Konfirmasio long Ambunti • Bisop Tony i givim konfirmasio wantaim helpim bilong Pater Michael na Carlos.

ECPNG holim nesanel bung long Kiunga

IAN KAKARERE i raitim

EVANJELIKOL Sios long PNG (ECPNG) i holim anuel nesanel bung long Kiunga long dispela wik.

Presiden bilong ECPNG Pasto wates Bowaliya i tok 96 bikman bilong sios i kam long Westen, Sauten Hailans, Sentrel, Westen Hailans,

Madang na Morobe provins i stap insait long dispela wanpela wik bung. Pasto Bowaliya i tok sios i gat moa long 100,000 memba insait long kantri.

Em i tok ol bai makim nupela nesanel vais presiden, jenerel seketeri na tupela nesanel eksekutiv komiti memba long kisim ples bilong sampela sios lida husat i

risain long go insait long nesanel ilensen neks yia taim sampela i ritaia.

Pasto Bowaliya i tok konfrens bai lukluk long long senis insait long UCPNG mama lo na kirapim tu wanpela bisnis han bilong sios.

Oi arapela samting we konfrens i lukluk long en em long bihainim taim bilong sios, plen bilong em, Evanjelaisesen, Wimens ministri, Edukesen, Yut, helt, ol Pioneer na Misionari Aviesen Felosip (MAF).

pasto Bowaliya i tok bung bai lukluk wanem rot sios bai bihainim insait long nupela milionium na kirapim nupela kongriksesne insait long kantri.

Em i tok bikpela wok i stap yet long sios bilong karimaut ol wok misin autris long kisim Gutnius i go long ol pipel i no harim yet Tok bilong Bikpela na tu pulim bek ol dispela i lus long rot. Pasto

Bowaliya ministri bilong ol meri em i bikpela hap bilong sios ministri bikos i gat bikpela mak bilong ol meri insait long kongriksesen. Na tu ol i ken karimaut bikpela wok long sios.

Em bin tok tu olsem ol yut em ol futja bilong sios na kantri na ECPNG i save ranim planti praimer skul long kantri. Em i papa bilong Awaba hai skul insait long Westen provins na tu Tisa Kolis long Dauli insait long Sauten Hailans provins.

ECPNG i save ransim ol het senta na epos long Runginae na Balimo insait long Westen provins.

Narapela bikpela wok long sait bilong helt sevis bilong EUPNG em trenim ol komyuniti helt woka long Runginae klostu long Kiunga.

Pasto Bowaliya i tok planti long ol EUPNG helt sevis, eduksesen na teknikel sevis wantaim tu ol spirituel na

pastoral wok i no inap kamap gut sapos sios i nogat gutpela wok pren wantaim Pioneers na MAF ogeaisesen.

Pioneers em wanpela grup long ol ovasis voluntaria misinari woklain husat i givim sevis bilong ol long wok bung wantaim EUPNG Sios insait long ol kain wok we sios i mekim.

Planti long ol Pioneer lain i kam long Australia, Nu Silan, Yunaitet Kingdom na Yuniatet Stes ov Amerika.

Pastaim ol bin kolim ol Pioneer olsem long Australian Pasifik Kristen Misin (APCM). Long ol yia i go pinis olsem long 1940 na 1950 taim ol i kam pastaim long kantri, ol bin kolim ol Evanjelikel Fil Misin (UFM).

Oi MAF ejen i save wok long ol bus ples-balus na long dispela bung, ol bai glasim na skelim ol rot we MAF inap kamapim gut sevis bilong em long dispela taim.

Oi Yunaitet Sios meri holim bikpela bung long Milen Be

YUNAITET Sios Wimens Felosip (UCWF) i holim namba 11 traieren konfrens long Milen Be provins. Oi i save holim insait long olgeta tripela yia

Bung ya i bin stat long las wik Septemba 25 na bai pinis tumora, Fraide Oktoba 5.

Laspele bung olsem i bin kamp long Petats Ailan long Buka long Septemba 1998.

Ples ol i holim bung long dispela yia em long Lelehudi i stap 10-pela mail ausait long Alotau taun.

Seketeri bilong Yunaitet Sios PNG (UCPNG) Jessie Lowa husat i lukautim sia bilong ol meri i oge-naisim dispela samting tok het tok bilong konfrens em "Go wantaim Bilip na Serim Grasia bilong Bikpela we bai oraitim Yu".

Het tok i sut long strongim ol meri long kamap olsem rot long helpim ol lain i gat hevi insait long ol famili, komyuniti, kantri na wan wan.

Planti ripot i kamap long nius long pasin pamuk, sot long ol samting, sik, pasin bilong paulim mani, stap nating, les, daunim ol famili na komyuniti na sik nogut AIDS/HIV i go bikpela moa. Dispela em ol piksa long ol hevi we sios i bilip inap kamap wantaim grasia na laik i kam long Bikpela.

Seventi tri meri lida long eitpela UCPNG rijen long kantri i stap long bung. Oi dispela lida meri i makim 48,320 memba bilong Yunaitet Sios Wimens Felosip memba insait long kantri na dispela i kam long 2000 UCPNG kongriksesen long PNG.

Wan wan long ol eitpela rijen i gat UCWF rijinel eksekutiv (Rijinel UCWF) we i gat edvaisa, presiden na vais, tresera, seketeri na fultaim kodineta long Wimens desk. Meri bilong bisop em i save kamap olsem edvaisa.

Long dispela konfrens, bai i gat tripela hap. Long tupela de, ol bai toktok long ol samting we i karamapim ol meri i kontrolim laip bilong ol long ol samting we ol i kamapim long pulim mani long en Long namba tu hap, ol bai karimaut ol autris program long ol ples klostu long Lelehudi na long namba tri hap, konfrens tru we bai glasim olgeta samting bai kamap.

Modereta bilong Yunaitet Sios Reveren Samsen Lowa na misis bilong em i go pas long dispela konfrens.

Bisop Henry Tauwaigu bilong rijen we i hostim konfrens i ripot long Alotau olsem ol bin karimaut ol wok redi long dispela samting insait long tripela mun. Olsem na ol i bilip olsem konfrens bai karimaut. Bisop Tauwaigu i bin opim konfrens ya long Septemba 26 na Modereta Lowa bai pasim dispela long Sarere Oktoba 6.

Olgeta kristen i gat wok long mekim

PAULUS TALI i raitim

OL pasto bilong Evanselikel Luteran sios bilong Papua Niugini i bin kamap long Ogelbeng long Hagen long namba foa konfrens bilong ol stat long 24 na i pinis long 27. Long dispela wok ol pasto i go aut long wanwan kongriksesen klostu long Ogelbeng bilong lotu wantaim ol manmeri.

Oi pasto bilong ol distrik olsem Madang, Karkar na Papua distrik i go aut na lotu wantaim ol kristen bilong St Daniels kongriksesen klostu long Hagen Tech we ol famili tasol i save lotu long en.

Oi yangpela bilong St Daniels kongriksesen i pilaim ol drama, ol singsing na pulim ol i go insait long lotu.

Pasto Genbogi Dama bilong ELC Madang distrik i autim tok bilong God i stap long Jeremia we i bihainim het tok bilong konfrens "Mi pasto mi husat."

Pasto Dama i tok tu olsem dispela hehtok i no bilong ol pasto tasol, nogat. I gat wok bilong helpim na sapotim wanpela narapela long tok bilong God long strongim yumi long kamapim gutpela laip na sindaun insait long ples, komyuniti na sios.

Em i tok, taim yumi liklik pikinini yet God i makim na singautim yumi pinis long em i gat plen long laip bilong yumi (Efesae 6:12). Long dispela yumi Kristen i olsem soldia na yumi mas sanap strong long pait wantaim ol samting i nogut bilong dispela graun.

Oi Kristen i pinisim dispela lotu wantaim kaikai na presentesen. Siaman bilong St Daniels kongriksesen Jekop Tapp i tok tenkyu na welkam long ol pasto bilong Madang, Karkar na Papua distriks long lotu wantaim ol em i tok wanpela haus lotu bilong ol em ol i wokim long moa long K16,000. Prinsipel bilong Hagen Tech i tok amamas na welkam long ol Pasto wokim lotu ol na wok bung wantaim long sanapim sios bilong God i ken groa.

Oi pasto i soim amamas bilong ol long sampela mani ol i givim bilong helpim na sapotim dispela haus lotu i ken sanap na wok i groa. Pasto bilong Gordon Luteran Sios i pasim dispela bung wantaim pre.



God i stap wantaim yumi

God em i ples hait bilong yumi, na em i save strongim yumi oltaim. Em i stap klostu na i redi long helpim yumi long taim bilong bikpela hevi. Olsem na yumi no ken pret long ol samting i kamap. Graun i ken bruk nabaut long guria, na ol mauten i ken pundaun namel long solwara. Na si i ken pairap strong moa na bruk nabaut na spet i ken kamap, na biksi i ken kalap nabaut na sakim ol maunten. Tasol maski, yumi no ken pret. Taun bilong God, em i ples God Antap Tru i makim bilong em yet. Wanpela bikpela wara i stap namel ol en, na ol manmeri i save amamas long dispela wara.

Psalm 46: 1-4

Tok ples Yurop skul i op fri



• Ol pipel i kam lukluk raun long Nesenel Miusium we ol Yurop lain i putim kainkain samting bilong kantri bilong ol long pablik i ken lukim.

PEKU PILIMBO i raitim

HAI Komisn bilong Britain i givim nau fri tok ples Yurop skul long ol manmeri husat i gat laik long lainim.

Olgeta tok ples pipel bai lainim em long French, Spanish, Itali, Germany, Rassia na English.

Dispela tokples skul i

stat tupela wik i go pinis na i wok long kamap long ples slip bilong British Hai Komisn long Toguaba Hill long Pot Mosbi.

Pablo bilong British Hai Komisn long Pot Mosbi i tok dispela em long makim Yuropien Yia ov Lengus (tokples) we i kamap tupela wik i go pinis.

Long dispela bung, ol i bin bungim olgeta samting bilong Yurop

na putim long so na askim ol manmeri long lukim.

Ol i larim i stap inap wanpela mun olgeta na taim ol pasim, ol i askim manmeri husat laik lainim tokples long kamap na lainim.

Pablo i tok dispela ol tok ples Yurop skul i go aut long olgeta manmeri insait long Pot Mosbi.

Husat i gat laik long go i ken kamap long

ples slip bilong British Hai Komisn olgeta moning na stap i go inap belo.

Dispela em gutpela sans bilong ol manmeri lainim tok ples bilong Yurop na i ken toktok wantaim ol narapela tang.

Em gutpela stret bilong ol yangpela husat laik skul o painim wok long Yurop.

NAC kamapim toksave bilong sik HIV/AIDS

NESENEL AIDS Kaunsel (NAC) i kamapim pinis ol tok lukaut long birua sik HIV/AIDS inap kamapim long PNG.

Ol toksave i kam aut pinis long redio, televisen na ol niuspepa. Ol bai putim ol kainkain sain na notis long ol pablik ples.

Ol dispela toksave bai tok lukaut long ol manmeri na ol manmeri i ken lukaut taim ol i slip raun o paul wantaim narapela man o meri.

Dairekta bilong NAC Dokta Clement Malau i go pas long kamapim dispela aweanes kempen bai ol manmeri i ken luksave na klia long birua sik AIDS.

NAC wantaim Helt Minista Tommt Tomscoll i bin opim na rausim ol toksave las wik long palamen haus.

Tude i gat klostu 4,000 manmeri long PNG i gat sik AIDS na inap i dai long ol yia i kam na wanwan de sampela 100 manmeri i kisim sik ya yet.

Ol opisal bilong NAC bai stap long wanwan provins long helpim na givim

aut ol dispela toksave long ol manmeri.

Sampela opisal bai wokabout raun long ol viles komuniti na givim skul long ol pipel wanem rot long bihainim na abrusim sik.

Dokta Malau i tok olsem hevi bilong HIV/AIDS i bikpela na sapos ol manmeri i no klia, dispela inap kilim ol. Toksave inap givim gutpela save long ol manmeri na ol bai lukautim ol yet long birua bilong AIDS.

Sapot mani bilong dispela program i kam long AusAID, UNDP, Yuropien Yunien na Nesenel Helt Dipatmen.

Dispela toksave kempen inap sevbm laip bilong planti manmeri. Ol manmeri i no klia long birua bilong sik na i save paul raun nating tumas.

Planti hap long kantri olsem Afrika, nau ol pipel i save dai olsem ol binatang bikos nogat gutpela toksave program i bin kamap.

PNG i kisim gutpela sapot mani na ol pipel i ken luksave birua na bihainim.

Raihu Helt Wokas i go aut long ol ples

JACKLEEN TILI i raitim

OL studen bilong Raihu Komyuniti Helt Wokas Koles long Aitape, Sandaun provins i go aut pinis long 4-pela wok trening. Mak olsem 30 studen olgeta husat i skul tupela krismas olgeta long hap i bin go aut long wanwan helt senta na helt sab senta long nambis na ol bus ples long Aitape.

Foapela studen i go long Lumi Helt Senta, tripela i go long Ningil Helt Sab Senta, tripela i go long Wasisi Helt Sab Senta, tupela i go long Nuku Helt Senta, tripela i go long Wati Helt senta, 4-pela long Seim Helt Senta, 4-pela long Kafle Helt Sab Senta, tupela long Pes, tupela long Pokamo na 4-pela long Ulau.

Ol studen bai wok 8-pela wik long ol helt senta na sab senta na bihain 8-pela wik long ol

ol Ed Pos insait long ol asples.

Prinsipol bilong Raihu Komyuniti Helt Wokas Koles Mathias Yawur i tok ol studen i mas go wok long ol ples ed pos long kisim moa save long wok wantaim ol pipel long komyuniti. Em i tok tu olsem em i askim ol komyuniti na ol paris long kisim ol studen i go long ol na wok gut wantaim ol.

Ol studen bai go bek long skul long Desemba 20, 2001.

Givim takis kredit skim mani long kaunsel

BIKPELA mani bilong takis kredit skim i lus nating na nogat sevis kamap long ol pipel.

Kampani na gavman mas givim mani stret long wanwan kaunselai bai ol i ken givim sevis long ol manmeri stret.

Andrew Wabiria, wanpela lida man bilong Tari na olpela memba bilong palamen i tokim Wantok Niuspepa olsem ol memba i paulim mani.

Ol lokal level gavman bai givim sevis i go stret long pipel na ol kampani i noken givim mani i go long han bilong ol palamen memba husat save paulim mani planti taim.

"Mani i go long maus bilong sak taim ol givim stret long ol memba," em i tok.

Planti projek insait long eria bilong em i lukim paul pasin olsem na em i les

pinis na i laik bai ol pipel i ken lukim sampela bilong ol dispela mani.

Em i tok mani bilong olgeta pipel tasol wanpela o tupela tasol i save yusim ol mani na i no gutpela pasin.

Takis kredit skim em mani we i save kam long kampani olsem Chevron, Hides na Moro oil projek. Dispela mani bilong kamapim developmen projek long ol ples.

Mista Wabiria i askim: "Mi save olsem planti milien mani i kam long gavman tasol dispela mani i go we?"

"Nogat developmen plen na planti memba i paulim ol pipel pinis," em i tok.

Em i sutim tok long ol memba olsem ol i konman nating na i no save long kamapim developmen plen.

Passam Nesenel Hai Skul i op gen

HELEN REI i raitim

PASSAM Nesenel Hai Skul i op gen long las wik bihain long skul i bin pas long wanpela wik i go pinis.

Sekenderi Edukesen na Open Lening (SEOL) divisen bilong Edukesen Dipatmen i tokaut long dispela bihainim disisen bilong Bod ov Gavano disisen long mekimsave long ol studen husat i mekim trabel long skul.

Trabel i kamap bihainim bikpela kros pait namel long ol Sepik na Hailans studens we i bin stap longpela taim long skul.

Ripot i kamap olsem wanpela olpela studen husat i no bin kisim tokorait long mekim tes bilong em i bin laitim paia long wanpela domitori. Tasol ol lain husat i bin stap na lukim i sevim dispela domitori na paia i no bagarapim olgeta.

SEOL divisen i tokaut olsem ol i luksave na kisim pinis nem bilong ol studen husat i stap long dispela trabel olsem na bai ol i kisim sampela mekimsave long dispela. Ol i no tokaut long ol nem.

Seketeri bilong Edukesen Peter Baki i tok amamas long Passam Nesenel Hai Skul

Gavening Kaunsel long gutpela wok ol i bin mekim long bungim ol tingting gen long larim Passam i op gen long ol studen i go bek long skul.

Mista Baki i salim pas i go long siameri bilong skul, Laura Martin long larim skul i op gen na larim ol studen i go bek long skul long pinisim edukesen bilong ol.

Em i tok ol trabel studen we skul i luksave pinis long ol bai i kisim mekim save bihainim ol lo bilong skul.

Mista Baki i askim ol studen husat i laik lusim skul long lusim skul isi tasol long laik bilong ol wanwan na go aut.

KLIARENUS!

YANMAR

OLGETA DIESEL ENGIN

OLGETA YANMAR DIESEL ENGIN I STAP LONG SALIM HARIAP NAU. SALIM LONG LENDED PRAIS **K1.00 ONLY**. DISPELA OFA BAI RON TAIM OL STOK I STAP YET. HARIAP! NOKEN ABRUSIM. LUKIM OL GUTPELA WOKMAN BILONG MIPELA LONG DISPELA SPESOL OFA LONG OLGETA HAP LONG ELA MOTORS PNG.

Olgeta Samtin i Mas iGo!



Ela Motors YANMAR

Wanpela Taim Tasol...Ino Inap Kamap Gen.

PORT MORESBY PH 3229400 LAE 4722322
KOKOPO 9829100 MADANG 8622188 GOROKA 7321844
MT HAGEN 5421888 WEWAK 8562255 KAVIENGA 9842768
KIMBE 9835155 TABUBIL 5489060 VANIMO 8571254
PORGERA 5479367 BUKA 9739915 LIHIR 9864089
ALOTAU 9410100 VISIT OUR WEBSITE - <http://www.ela-motors.com.pg>

Riviu long sekendari skul rifom

WANPELA wokpainimaut gen i kamap long Dipatmen ov Edukesen sekendari divisen long mekim sampela senis long ol sekendari kurikulum na mekim em i go stret wantaim ol edukesen rifom insait long kantri.

Bihain long ol i mekim dispela stadi o wokpainimaut bai ol i mekim wanpela ripot i go long Bod ov Stadies (BOS) long ol i ken wok long mekim ol senis long ol sekendari skul kurikulum.

Ol lain long divisen i gat bikpela tingting stretim ol buk bilong lainim ol studen, ol tisa risos buk na ol narapela samting we bai helpim ol skul na dispela ol samting bai redi long 2004.

Sekretari bilong Edukesen

Peter Baki i tok ol kurikulum bilong olgeta skul i mas makim stret ol edukesen rifom we i gutpela long kantri na ol studen tu.

Em i tok sampela sekendari skul tisa i wok long yusim yet ol olupela buk long lainim ol studen na i gat bikpela nid i stap long senisim ol dispela buk na mekim ol nupela long helpim ol tisa long lainim ol studen.

Mista Baki i tok i nogat klia rot we i soim ol sekendari studen olsem ol i gat sans long painim wok o go yet long bikpela ol skul.


Em i tok sekendari skul em wanpela sistem bilong em yet we i lainim ol studen long kisim gut save na go moa long bikpela

skul na mekim trening, painim na kamapim wok bilong ol yet o nogat bai ol i mas go bek long viles.


Tasol ol gutpela samting bai kamap sapos i gat gutpela lidasip na ol risos long sapatim ol studen na edukesen rifom.

Na tu sapos ol skul i stap long gutpela ples we ol studen i no painim hevi long go long skul bai i gat gutpela sain i kamap long we bilong ol sekendari skul i ran gut.

Mista Baki i tok i tisa na het-masta i gat bikpela samting long mekim tu na ol i mas soim olsem ol inap long mekim wok gut na ol i mas sapatim ol rifom wok na edukesen bilong ol studen bilong ol.



Glasim gut! • Ol manmeri pikinini lukluk long ol piksa na ol arapela samting British Hai Komisn i putim long Pot Mosbi Nesenel Pablik Laibreri.



EUROPEAN UNION OVERSEAS POST GRADUATE SCHOLARSHIPS 2002

The European Union (EU), through the Human Resource Development Programme, finances scholarships for Papua New Guineans for postgraduate study in any of the fifteen member states of the European Union or in an African, Caribbean or Pacific (ACP) state that is a signatory to the Lome IV Convention (such as Fiji, Botswana, Mauritius or Jamaica).

Some 20 such scholarships (preferably 10 each from the public and private sector; preferably for 10 males and 10 females) will be awarded for courses commencing during 2002. Applicants should normally be under 40 and the scholarship programme is for postgraduate studies lasting up to a maximum of two years.

Scholarship applications are now invited. Women are especially invited to apply; companies and departments are called upon to put forward as many female and male candidates.

Interested persons or their employers should obtain the Expression of Interest and One-Page Statement Forms from:

**Mrs. Vienna Alewa, HRDP II-PIU
Department of Education
5th Floor, FinCorp Haus, Waigani**

**Telephone: 301 3574
Facsimile: 301 3468
e-mail: Vienna_Alewa@education.gov.pg**

to whom the completed forms should be returned by 31 January 2002.

Edukesen dipatmen na saplai kampani go long kot

HELEN REI i raitim

KOT namel long Dipatmen ov Edukesen (DOE) na skul saplai kampani PNG Stationary na Office Supplies (PNGS&OS) i bin kamap long dispela wik.

Nesenel kot long Waigani i bin rausim dispela kes namel long DOE na Olympic Stationary bikos ol i bai stretim dispela toktok long abitresen.

Nesenel kot jas Mark Sevua i tok ananit long kontrak namel long Olympic Stesenari na DOE i gat we bilong stretim dispela toktok arasait long kot na dispela em i laikim gutpela pati i mas mekim. Tasol kes i go long kot long Februari las yia na long namba tu taim gen long las wik.

Namba tu as jas i rausim dispela kes em bikos Olympic Stationary i no givim toksave long DOE olsem em i kisim em i go long kot.

Lo i tokaut klia olsem sapos wanpela i laikim kisim stet i go long kot orait ol i mas bihainim ol rait we bilong kisim samting i go long kot na taim ol i no mekim olsem na hariap i go long kot bai i gat hevi bikos ol i no bihainim lo.

Olympic Stationary i no bin mekim olsem.

Olympic Stationary i bin winim kontrak long givimaut ol skul saplai long Momase, Niugini Ailans na Hailans rjen na mak bilong dispela kontrak em K2.8 milien.

Kontrak i tokaut klia olsem bai kampani i mas givim ol skul saplai i go stret long olgeta skul tasol ol i no bin sainim kontrak na givimaut ol saplai na pinisim hap kontrak wok tasol ol i no pinisim na ol i askim long narapela K1.5 milien gen antap long K2.4 milien.

Kampani i ting olsem em bai kisim planti mani tumas long go stret long ol skul long givim ol saplai bilong ol.

Tisa mas helpim rifom

K A R I K U L A M Dvelopmen Divisen bilong Edukesen Dipatmen i mekim sampela wok long senisim ol kurikulum bilong ol elementri skul tisa.

Wanpela grup bilong dipatmen i bin go raun long kantri long mekim wok painimaut long ol skul insait long kantri long las wik.

Ol i toktok wantaim ol elementri skul tisa long kisim tingting bilong ol long wanem kain senis ol i laikim bai kamap long ol buk ol i save yusim long lain ol pikinini long elementri skul.

Karikulum opisa Jaking Marimyas i tok ol kurikulum i bin kamap long 1998 taim edukesen rifom i bin stat na dispela em i pestaim bai ol i mekim riviu long kurikulum.

Mis Marimyas i tok ol i makim wanwan ol elementri skul tisa long olgeta skul husat i ken

toktok strong na tokaut long ol tingting bilong ol we ol i laikim senis i ken kamap long ol kurikulum.

"Mipela i laikim olsem ol tisa i mas toktok wantaim mipela long wanem kain senis ol i laikim long kamap olsem bai ol i gat gutpela save long lain ol pikinini," em i tok.

Ananit long 1998 edukesen rifom olgeta elementri prep, gret wan na tu i save lainim samting long tokples bilong ol.

Em i tok ol tisa na komyuniti i mas wok strong long helpim wok bilong edukesen rifom long olgeta hap long kantri.

Mis Marimyas i tok ol komyuniti i save wok gut long givim graun, mekim ol bilding

na givim ol tisa olsem na komyuniti sapat em i bikpela samting long edukesen rifom.

AIDS - Bikpela birua namel long yumi

SIK AIDS i kamap bikpela tru long wanwan komyuniti bilong yumi. Wanwan yia planti manmeri lusim laip bilong ol long dispela sik.

Tasol planti manmeri i bilip strong olsem em bai i no inap kamap long ol. Ol i ting olsem em sik bilong narapela manmeri. Ol yet i nogat tasol dispela kain tingting bai bringim dai bilong yu yet.

Namba bilong ol manmeri wantaim HIV/AIDS tude i bikpela tru (3901 manmeri olgeta). Long ol dispela sampela i dai pinis na sampela bai dai klostu. Planti arapela i gat sik tasol i no save yet.

Helt Dipatmen long kantri i makim olsem namel long 13,000 i go long 15,000 manmeri i mas gat sik. Dispela 3,901 manmeri husat ol save i bin kamap long ol haus sik na helt senta. Ol i sekim blut bilong ol na luksave olsem ol i gat sik nogut.

Tasol tingim, Papua Niugini i nogat gutpela haus sik o masin bilong sekim gut husat gat sik na husat nogat. Ol manmeri bilong ples husat gat sik tasol nogat sans long sekim, ating namba bilong ol i winim tru i go antap.

YU kirap na tok yu bai i no kisim sik tasol hau yu save. I no longtaim i go pinis yu bin silip wantaim wanpela man o meri husat i no poroman bilong yu stret. Traim tingim sapos yu bin pamuk. Traim tingim sapos yu bin kisim blut long haus sik taim yu sik. Traim tingim sapos yu bin yusim nidel bilong paitim mak (tatu) long bodi.

Las wik Nesene AIDS Kaunsel (NAC) i statim wanpela bikpela kempen bilong toksave long ol manmeri long birua we inap bagarap yangpela kantri bilong yumi.

NAC bai putim toksave long radio, niuspepa, televisen, liklik buklet, piksa na tok long pablik ples, antap long bas na ples balus na wanem hap kona ol pablik i ken lukim. Ol dispela toksave i kamap bikos gavman i wari olsem planti manmeri inap dai.

Ol yangpela manmeri namel long krismas bilong 15 i go long 40 i stap long bikpela birua tru.

Planti bilong ol lain husat kisim sik AIDS tude i stap long dispela krismas grup. Sapos yu wanpela manmeri husat i no save lukautim raun bilong yu i mas lukaut. Planti milien manmeri i dai pinis long ol kantri long Afrika, Amerika, Yurop, Esia, pasifik na planti pikinini bilong ol i nogat papamama. Gavman bai westim

WANTOK

NIUSPEPA BILONG YUMI OL PAPA NIUGINI STRET

planti mani long lukatim ol manmeri. Seketeri bilong Helt Dokta Puka Temu i bin tok olsem Gavman bai lusim olsem K1.2 milien olgeta yia long lukautim ol manmeri wantaim AIDS long ol haus sik bilong yumi.

Long wankain taim olgeta haus sik bai pulap tru long ol sik manmeri. Nogat manmeri bai stap bilong kamapim wok na bringim developmen i kam bikos olgeta bai sik nogut na dai klostu klostu.

Dairekta bilong NAC i bin kamapim sampela toksave long radio, televisen na niuspepa pinis. Tasol planti manmeri i kros liklik bikos ting tok nogut i stap long tok save. Ol i tok i no gutpela long ol pikinini na Kristen manmeri lukim.

Tasol ol dispela pipel i no luksave olsem birua i bikpela tru. Ol i no sori long planti manmeri husat stap wantaim sik AIDS nau. Sapos pikinini bilong ol i no lainim wanpela samting, bihain em kamap bikpela bai inap painim birua. Ol kristen bai soim pasin bilong ol taim ol manmeri stat dai long laik.

Sapos nogat manmeri toksave long birua, husat bai mekim. Ol manmeri i ken tok em nogut o gutpela tasol bikpela samting, toktok em antap. laip em bikpela samting. Sapos yumi no toksave long wanpela, dispela em wankain olsem yumi kilim ol.

Kantri bilong yumi nogat planti manmeri bilong rit na rait. Yumi gat planti tok ples na i hat long toksave long olgeta manmeri tasol ating wok bilong NAC long kamapim kempen olsem i gutpela. NAC i sanapim wanwan opis long olgeta provins na ol dispela opis bai givim aut toksave na traime lukautim ol manmeri wantaim sik.

Sapos yu save long rit, orait tokim poroman bilong yu husat i no save olsem i gat birua olsem i kamap bikpela. Sapos wantok bilong yu i no save long tok Inglis o Pisin, tanim long tok ples olsem yu inap dai sapos yu no lukautim yu yet.


Birua i no kauntim yu husat. Yu liklik o bikpela. Yu Kritsen o yu man nating. Pikinini o lapun. Olgeta manmeri i stap long bikpela birua. NAC i kamap wantaim gutpela kempen na yumi olgeta i mas sapos

tim na helpim long daunim birua bilong HIV/AIDS. Sapos yu ting em sik bilong narapela, mi nogat. Sori long kain tingting bilong yu. I no long taim bai yu lukim brata o wanpela lewa bilong yu stret i dai. Dispela taim bai yu let pinis.

Em i gutpela sapos

yumi olgeta sanap wantaim na pait egensim dispela birua. Birua i no kaunim yu bilong nambis, ailan, maunten, tais wara, hul bilong ston o wanem hap yu kam. Em bai kilim yu tu.

Helpim long surikim toksave olsem birua i stap na i wok long kamap bikpela wanwan de. Yu mas save olsem insait long PNG, olgeta mun 100 manmeri i wok long kisim AIDS. Abrus long neks mun yu bai wanpela, lukaut na yu raun.



• Bikpela kempen nau i kamap long traime daunim dispela sik nogut.

ANGLICAN CHURCH OF PAPUA NEW GUINEA

ANGLICAN HEALTH SERVICE - NATIONAL HEADQUARTERS

Tel: (675) 329 7405

Fax: (675) 329 7889

e-mail: ahsppop@global.net.pg

P.O. Box 245

POPONDETTA, Oro Province

Papua New Guinea

Job Vacancies

1. Church Health Secretary Highlands Region

Responsibility for 1 HC, 3 HSCs, 1 AP. and 23 staff. Based at Koinambe, Jimi District, Western Highlands to regularly visit each centre; to monitor service; guide staff; liaise with communities and support VBA and VHA programmes.

Applicants must have 2 years experience as OIC or equivalent; excellent financial management and interpersonal skills; enthusiastic and innovative approach to improving the health of people living in isolated communities.

2. Principal

3. Tutor

St Margaret's School of Nursing, Popondetta, Oro Province

Responsibility for management and development of the only CHW training school in Oro Province with 43 students and 4 staff.

Applicants should be energetic and enthusiastic about the role of CHWs in the improvement of health in rural communities, 2 years Tutor experience and teaching qualification.

4. Projects Officer

Popondetta, Oro Province

To work with the Church Health Secretary in the management of the service and in developing, implementing and monitoring innovative approaches to improving the health of rural communities. Must have good admin skills and be able to travel. Requires Registered HEO and Registered Nurse.

Further information from Peter Rookes, National Health Secretary, Anglican Health Service, P O Box 245, Popondetta, Oro Province. Fax: 329 7889, Phone 329 7405.

Enclose your contact fax/phone number.

Ol provins bung long kamapim rijinol plen bilong wok didiman

DIPATMEN bilong Agrikalsa na Laivstok (DAL) i holim bung bilong kisim save long wanem wok ol wanwan provins i mekim long wok agrikalsa na didiman bihainim program bilong ol yet. Dispela bung tu i opim rot long olgeta provins i bungim save na tingting bilong oil wantaim lng kamapim wanpela bikpela plen bilong wanwan rijon i karimaut.

Dispela bung i bin kamap long Lae insait long DAL Laivstok InSevis Trening Senta we ol opisa bilong Nesenel Agrikalsa Rises Institut na Nesenel Agrikalsa Kwarantn na Insepsen Atoriti i stap insait tu.

Tupela man i go pas long dispela bung, Bill Bakau na Masayan Moat

i tokaut olsem dispela bung i bin kamap long traime stretim rot bilong laivstok wokso bai kamap bihain long traime stretim ol rot na hevi i sut long wok bilong laivstok o didiman insait long wanwan provins na wanem samting ol i ken mekim long apim level bilong wok didiman i go antap.

Tupela i tok sampela gutpela samting inap kamap long dispela bung em long kamapim rijinol kontrak na komyunikesen na tu wantaim nesenel DAL na ol opis we i wok wantaim ol. Dispela tu em bilong kamapim gutpela wok bilong mekim baset, mekim plen, ol wok bilong lukautim wok na was gut long wok na mekim wok bihainim plen.

Dokta Bakau husat em edvaisa bilong DAL Ailan rijon na Mista Moat husat em DAL edvaisa bilong Noten Rijon i tokaut moa olsem ol provins i mas kamapim moa gutpela developmen program bilong wok didiman we ol pipel inap painim gutpela helpim insait.

Tupela i tok tude em ol pipel i mas kisim save long wok fama stret we inap pulim mani i kam na ol fama i ken kisim. Sapos wanpela gutpela wok bilong lukautim meme i kamap we i gat 50 meme long banis, orait dispela em mak tru bilong strongim na sapatim dispela wok i go moa. Sapos namba bilong ol meme i aninit long dispela kain namba, orait em bilong lukautim arere long haus o wok bilong

mekim bikos long laik tasol.

Dispela bung i pinis tasol ol saveman bilong dipatmen bai bungim olgeta toktok na ripot i kamap long dispela bung long kamapim wanpela bikpela rijinol plen we olgeta provins i ken kam aninit bihainim rijon ol i stap long en. Na dispela em bai kamap olsem Nesenel Agrikalsa Developmen Streteji Horijon 2002 inap 2012.

Insait long dispela bung wanwan provins i soim ol ripot na wok bilong ol insait long wok didiman long sait bilong DAL, NAQIA na NARI. Ol i lukluk insait tu long ol sampela projek we i kamap pinis olsem long Gere sipsip projek long Simbu provins.

Long pinis bilong bung, wanwan

rijon i tokaut long plen bilong wok didiman ol i gat long kamapim. Noten rijon i tok ol bai wok strong i go insait long wok bilong meme na rebit. Ailan rijon i tok long banis kakaruk, pik na kau. Hailans rijon i tok long wok bilong lukautim pis, sipsip na meme na kakaruk. Sauten rijon i tok long kau, sipsip na pik.

Dokta Bakau i tokaut long pinis bilong bung olsem olgeta rijon i mas sanap strong na wok bihainim plen bilong ol na kamapim wok ol i sanap long en.

Em i tokim ol tu long stretim gut ol ripot na rekot i stap gut bai dispela i ken helpim ol long wok bilong mekim gut plen long ol wok bilong didiman.

Ramu Nikel na Hidden Veli pipel wok bung

EKTING Provinsal Edministreta bilong Madang Galun Kassas i tokim ol papagraun bilong Nakuni long Hidden Valley gol projek long Morobe provins olsem em i bilip ol i lainim planti samting pinis long dispela edukesen raun bilong ol i go lukim wanem samting Madang i mekim pinis long redim em yet long dispela Ramu Nikel Kobal maining projek.

Em i mekim dispela toktok long Tunde nait long wanpela bung kaikai bilong ol Nakuni papagraun na ol narpela deligesen bilong Morobe Provinsal Gavman na tu ol Morobe Gold lain.

Mista Kassas i tok em i bilip olsem dispela wokabaut bilong ol i kam long Madang em gutpela long wanem ol i lainim planti

samting pinis na taim ol i go bek bai ol i traime yusim sampela ol samting ol i lainim pinis.

Em i tok sapos ol i gat hevi ol i mas stretim ol toktok bilong ol long gutpela pasin na yusim ol sampela gutpela rot long stretim.

Em i tok sapos ol i nidim sampela ol helpim long bihainim taim ol i ken askim ol lain bilong mipela long Madang olsem Highlands Pacific, Madang Provinsal Gavman na ol dispela eksekutiv bilong papagraun long helpim ol.

Mista Kassas i tok long Madang mipela olgeta i save wok bung gut tru wantaim olsem na ol lain long Wau tu i ken mekim wankain long hap bilong ol.

Rex Mari, siaman bilong Hidden Valley wantaim Peter Bernard i tok ol i lainim planti samting tru na ol i amamas tru

long dispela wokabaut bilong ol i go long Madang.

Bikos long dispela Mista Mari i askim ol lain bilong Madang long mekim wanpela lukluk raun bilong ol i go long wau na lukim dispela nupela projek long hap. Na em i laikim olsem dispela kain wok poroman i mas stap olgeta taim.

Tupela i tok tenkyu tru long Madang Provinsal Gavman long redim ol dispela kaikai we ol i tok ol i no inap bilip bai kain samting olsem i kamap long raun bilong ol.

Long wanem em i tok olsem Ramu Nikel Projek na Hidden Valley gol bai holim mani paus bilong Papua Niugini long bihain, taim OK Tedi na sampela bikpela maining insait long Papua Niugini i pas.



Diwai Bisnis • Planim pikinini diwai na salim em wanpela gutpela bisnis bilong ol grasruts long ples i ken mekim. PNG Fores i save kism ol dispela pikinini diwai na planim gen bilong kamapim moa timba o bilong kirapim bek bikbus.

PNG inap kamapim bikpela mani long meme

PAPUA Niugini i ken mekim moa long K30 milien long mit bilong meme na K3 milien long skin bilong meme, Presiden bilong PNG Society of Animal Production (PNGSAP) Dokta Bill Bakau i tokaut long dispela.

Dokta Bakau i tok dispela eria bilong salim mit na skin bilong meme i ken pulim gut mani we ol ples lain i ken mekim.

Em i bin mekim dispela toktok long bung bilong PNGSAP wokso long Lae long ol wok bilong pulim na kirapim moa wok bilong yusim meme long salim ol mit na susu.

Dokta Bakau i tok wok bilong kamapim moa mit na salim em bikpela tingting na wok bilong kirapim PNG long dispela sait bilong mit bisnis. Em i tok i gat bikpela sans bilong PNG long kamapim bikpela bisnis long meme.

Em i tok strong long oil memba bilong PNGSAP long mekim gut wok bilong ol olgeta taim. PNGSAP i bin stat long Epril 1987 we ol sampela lain laivstok opisa i statim.

Insait long planti rot, dispela sosaiti i wok long kamap



We bilong wasim saksak • Waitman ya wantaim planti ovasis lain na ol PNG yet i agris long lukim meri Kerema i wasim saksak long Kerema stail stret. Planti turis i save laik lukim kain PNG stail olsem.



BENK BILONG PAPUA NIUGINI

PRES RILIS

KINA FESILITI REIT BILONG OKTOBA 2001

Gavana bilong Benk bilong Papua Niugini i tokaut olsem Kina Fesiliti Reit bilong dispela mun Oktoba 2001 bai i no inap senis. Em bai stap yet long 12.00 pesen.

**L. Wilson Kamit, CBE
Governor**

Nogat pret



• Meri sanap long kokonas na narapela i tromoi ol naip long em. Em makim gut na abrusim. Em tromoi tripela pinis na laik tromoi narapela na redi i stap. Traim tingim, sapos abrus na pas long pes o bodi bilong em.

INAP tude, ol wok long rausim yet rabis na traim painim wanem samting i stap gut na wanem kain bagarap i stap yet.

Birua i kamap long New York siti i kilim manmeri inap long 6347 na 300 i lus yet. Dispela namba go wantaim ol manmeri

husat stap inait long Wol Tred Senta na ol manmeri husat i kam insait long tupela balus. Wapela balus i bin karim 29 manmeri na narapela balus 65.

Na balus we i go long opis bilong ami long Amerika, Pentagon i kilim 189

manmeri. Dispela namba em 64 pipel husat i stap insait olsem pasindia.

Namba foa balus we i no bagarap tasol go pundaun nating i kilim 44 manmeri olgeta. Dispela balus inap kamap long palamen bilong Amerika tasol ol pasindia i pait wan-

taim ol teroris husat kisim balus.

Bodi na wanem samting i stap aninit long Wol Tred Senta em ol i sekim yet. Haus i bikpela tru. Sapos yu bin sanap antap long haus, yu lukluk i go daun na yu inap lukim ol klaut flai daunbilo.

Insurens kampani kisim taim

OLGETA bikpela nem insurens kampani kisim taim na bisnis bilong ol inap bruk daun.

Wapela ripot i tok planti manmeri husat i gat sia wantaim ol insurens kampani i

rausim mani bilong ol pinis.

Ol kampani na wanem samting i bagarap insait long hevi we kamap long Septemba 11, 2001 i pre-tim planti insurens kampani.

Ol kampani bai peim bikpela mani tru long amas laip lus, wanem samting i bruk bagarap na wanem liklik kampani i gat insurens wantaim ol bikpela insurens kampani bai kisim bagarap.

Namba wan birua bilong Amerika: Osama bin Laden

AMERIKA tok em bai givim US\$25 milien (moa long K75 milien) na askim ol man long kisim Osama kam givim o kilim i dai.

Osama i stap tasol nogat man save wanem hap stret insait long Afgahnistan em i stap long em.

Sapos em yusim telepon, ol man bai painim aut wanem hap em i stap. Sapos em salim email (pas long komyuta), ol bai painim aut yet na em i no toktok.

Ripot i save olsem Osama i stap na raun olsem wapela man Pakistan wantaim longpela maus gras na klos pasim het.


Wanem photo yumi lukim nau em ol i bin kisim long 1997 na dispela em longpela taim. Ol man i no klia wanem akin man em i stap tude.

Pasin kastom bilong givim mani long kilim man i bin kamap long taim ol kauboi i ronim kantri olsem Amerika.

Ol bikman long wanwan komyuniti i sav eputim mani n askim ol kauboi long kilim man na dispela em wankain pasin Amerika i mekim.

Amerika i ken tok em i gat kainkain setlait masin tasol em painim hat tru. Osama bin Laden i stap hait gut

REWARD
\$ 25 Millions



For any kind of information about this man

OSAMA BIN LADEN

Contact The U.S. State Department

• Amerika laikim het bilong dispela man (Osama bin Laden) na em i putim bikpela mani olsem prais bilong man husat kilim em.

bikos em i tok strong olsem em i no kamapim birua long Amerika.

- The weekend Australian

Hevi long Moslem ol kantri no kamap klia

AMI bilong Amerika wantaim ami bilong narapela kantri long Yurop bin kilim planti manmeri bilong Moslem tasol nogat wapela i sutim tok long dispela asua.

Olgeta taim niuspepa na radio bilong ol wait manmeri singaut bikmaus na sutim toktok long ol Moslem tasol.

Olgeta pipel bilong Moslem long kantri olsem Irak, Iran, Afghanistan, Saudi Arabia, Kuwait na planti liklik Arab ples i sutim tok na belhat olsem taim hevi na birua kamap ong pipel bilong ol, nogat wapela man i sutim tok na kirap raun.

Ol i tok ol i no klia long wapela samting tasol hariap Amerika na narapela kantri i sutim tok olsem ol asua.

Tasol nogat man i luksave o i gat

ol samting bilong soim olsem ol i bin stap insait long kamapim birua long Amerika.

Ol pipel i tok sapos Amerika i laik kam wantaim ol bikpela gan, ol i tok ol i redi tasol long pait wantam wanem samting ol i gat.

Ol lain i tok aut olsem olgeta taim wapela liklik samting kamap long ol Amerika na Yurop, ol kirap kraik bikmaus nogut olsem ol i kisim bagarap.

Olgeta mani, pawa, na samting bilong toksave olsem radio, televisen na niuspepa i stap long han bilong ol wait manmeri.

Ol isi tasol kamapim bikpela nisu na taim bikpela hevi na bagarap kamap long ol blek manmeri na Moslem, ol i no mekim wapela samting.



I no olgeta hap long graun i orait • Ol dispela mama bilong Sentrel Afrika. Taim bilong pait i save kamap namel long ol man. Meri pikinini na mama i save kisim taim stret. Hia wapela mama i painim hevi na tupela narapela i karim em. Foto: Refugees.

YUMIFM

NATIONAL WEEKLY HIT PARADE

October 06/09/2001

SPONSOR: TRADEWINDS

| WB | LW | T/W | SONG | ARTIST |
|----|----|-------|----------------|-----------------|
| 2 | 1 | 1 | SINE | DEMAS SAUL |
| | 1 | 2 | OULAMAGI | DEMAS SAUL |
| | 3 | 3 | TALAIKU | QUAKES |
| | 4 | 4 | NGAU MALABONG | QUAKES |
| | 7 | 5 | JABON IBALA | STRUGGLERS BAND |
| | 0 | 13 | KEKENI KEKENI | KRYMUS II |
| | 8 | 8 | SORI VADA LASI | DEMAS SAUL |
| | 0 | 14 | TINGANA VUDU | PAINIM WOK |
| | 5 | 6 | COME BACK | ANSLOM |
| | 9 | 9 | NONGA BASE | ANSLOM |
| | 0 | 15 | JESTY MORI | FEKE YUTZ |
| | 10 | 10 | EDA LOA | LISTA SERUM |
| | 11 | 11 | PONDOPONDO | FELIX YAUSI |
| | 6 | 7 | CROCOMATO | K2 BIS BAND |
| | 12 | 12 | UKA BAI TEKE | ANSLOM |
| | 15 | 16 | WOPA KANTRI | K-DUMEN |
| 14 | 17 | 17 | ELISON | KABU RITA |
| 18 | 18 | 18(4) | HAT WOK NATING | LISTA SERUM |
| 17 | 19 | 19 | SHANNA | PATTI DOI |
| 20 | 20 | 20(4) | SINAGU LAU | DEMAS SAUL |

IN NIL

OUT NIL

SOURCES: YUMI BELO SHOW
LAIK BILONG ANKOL E.T
COCA COLA GARAMUT
FLAME CULTURE & PHONE ENQUIRES



Israel na Palestain kamapim wanbel

BIHAIN long 12 mun na planti laip i lus nau Israel wantaim Palestain malo lo long pait na traim kamapim bel isi pasin.

Foren Minista bilong Israel Shimon Peres na Presiden bilong Paletain Liberesen Ogenaisesen Yaser Arafat i bung las wik Trinde long pasim tok bilong lusim pait n akamapim bel isi.

Tasol planti pipel bilong tupela sait wantaim i no wanbel long

dispela tingting bilong tupela man.

Planti Israel na Palestain manmeri i lusim mama, papa, brata, susa o narapela lewa bilong ol long hevi na i no laikim bel isi i kamap.

Planti i bilip olsem wanem hevi i kamap long Amerika i mekim na ol pipel i tingting tupela na laik kamapim bel isi.

The Weekend Australia



• Ol man Israel i wokabut long fran bilong wanpela piksa bilong Yaser Arafat. Ol i raitm tok long wal olsem "Arafat i man bilong kilim man."

Banana bilong Taiwan

• Groim banana na salim long Taiwan em gutpela bisnis tru. Lukim meri hia wantaim bikpela banana em groim. I gat banana plentessen bilong em yet na em save kisim banana bilong salim.

Free China Review



Yangpela pait man • Trabel long ples na ol dispela kain yangpela man i save pait wantaim bikpela brata na papa bilong ol. Ol liklik tumas na i nogat rait long pait tasol ol bikpela save pretim ol na subim ol long pait. Hia ol holim gan na bom i stap. Ol poto: Refugee.



Nogat famili bilong ol • Ol dispela kain yangpela meri i save kisim bagarap taim pait i kirap na ami bagarapim ples. Planti susa na mama bilong ol i stap long han bilong ol birua na ol i mekim pasin nogut long ol.

Planti hap long graun bagarap

YUMI sindaun na kaikai, slip na stap wantaim famili bilong yumi gut tru tasol dispela kain pasin i no save kamap wantaim narapela kantri.

Pait, kros na birua i save bagarapim planti famili. Mama dai, papa save dai o bikpela brata na susa i save lus.

Planti pait na trabel i save bagarapim tru ol yangpela pikinini. Ol i nogat wanpela asua na i noi tingting long pait tu. Ol i stap aninit long lukaut bilong narapela.

Planti manmeri i no lukluk long ol pikinini na bagarap ol i save kisim bikos ol i no wari tasol wanwan dei sam-

pela pikinini. Wanpela pikinini ami long Afrika i stori olsem: "Ol i bin givim trening long mi. Ol i givim gan long mi. Mi kisim marasin (drug). Mi kilim manmeri nating long laik. Planti manmeri tru.

"Em taim bilong pait na mi bin mekim ol dispela samting. Mi kisim

oda bilong mi. Mi luksave olsem dispela i no gutpela pasin tasol mi karim aut olgeta oda tasol."Em i no tingting bilong pait na mekim dispela ol pasin," em i bin stori.


Wankain stori olsem i kamap long ol ples olsem Fiji, Solomons, Midel Is na Afrika.



Planti pikinini i save kisim bagarap

• Kain yangpela pikinini olsem i no stap long klasrum. I no raun nating. em i karim gan, i no liklik pilai gan, samting tru bilong kilim man na raun pait we i no gutpela.

TOKSAVE I GO LONG OL LAE RIDA BILONG WANTOK!



1. MOBIL SERVICE STATION

2. BULAE NEWS - ANDERSON ERIKU


3. STC JV BEST BUY - TAUN

4. MELANESIAN HOTEL

5. FOODMART LIMITED - SEETO KUI

**Nau yu ken go long ol dispela hap long
painim Niuspepa bilong Yumi Stret,
WANTOK!**

**Na no ken lus tingting tu i gat strit sels long maket na arere
long stua long top taun eria...**



WANTOK

*Niuspepa
Bilong Yumi
Stret!*

Nambawan Forestri Trening Senta long Oomsis

Wanem as bilong dispela senta?

em I gutpela long kamapim namba wan komyuniti forestri trening senta long Oomsis. Na husat manmeri i bin stap longpela taim wantaim forestri industri bai sapatim tru tingting bilong PNGFA long sanapim trening senta long Oomsis. Oomsis em ples we namba timba kampani long kantri bin sanap long en. Bikpela siti bilong Lae i bin kamap bikpela long timba saplai ol i kisim i kam long Oomsis long 1950s. Oomsis i bin kamap olsem bes kemp bilong ol fores inspekta. Bihain em i kamap wanpela ples bilong groim ol pikinini diwai na i bin wok long givim ol yangpela diwai bilong planim long Huon Galf eria aninit long Dipatmen bilong Fores. Long 1978, olgeta samting bilong wantaim ol forestri opisa i go long han bilong Provinzel Gavman. Nogat mani i lukim stesen i bruk daun na bagarap inap las yia taim. PNGFA i tingting long tanim i go insait long long wanpela Komyuniti Trening Senta. Dispela trening senta i kamap bai givim trening long wanem rot ol papagraun i ken bihainim long lukautim fores na wankain taim tingim bihain menesim gut.

Forestri sekta long PNG i gat foapela bikpela grup wantaim sampela sia na i dispela ol lain em long Gavman aninit long PNG Fores Atoriti, ol NGO, ol papagraun na ol praivet bisnis grup, ol NGO i bin toktok strong na sapatim ol papagraun. Ol i laikim ol papagraun kisim gutpela bekim long risos bilong ol yet. PNGFA i kisim bikpela presa i kam long ol NGO na narapela helpim grup husat tok asua i stap long fores developmen plen i mas stretim pastaim. Planti wok painim i bin kamap wantaim mani ol helpim lain givim na wok i wankain olsem Fores Atoriti tasol PNGFA i no inap givim olgeta aninit long olsem fores polisi i tok.

Long dispela as em i gutpela long PNG Fores Atoriti i mas pilaim bikpela pat long wok klostu wantaim ol papagraun long sait bilong skulim gut wantaim skul. Wanpela bikpela hevi tru we stapim papagraun i olsem i bin nogat wanpela vokesenel skul bilong forestri

long lainim ol liklik samting bilong menesim diwai bikos planti skul bilong fores i skulim ol manmeri long teknikel sait tasol na nau kamap bilong Oomsis i pulumapim stret dispela spes bilong helpim ol papagraun. Ol bikpela trening skul i ken givim sampela helpim long ol manmeri bilong ples, em i no save helpim olgeta manmeri bilong viles.

Wantaim dispela tingting PNGFA i sanapim dispela vokesenel trening senta bilong skulim ol papagraun stret. Oomsis Trening Senta i pulumapim stret dispela spes. Skul i stap namel long gutpela hap bilong Lae, we inap daunim kos bilong ka, balus na sip taim ol manmeri bilong narapela hap long kantri i kam na tu stap klostu long bikpela ol skul bilong forestri tu. Em i bikpela tingting tru bilong PNG Fores Atoriti long go pas long sait bilong ol papagraun long sait bilong givim skul ol na sanapim skul olsem kain. Planti vles manmeri save painim hat taim stret bikos ol bikpela skul i lainim ol sumatin long teknikel sait na ol liklik vokesenel nogat bilong skulim ol papagraun.

Skul ya bai skulim ol manmeri long sait bilong kainkain forestri projek na wanem rot long yusim graun bilong ol. Oomsis skul bai skulim ol sumatin long eko forestri, fores menesmen eria, IGL trening, timba atoritis, wel laip

menesmen, lukautim buss graun na sait bilong kamapim bisnis wantaim risos bilong ol olsem papagraun.

Oomsis Trening Senta i pulumapim wanpela spes we i lep i stap. Oomsis i stap namel long, senta bilong Papua Niugini. Dispela bai daunim kos bilong ol manmeri long narapela hap bilong kantri laik kam skul long hap. Trening senta i stap klostu long sampela bikpela koles biloign tima olsem Bulolo Yunivesiti Koles, Yunivesiti bilong Teknoloji na Timba na Forestri Trening Koles.

I kam inap nau yumi gat 3-pela forestri trening skul husat save kisim bikpela namba bilong ol gret 10, 12 na narapela ol skul liva. yunivesiti bilon Teknoloji i save givim digri long forestri, Bulolo Yunivesiti Koles i givim diploma wantaim Lae Forestri Trening Koles olgeta i stap long Morobe Provins. Dispela ol bikpela skul i no save helpim turnas ol papagraun tasol i save helpim sampela liklik lain. PNGFA i bin gat dispela tingting na kamapim dispela vokesenel skul bilong helpim na trenim ol papagraun. Oomsis i pulumapim dispela spes na bai helpim ol papagraun. Oomsis Trenign Senta i stap klostu long ol bikpela skul long Lae na ol papagraun i ken kisim tu save long wanem narapela samting long sait bilong Fores.




Duke Joli sanap wantaim wanpela wanwok

Duke Joli

Em i no wanpela wokman tasol long Oomsis Komyuniti Fores Trening Senta o em i no wanpela nupela man long Forestri Industri. Em i gat save na wok olsem wanpela man bilong forestri inap 35 yia olgeta.

Dispela 59 krismas man em Duke Joli bilong Angoram insait long Is Sepik provins. Duke i bin stat wok wantaim pastaim Dipatmen bilong Fores long taim bilong ol waitman long 1959. Duke i bin stap wantaim meri Simbu bilong em long Kainantu insait long lsten Hailans we family bilong em wantaim ol i stap nau taim Forestri Atoriti i askim em long kam bek na wok bikos ol i no laikim save na wok bilong em insait long 35 yia i lus nating. Dispela papa bilong 6-pela pikinini i tok em i amamas long kam bek gen na mekim wok em i bin

mekim insait long olgeta laip bilong em. Insaiut long dispel 35 yia, em i bin stap insait long planim ol diwai plentesen long ples olsem Norikori na Nubia, tupela wantaim long lsten Hailans provins. He i bin raun planti hap insait long kantri na wok long kainkain projek. PNG Fores Atoriti i bin kisim em kam bek las yia long wok olsem supavaisa bilong neseri long Oomsis Trening Senta. Dispela hap nau i gat 2200 pikinini diwai i stap redi bilong planim. long wanpela man husat i no pinisim wanpela gutpela skul tasol Duke i save long gat moa save long wanem samting em mekim, nogat skul save i no wanpela wari. Duke bai wanpela man husat inap helpim ol papagraun long kisim gutpela trening long Oomsis Komyuniti Forestri Trening Senta.



Sampela wokman sanap long geit bilong trening senta.

PROGRAM

| Program wanem samting bai kamap | | tok |
|---|---|--|
| Openim - Oomsis Komyuniti Forestri Trening Senta | | |
| De: Fraide 5 Oktoba 2001 | | |
| 12.00 - 1.00PM | Pipel husat kisim invait na bikman bai kamap | 2:00 - 1.10PM Ol sumatin husat pin isim kos bai kisim setifiket. |
| 1.00 - 1.30PM | Ol sising grup bai welkamim ol bikman i go long gren sten. | 2.10 - 2.15PM Mausman bilong ol lain pinisim skul bai toktok. |
| 1.30 - 1.40PM | Menesing Daireka bilong Nesenel Fores Sevis - Mista Thomas Nen bai givim welkam toktok bilong em. | 2.15 - 2.30PM Deputi Praisim Minista na Minista bilong Fores Hon. Michael Ogio, CMB, CBE, MP bai pasim givim toktok na pasim olgeta. Bihain long dispela ol bai planim wanpela pikinini diwai long makim opim bilong trening senta. |
| 1.40 - 1.50PM | Siaman bilong Nesenel Fores Bod - Dokta Wari lamo bai givim toktok bilong em. | 2.30 - 5.00PM Malolo, kaikai na ol sising grup bai amamas ol manmeri. |
| 1.50 - 2.00PM | Gavana bilong Morobe Luther Wenge bai givim tok | Bihain long 6PM Pinis bilong program. |

TOK TENKIU

Menesmen na wok manmeri bilong PNG Fore Atoriti i laik tok bikpela amamas na tenk yu i go long ol kampani hia husat i givim bikpela helpim long mipela putim aut ol dispela stori bilong Oomsis Komyuniti Fores Trening Senta. Dispela Komyuniti Trening Senta i namba wankain olsem projek insait long kantri. Atoriti i ting olsem em i gutpela long luk-save na ol manmeri i mas save senta ya, tu bikos trening senta i bilong wanpela bikpela papa tru bilong Fores Industri long kantri, em ol papagraun.

Bill Naeman

1. Vanimo Forest Product Ltd
2. Canadian - PNG Hardwood
3. Cakara Alam (PNG) Pty Ltd
4. Madang Timbers Ltd



Oomsis Trening Senta



TOKTOK BILONG MENESING DAIREKTA

Mi gat bikipela amamas tru long toksave long olgeta manmeri husat gat sampela sia insait long Forestri wantaim olgeta papa bilong timba risos na ol ovasis lain long kamap bilong Oomsis Komyuniti Fores Trening Senta long Lae, Morobe Provins. Wanpela pikinini kaikai bilong bringim developmen long kantri, mipela planim. Dispela trening senta bai helpim planti papa bilong risos insait long Papua Niugini. Planti taim nau ol papa tru bilong graun na risos i sanap lukluk tasol i stap na olgeta kainkain developmen i kamap raun long ol. Planti bilong yumi wantaim sampela tok na save i no givim papagraun sans long lainim rot na pasin bilong

trening long ol Papua Niugini manmeri bai iol i ken wok wantaim gavman na praiwet sekta tu. Lae Timber ba Forestri Trening Koles i givim teknikel trening long ol man wok long fores industri. Kamampim bilong trening senta bai helpim PNG Nesanel Fores Atoriti long bungim olgeta tingting bilong ol papagraun na wanem driman ol i gat long stretim sampela polisi (ol wok long redim ol polisi nau) long:

1. Planim gen diwai long ples ol katim pinis
2. Liklik somil bai ol i kamapim aninit long Yuropien Yunien Mani husat laikim lukautim bilong bus na wara;
3. Liklik samting ol prodak fores inap kamapim na
4. Kamapim ol fektori

na planim nupela. Aninit long dispela sistem, ol papagraun i givim graun bilong ol i go long projek na projek i mas ron 35 yia tasol. Wanpela bikipela salens long luksave olsem dispela sistem i wok na i ken lukautim ol tumbuna pikinini long ol yia i kam em long larim ol papa bilong risos i kisim gutpela trening long Oomsis Trening Senta long kisim gutpela tingting long mekim ol dispela wok. Nau yet ol bikipela kampani bilong salim diwai i go ovasis i lukautim olgeta tim, ba industri, i gat sampela liklik na namel sais forestri bisnis we inap pilaim bikipela pat na ol papa bilong risos inap kisim gutpela trening long senta. Planim nupela diwai i gat bikipela sans long kamapim wok na bringim



Thomas Nen
Menejing dairekta
PNG Fores Atoriti

kamapim ples bilong dispela kain samting i ken kamap. Dispela bai wankain olsem sekyuriti bilong helpim ol papagraun, kain bisnis i kamap (bisnis grup o join bisnis wantaim papagraun), mani bai kam insait olsem wanem, takis amas na wanem rot bai lukautim ol papagraun na wanem bisnis i go wok long projek. Bai i gat gutpela lukluk tu long wanem samting gavman, praiwet sekta na ol papagraun long kamapim dispela kain industri. Mipela bai lukluk gut tru na traim kamapim fi long ol timba kampani na gavman ken yusim mani long kamapim timba plentesen. Bai mipela lukluk na

skelim gut dispela tingting pastaim. Mipela bilip olsem Oomsis Trening Senta bai mekim wankain wok na sapotim sampela trupela NGO grup husat traim lukautim timba risos bilong kantri. Mi save olsem ol NGO grup na timba kampani husat helpim long planim nupela diwai bai sapotim mi. Oomsis bai i no inap givim helpim na bekim hariap tasol planti kris-mas bhain bai yumi luksave long driman bilong yumi taim yumi lukim ol papagraun yet i kisim salens na planim nupela diwai. Ol papagraun yet bai mekim ol wok bhain long olgeta trening ol kisim long Oomsis Trening Senta. Dispela wik yumi long namba wan grup bilong sumaitn husat stap arere long dispela komyuniti i pinisim skul. Mipela bilip ol i laikim dispela trening na ating sampela i gat gutpela tingting long wanem samting ol i ken mekim. Larim dispela pikinini kaikai yumi planim gro bikipela na salensim ol narapela long sapotim ol dispela

namba wan sumatin. Ol tumbuna pikinini bilong yumi i ken kisim bekim long dispela namba wan "pikinini kaikai" bilong Forestri Developmen wantaim helpim bilong ol papagraun yet. Mi laik nau askim olgeta lokel level gavman, ol NGO, praiwet sekta, ol lokel memba bilong palamen na narapela wantaim sia long painim ol papagraun na stat salim ol long dispela trening senta. Wol Beng wnataim lukautim ol fores tingting bilong em bai sapotim tru dispela tingting. Mi laik kisim dispela sans long tok bikipela tenk yu i go long olgeta papagraun husat stap isi wantaim mi na olgeta wok manmeri, long gutpela tingting bilong ol long mipela i ken sanapim dispela senta. Senta we bai givim gutpela skul na trening long planim, groim na katim daun ol diwai olsem timba bilong salim na mekim mani. Salens i stat nau wantaim yumi.
THOMAS NEN
MENEJING DAIREKTA
PNG FOREST ATORITI



Menesing dairekta Thomas Nen i sanap wantaim ol sumating na wokman bilong NFA

groim na lukautim ol diwai long bringim ikonmik developmen na narapela samting i kam long komyuniti. I no gat wanpela gutpela trening ol papagraun kisim long lukautim na plenim wanem gutpela bisnis em mekim nau bai stap long taim na wankain taim lukautim gut ol risos bilong bhain taim. long dispela as planti papagraun bisnis i save bruk daun na pas taim taim dispela wanpela projek i pinis. Aninit long Nesanel Fores Sevis Edministresen tude, mipela bilip olsem ol papagraun husat gat bikipela sia i noken sanap na lukluk tasol i stap. Ol i mas kisim sampela trening long gutpela bilong diwai na ol i mas luksave long kaitim na planim gen nupela diwai ol yet. Bulolo Yunivesiti Koles na Dipatmen bilong Forestri long Unitech i givim bikipela save na

bilong stretim ol timba risos long hia.

Mama lo bilong olsem moto we lukautim na stiaim driman na lukluk bilong ol manmeri bilong Papua Niugini. Ol bikipela tingting na rot lo bhainim we i stap aninit long mama lo i sapotim na givim strong long fores polisi. Bilong kamapim polisi bilong fores, mipela kisim helpim na strong long namba foa toktok we i tok olsem:

"Olgeta risos bilong Papua Niugini em yumi mas lukautim gut na yusim bilong helpim planti manmeri, long wankain taim senisim na putim nupela bek bai ol tumbuna pikinini i ken yusim."

Aninit long nupela Forestri Lo (1993), NFS i luksave olsem wanem nupela forestri projek i laik kamap i mas i gat 35 sekol (raun) bilong katim

mani i go insait long ol ruel eria. Long wankain taim em bai slekim daun ol diwai bilong bus stret we ol i katim daun hariap tru tude na mekim bikipela timba fektori bilong tude. Planti stori soim olsem gavman tasol wok long kamapim ol diwai plentesen tasol nau dispela i mas senis. Ol lain long praiwet sekta na papagraun yet i mas nau go pas long kamapim ol plentesen. Antap long dispela, wankain olsem long agrikalsa. Ol manmeri i ken kamapim liklik diwai plentesen arere long bikipela timba plentesen na salim timba bilong ol i go long bikipela fektori. Mipela bilip olsem Oomsis Trening Senta bai givim inap gutpela trening long ol papa bilong risos insait long kantri bai ol i ken developim plentesen sekta. Tasol bipo long dispela i kamap tru, i gutpela sapos gavman i


Papagraun tok amamas long Oomsis Trening Senta

Papagraun tru i tok welkam long ol i laik sanapim Oomsis Komyuniti Fores Trening Senta.

Tupela komyuniti lida Wago Umpuano na Bill Naeman bilong Gebensis viles i tokaut long wanpela toktok olsem ol pipel i welkamtingting bilong PNG Fores Atoriti long sanapim wanpela trening senta long Oomsis. Tupela man i tokaut olsem PNGFA i no asua na makim Oomsis olsem ples bilong sanapim senta ya bikos Oomsis em namba wan ples we ol i katim timba na dispela ol timba i kamapim na developim bikipela siti olsem Lae. Tupela man ya i tok em gutpela hap tu bikos ol trening manmeri i ken kisim ol samting i stap arere long ples bilong skul long lainim ol samting na ol papa graun tu ken lainim. Tupela papagraun i tok: "Mitupela sapotim dispela trening senta na mitupela i gat bikipela tingting long wok wantaim senta long ol yia i kam." Tasol tupela man i tok tupela bai askim PNGFA em long atoriti i ken larim ol

papagraun yet i holim ol liklik wok long senta. Tupela strongim tok bilong tupela olsem sapos ol liklik wok man ausait long komyuniti i laik kam insait bai kamapim trabel bikos i gat planti ol

yangpela long ples husat nogat wok na stap long eria nating. Mista Naeman i tok trening senta bai givim tu sans long ol manmeri i ken planim nupela diwai long eria.



MD Thomas Nen lukluk long wanpela diwai wantaim narapela wokman.

Bikpela hatwok na nogat gutpela mani

PEKU PILIMBO i raitim

MANMERI hatwok, taitim bun, tuhat nating na i nogat wanpela gutpela bekim long wok agrikaisa.

Olgeta pipel bilong PNG i save kisim olgeta samting bilong stap laip long wok gaden. Gavman i no luksave na putim mani samting bilong helpim. Gavman i wok long paulim ol pipel.

Mi bin bungim foapela lain husat lusim Hagen na kamap long Pot Mosbi tupela wik i go pinis. Ol i bin kam long salim kaukau bilong ol. Ol i groim na karim i kam long Pot Mosbi bikos ol i harim olsem i gat gutpela prais ol bai kisim.

Ol bin kam wantaim bikpela driman tasol taim ol kamap pinis long Pot Mosbi, ol luksave olsem wanem driman ol i bin gat long en i lus nating. Nogat wanpela bikpela mani ol i kisim, ol yet i bin lusim bikpela mani long baim ka, sip na balus long karim kaikai ol i kamapim long gaden kam long salim.

Mi bin bungim Cathy Kas, Raphael Horse, John Rombol na meri bilong em Maria. Ol i bin lusim Hagen wantaim 96 kaukau na pototo bek. Ol i groim ol dispela long ples Rugul arere long Kumdi, klostu long Notre Dame Hai Skul.

Cathy na Raphael i bilong Tup viles long Minj distrik na John tupela Maria bilong Hagen tasol ol i bin bung na karim kaikai bilong ol i kam daun long Pot Mosbi.

"Mipela mekim bikpela hatwok tru long karim ol dispela kaukau na pototo tasol nau mipela les pinis," Cathy i tok.

"Mipela lusim bikpela mani tru na i no kisim wanpela gutpela win mani.

"Mi go bek long ples bai mi no moa wok, mi les pinis. Ating mi bai tokim ol narapela manmeri long noken mekim gaden tu," em i bin tok.

Ating em gat gutpela rait tru long kros olsem. Bikpela tuhat i lus. Mani i lus. Taim i lus na bihain long olgeta hatwok, sapos yu no kisim wanpela win mani, bel i mas kaskas na dispela em bikpela samting tru.

Taim bilong stat planim kaikai, kli-aim gras, dikim baret, mekim maunten kaukau na bihain klinim gras. Planti taim i lus. Beksait i pen na man i no kaikai gut na slip bikos ol i gat bikpela tingting long mekim sampela liklik win mani bai pikinini i ken skul. O ating famili inap kaikai rais na tin pis wanpela taim. Ating ol inap baim wanpela blenket, metres, kap, plet na spun bilong haus.

Bihain long olgeta hatwok, nogat wanpela win mani bai yu no inap amamas. Dispela em wankain samting i bin kamap long ol dispela foapela manmeri.

Ating ol go bek bai ol i no inap mekim gadei moa na groim kaikai. Ol i luksave wanem kain mani ol inap kisim.

Olgeta hatwok i bin kamap long han tasol. Nogat wanpela man i bin givim mani. Nogat wanpela sapot i kam long ol lida husat save opim bikpela maus bilong ol na singaut tok 'mani i stap long graun, yupela hoim graun bai mani i kamap' tasol taim ol kamap memba bilong palamen o holim bikpela opis bilong gavman, ol i save lus tingting olgeta long olgeta promis bilong ol.

Raphael i bin kros nogut tru long olgeta lida. Em i ting olsem hatwok bilong em i lus nating na nogat wanpela gutpela bekim. Olgeta kaikai em i bin hatwok long kisim i kam no kisim wanpela bekim mani i kam.



• (l-r) Cathy, John, Maria, Raphael na man husat draivim ol raun long Pot Mosbi wantaim pikinini bilong em. Ol i sanap wantaim wanpela bek kaukau ol i karim i kam bilong salim long Pot Mosbi. Foto: PEKU PILIMBO.

Taim em go bek long ples, em bai tok wanem long meri pikinini bilong em? Em bai givim wanem kain gutpela ansa long ol manmeri husat i bin helpim em long wok?

Em i bin tok ol lain bai ting em i kisim bikpela mani na dring bia o bagarapim. Em i wari nogut tru tasol em i save long wanpela samting. Em bai i no moa planim kaikai

i no save wanem rot ol dispela kaikai i bihainim long kamap. Ol foapela i bin peim K2 long wanpela bek (96x2 = K192) long ples i kam long Maunt Hagen, ol i bin painim ples tru long kisim wanpela kontena long Maunt Hagen bilong karim i kam daun long Lae.

Ol i bin peim K488 long karim long haiwe trak i kam long Lae.

hapim bek na rausim bek long ples olsem Maunt Hagen, Lae na Pot Mosbi na wanwan maket ples. I mas i gat pe. Nogat wanpela manmeri bai hatwok nating. Taim bilong salim tu, planti bek kaikai na ol foapela yet i no inap salim olsem na ol i bin askim ol wantok long helpim na salim bilong ol. Ol i peim ol dispela lain tu.

Bihain long olgeta hatwok, ating yu wanpela gutpela manmeri bai yu no tingting tumas long amas mani yu lusim na givim fri sevis long ol taun manmeri.

Mi sori nogut tru long ol. Ol i no kisim wanpela gutpela bekim. Mani bilong ol i lus nating. Nogat wanpela man i helpim o tok tenk yu long ol.

Planti taim ol man save tok God i save helpim ol man husat i helpim ol yet tasol dispela kain i no kamap.

Ating gavman i lusim tingting stret. Pipel bilong Goroka i gat gutpela graun bilong groim kaukau na wankain long ol pipel bilong Hagen, Minj Banz, Kindeng, Aviampana na ol ples olsem bikos graun bilong ol i gat gutpela gris.

Tasol gavman i mas helpim ol. Sapos gavman les long baim trakta na givim long wanwan komyuniti, orait ol i mas traime na givim mani bai ol dispela pipel i ken kam aut long ka na sip bilong salim wanem gaden kaikai ol i groim.

Sapos ol lida long Provinsel na Nesanel Gavman i no mekim wanpela samting bilong helpim ol dispela liklik lain, ol pipel bai les long wok.

Ating dispela foapela i givim gutpela piksa. Ating gavman i no putim kamap samting olsem fri trenspot bilong ol manmeri laik karim kaikai i kam, em bai mekim na ol pipel bai les long kamapim kaikai bilong salim long maket.

Olgeta taim PNG bai baim kaikai long ovasis. Olsem kain sik bilong ol bikpela supamaketa na hotel. Ol i save baim kaikai olsem kaukau, pototo, tomato, banana, kabis, letis, orens, lemon na planti narapela kaikai i save kam long ovasis yet.

Yumi olsem wanem? Nogat graun bilong groim o nogat man bilong planim? Yumi gat olgeta samting, ating gavman i asua na i no kamapim gutpela rot bilong helpim ol manmeri.

Kain man olsem Raphael i no save kam long Pot Mosbi bipo. Em namba wan taim bilong em. Ating

wanem samting em i kam lukim long Pot Mosbi bai mekim na em i les olgeta long go bek na holim graun.

"Mi lukim na mi les pinis. Olgeta taim ol memba na lida i save singaut bikmaus. Ol i mekim wanem samting long helpim yumi?" Raphael i askim.

"Mi bai traime kamapim inap bilong mi yet na mi no groim planti bikos mi les long ol kaikai sting nating long graun.

"Mi nogat ka o sip bilong karim i go aut long ol taun na salim. Bilong wanem bai mi hatwok nating?" Raphael i bin tok.

John Rombol i gat wankain tingting. Em i autim kros bilong em tu.

"Mi ting samting bai isi, mi din-aim mani bilong ol narapela manmeri na yusim long baim ka na sip i kam."

"Taim mi go bek, mi bai bekim ol dinau na luk olsem mani mi kisim nau bai no inap bekim olgeta dinau," John i tok.

Dispela kain kros bilong ol manmeri long ples i stap. Ol i gat graun na tingting long mekim wok gaden tasol husat bai helpim ol. Sori, ol taitim bun na mekim wok i go tasol taim nogat bekim, ol bai les pinis olsem ol foapela mi stori long en.

Gavman i no laik sasim bikpela takis long kaikai bilong gaden ol supra maket na hotel i kisim long ovasis. Wanem samting rong wantaim kaikai bilong yumi? Mi no lukim wanpela samting rong. Ating ol bikpela bisnis i no bilong PNG, ol ovasis olsem na mani i mas go aut olgeta taim. Gavman les long holim mani i stap na traime helpim ol pipel olsem Cathy, Maria, Raphael na John.

Wanem gaden kaikai ol baim long ovasis i gat planti marasin bilong kilim binatang na dispela inap givim sik long ol manmeri husat kaikaim ol. Planti taim prais bilong ol dispela kaikai i dia tumas.

Sapos ol kaikai bilong ples yet i stap long supra maket na hotel, ating prais bilong ol inap liklik. Long wankain taim mani inap stap insait long kantri. Ating planti manmeri long ples inap painim sampela wok mani.

Tasol gavman i no tingting gut. Olgeta tingting bilong ol lida em long pitai politiks na paulim mani bilong ol pipel.


Taim bilong ileksen ol mauswara lida save giamanin ol pipel. Kainkain promis bilong ol lida i no save pilai. Taim bilong kamapim ol dispela promis ol i save lus nating na taim bilong ileksen ol i save kam mauswara gen.

Ol pipel bilong ples i laik givim gutpela sevis tasol luk olsem ol lida wantaim lain bilong ol long siti olsem Pot Mosbi i laik kaikai rais, flawa na lemb fleps wantaim kakaruk tasol. Ol les long gaden kaikai.

Kaikai olsem save mekim na planti bodi gris pulap na ol giaman lida gro solap wansait na wok long dai yet long sik bilong lewa.

Gutpela long yumi luksave na givim helpim long ol pipel bilong ples. Ol tumbuna i stap na ol i stap yet. Ol i no wari long mani tumas olsem yumi taun lain. Ating yumi taun lain i gat moa mani long baim ekspensiv kaikai bilong stua. Mi ting olsem wanem kaikai ol pipel bilong yumi kamapim long ples i swit moa na i no dia tumas.

Laip hat tru na yumi mas baim kaikai bilong gaden. Em i no dia tumas. Long wankain taim yumi bai sevim sampela mani. Yu inap stap longpela taim long graun. Na bikpela samting yumi bai kamapim wok mani bilong ol lain long ples.



• Ol i soim sampela potato ol bin karim i kam long salim.

bilong salim bikos wanem gutpela bekim bai kam? Em traime pinis na nogat. Ating em bai skulim ol narapela manmeri long noken wok gaden bilong salim.

Cathy, Raphael, John na Maria i bin painim bikpela hevi long karim kaikai i kam long Pot Mosbi. Ol i nogat ka bilong kisim olgeta bek i kam long Maunt Hagen taun. Bikpela mani tru i lus long karim tasol i kam.

Ol manmeri long taun i save lukim kaukau olsem pototo tasol ol

Taim ol laik kam daun long Pot Mosbi, ol i peim K1103 long sip. Narapela K110 i go long ka taim ol kisim kaikai long Pot Mosbi sip bris i go long ol maket olsem Gordon, Tokarara, Waigani, 4 Mail na wanem narapela liklik maket ples olgeta moning na apinun. Long ol dispela maket, ol i bin peim narapela K2 long wanwan bek kaukau (K192 gen). Olgeta apinun wankain pasin, mani i lus na bekim i no kamap gut.

Dispela mani em bilong karim long ka na sip tasol. Taim ol man i

• Berokek tieta grup bilong Sio long Morobe provins i paitim garamut na ol arapela i kalap kalap long wanpela drama pilai bilong o.



• Ol skul pikinini wantaim ol bikmanmeri bilong Karkar i sanap long asembli long Septemba 16, independens de long moning apim flak bilong PNG. Poto: FUZO PAUL.



• Wanpela mama grup long Lae siti i wok long klinim ples long pulim liklik mani bilong saptoim wok bilong ol mama.

• Bikman ya i brukim graun na ol mama i bungim long bek. Dispela em bilong wokim neseri bilong planim ol pikinini diwai.



• Dephan: Wanpela tieta grup bilong Karkar Ailan i hatim danis long independens de long ailan yet. Poto: FUZO PAUL. Raithan: Ol lain long Banz, Westen Hailans provins i save groim ol pikinini diwai long neseri.

Jeneresen Nem sistem i wanem samting?

VERONICA HATUTASI
i raitim

LONG stat bilong dispela yia, ripot long ol niuspepa i bin kamap long ol Nesenel Hai skul long kantri i gat ol kalt we ol i lotuim satan long en.

Bikpela nius i bin sut long Keravat Nesenel Hai skul long Is Nu Briten taim ripot i kamap long sampela sumatin i bin dai bikos long membasip na wok bilong ol long dispela kalt. **Wantok** Niuspepa i bin ranim stori long dispela samting tasol em i no bin nap long kisim toktok long dispela samting long Edukesen Dipatmen o long ol Prinsipel long ol Nesenel Hai skul.

Tasol tok lukaut i bin go long ol papamama insait long ol skul long was gut long ol pikinini bilong ol long noken go insait long dispela kain samting bikos em i ken bagarapim skul bilong ol.

Wantok i bin toktok wantaim wanpela sumatin long dispela samting na putim kamap dispela ripot long pablik i ken klia gut long dispela samting we midia i bin kolim kalt long ol ripot long dispela yia. **Sumatin** ya i no laik bai **Wantok** i autim nem bilong em tasol em i skul long wanpela nesenel hai skul long PNG.

Tasol taim **Wantok** i stori wantaim wanpela sumatin, em i tok long skul bilong ol, i gat tasol em i no kalt sistem olsem i kamap long nius. Em imekim klia ol gutpela na i no gutpela sait bilong dispela samting we long skul bilong em, ol i kolim long "Jeneresen nem skruim sistem". Long Tok Inglis, ol i kolim long "Generation Name Passing" system.

Wantok: Inap yu stori liklik long dispela samting ol bin ripotim long Keravat Nesenel Hai skul long dispela yia olsem wanpela kalt muvmen.

Sumatin: Long skul bilong mipela, i gat jeneresen nem pasing sistem. Sistem ya i gat long em ol memba sumatin long olgeta hap bilong kantri. Ol i no pasim ol sumatin long joinim long sait bilong ol wan wan rijen olsem Sauten, Momase, Hailans na Niugini Ailans, nogat. Husat i gat laik i ken joinim ol jeneresen grup.

Wantok: Inap yu mekim klia sapos dispela jeneresen nem pasing em i wanpela kalt grup o nogat.

Sumatin: Long skul bilong mipela (em i kolim nem bilong nesenel hai skul klostu long siti tasol i no stap insait), em i no wanpela kalt grup, tasol mi no save long dispela long Keravat. Ating em i mas narakain liklik long ol wan wan skul, mi no klia tumas.

Wantok: Long lukluk, tingtign na save bilong yu, wanem yu lukim olsem gol, as o gutpela samting dispela kain sistem i givim long ol sumatin?

Sumatin: Bikpela samting mi lukim olsem i gutpela long dispela sistem o grup em ol memba i

save gut long wanpela arapela na ol i helpim wanpela arapela long gutpela na nogut taim, taim bilong hevi, trabel o sot long samting. Ol memba i no bilong wanpela provins o rijen. Dispela kain grup i strongim yuniti na nogat pait i kamap namel long ol wan wan rijen bikos grup membasip i no beis long ol rijen o provins.

Wantok: Inap yu stori liklik long rot we yu kamap memba long jeneresen grup?

Sumatin: Mi bin kisim nem long sinia bilong mi klostu long pinis

bodi bai yu kisim nem i sut long dispela, sapos yu wanpela man bilong stadi hat, wokim pani, kaikai buai bai yu kisim nem i sut long dispela na moa olsem.

Wantok: Olsem tasol ol arapela samting, nau mi lukim sait i no gutpela long dispela sistem. Sistem i no inap long helpim spakman, drag bodi o lesman long kamap gut, laga?

Sumatin: Em i tru. Tasol em i kamapim tu planti gutpela samting. Mi tok olsem bikos anitit long dispela sistem, ol wan jeneresen nem memba i ken helpim wan-

Long skul bilong mi, i gat faipela bikpela grup (Em i kolim tasol em no laik bai **Wantok** i raitim nem bilong ol). Gutpela samting em bai i hat long pait sapos wanpela i stap long asua bikos membasip bilong grup i no beis long provins o rijen.

Wantok: Kain grup i kamapim hevi long stadi o skul bilong yu?

Sumatin: Nogat ya.

Wantok: Wanem futja bilong dispela kain grup.

Sumatin: Long skul bilong mipela. mipela i stapim dispela

Sumatin: Long skul bilong mipela, dispela em nogat. Mi no klia long Keravat o ol arapela skul. Tasol mi tok dispela kain grup olsem long skul bilong mi i stap long ol sekonderi, hai na praimer skul insait long siti. Kain grup i bilong helpim wanpela arapela namel long ol wan krismas na pren grup. Long lukluk bilong mi, samting i go nogut long Keravat em skul moto o het tok i tok olsem "Samting i stap long han bilong yu (It's up to you) na dispela i givim bikpela fridom na ol i no yusim gut. Skul bilong mi i



bilong las yia taim mi stap long Gret 11. Na sinia bilong mi em wanpela Gret 12 sumatin husat i laik lusim skul klostu long pinis bilong yia. Man ya em bin gutpela brata na pren husat i save lukautim mi, stat long taim mi go wokim Gret 11. Mi no kisim nem nating, nogat. Nem i mas piksa long karakter o pasin bilong yu. Na taim yu kisim dispela nem, yu mas bihainim samting nem i makim long en.

Sapos yu wanpela man bilong laikim musik, bai yu kisim nem i sut long musik na yu mas strongim dispela. Sapos yu wanpela frenli man bai yu kisim nem i sut long dispela, sapos yu man bilong kros, yu bai kisim kain nem, sapos yu wanpela spak man, yu bai kisim nem i sut long dispela, sapos yu wanpela drag

pela arapela bihain taim sapos yu stap long hevi long mani i sot, yu nogat wok na wan jeneresen nem bilong yu i holim bikpela posisen na i ken kisim yu long wok, helpim yu wantaim mani o wanem hevi moa yu stap long en, olsem tasol. Orait, long skul, taim yu sot long samting, yu mas go long ol jeneresen memba ipastaim ong kisim helpim sapos yu sot. I no long narapela lain.

Wantok: Hamas krismas nau dispela Jeneresen grup i stap long skul bilong yu?

Sumatin: Planti krismas, sampela em ol inpa long namba 15. Dispela i min olsem sampela i stap long 15 yias nau. Long grup bilong mi we mi kisim nem, mi namba 8 man long kisim nem we ol bipo lain i holim na pasim i kam long mi.

sistem pinis long las tem. Ol tisa na skul bod i bin wokim strongpela toktok long mipela na ol i tok em i egensim lo long ranim dispela kain grup long skul. Olsem na skul i bin makim wanpela apinun na holim wanpela seremoni long lusim dispela jeneresen sistem pasin. Long seremoni we i bin kamap long edministretiv bilding, mipela i bin sarendaim ol nem we ol jeneresen memba i bin sainim nem bilong ol long bihainim ol kondisen i stap long stapim dispela prektis olgeta. Na sapos ol sumatin i sakim tok na go hetim dispela prektis, ol bai rausim ol long skul.

Wantok: Long ripot i bin kamap long stat bilong yia i sut long Keravat Nesenel Hai, ol sumatin i bin wokim ol samting we i sut long lotuim satan, olseme wanem long skul bilong yu?

nogat dispela kain het tok na em i orait. Olsem ol arapela samting, dispela kain grup i gat ol gutpela na nogut poin long en.

Sumatin i tok em i no klia nau tasol taim skul i stapim dispela jeneresen nem sistem, ating ol sumatin bai go bek long ol rijinel grup na dispela bai kamapim bek ol hevi long pait namel long ol grup taim trabel i kamap.

Wanem tingting bilong ol **Wantok** rida long dispela samting? Wanem samting ol skul na edukesen atoriti i ken wokim long dispela kain grup? Wanem samting ol papamama i ken wokim? Maski yumi laikim o nogat, ol kain dispela kain grup i stap pinis insait long ol skul na ol pikinini, brata na susa bilong yumi inap go insait long ol.

Gret 10 man kamapim wok

SAPE METTA i raitim

LONG pasin bilong kamapim ol gutpela wok samting (selp rilaiens) long save na tingting bilong yumi yet em i namba wan.

Dispela em i toktok wanpela yangpela kristen man i mekim long kamapim na ronim ol wok bilong em yet.

Yangpela man ya em Buckley Kaupa husat i go pas na mekim planti hatwok long ol kainkain selp rilaiens wok insait long Goroka, Isten Hailans provins.

Wanpela long ol wok Mista Kaupa i save gut tru em hani faming. Em i save kamapim ol hani na kamapim ol arapela samting olsem sop paura na strongpela ol sop bilong waswas na wasim ol klos. Na tu em i save wokim hani we yumi i ken putim antap long bret na kaikai o putim long ti na kopi long dring. Na taim yumi kus, yumi i ken putim hani i go insait long muli na dring na sik kus bai i ken pinis.

Mista Kaupa i tokim Wantok olsem long namba wan taim em i bin traim hat tru long aplai na askim raun long kisim sampela liklik helpim i kam long opis bilong gavman na tu ol bisnis lain.

Nogat bekim tasol wanpela bisnisman husat i save ronim wanpela mini supameket long Kama eria insait



• Lokol self rilaiens wokman Buckley Kaupa i soim ol sop na kakaruk fida (chicken feeder) em yet i save wokim long Goroka. Poto: Sape Metta.

long Goroka i bin givim wanpela hap spes long em. Mista Kaupa i muv i go insait na statim liklik hani bisnis bilong em sampela taim namel long 1995 na i kam antap. Dispela bisnis bilong em em i kolim Jauka Honey Producers bilong Goroka.

Mista Kaupa i tok em i no go long wanpela bikpela stil skul long kisim save bilong wokim ol hani.

Em i bin pinisim gret 10 long Goroka hai skul na i stap long ples bilong en. Em i save ritim ol laik na megasin. Na taim em i mekim olsem em i stat long kamapim gutpela ting-

ing bilong kamap selp rilaiens wokman..

Em i tok, "long helpim ol arapela, em bai amamas tasol long skulim ol, na em i redi tasol. Mista Kaupa i tok nau yet em i nogat ol gutpela masin long produsim ol hani na wokim ol sop. Em i yusim tasol ol liklik masin nabaut na wok i no save ron hariap.

Em i tok planti ol bikpela kampani i save laikim tru ol hani na sop bilong em. Na ol i save putim bikpela oda. Tasol em bai hat long saplaim ol dispela bikpela oda hariap, long wanem i nogat gutpela masin na fektori long

wokim ol hani na sop long mitim ol dispela oda bilong ol.

Em i tok sapos em i gat fektori na masin, em i ken mekim planti wok.



• Lokol hani fama, Buckley Kaupa i sekim ol hani long Kama na ol elementri skul pikinini i sanap na lukluk i stap.

Na long sem taim tu em i ken givim sans long planti ol lain man na meri long wok insait long fektori bilong en.

Mista Kaupa i tok tu olsem em i ronim wok bilong em isi isi na tu

em i wok long kisim sampela yangpela lain man i kam insait na lainim ol.


Beksait bilong wok bilong hani na sop, Mista Kaupa i go pas tu long wokim ol nupela samting olsem kakaruk

fida na tu em i ranim Kama elementri skul.


Em i tok em i gat ol arapela selp rilaiens wok i stap long plen. Na em bai go het na ronim ol dispela wok long mun i kam bihain.




Hatwok bilong lukautim kopim • Pikim kopi na tanim long masin long rausim skin i no isi wok long mekim. Bihain wasim na draim long san em narapela bikpela wok gen long mekim. Kopi em wok tru bilong ol lain bilong yumi long ples na em i wanpela rot bilong mekim mani. Samting bilong hat wok na mani bai kamap long en.



HITS & MEMORIES
FM 100



RADIO NETWORK




| | | | |
|-----------------------|---------------------|-----------------|-------------------|
| PORT MORESBY FM 100.3 | MT. HAGEN FM 100.4 | TABUBIL FM100.3 | ALOTAU FM107 |
| BOROKO FM 100.3 | LAE FM 100.5 | WEWAK FM100.8 | BOREGORO FM 107.7 |
| GOROKA FM 100.2 | POPONDETTA FM 100.5 | MADANG FM 100.8 | HOREALOA FM 107.5 |
| KAVIENG FM 100.2 | RAMU FM 101 | KOKOPO FM 100.8 | WATERHOLES FM |
| 107.3 | | | |
| LORENGAU FM 100.3 | KUNDIAWA FM 101 | BUKA FM100.3 | KAINGUMA FM 107.1 |

When you advertise on FM 100, you can rest assured that your message is being heard in and around these locations on these frequencies right around PNG. Just call 300 4300, fax300 4399 or email us at kalang@tiare.net.pg & we'll take

Lukluk bek long 2001 Nesenel Skul Soka salens - Goroka



• Pilaia bilong Goroka i traim long kik i go insait long gol insait long dispela Orogen Skul Soka tonamen i bin kamap las wik long Goroka.



• Pilai namel long Kainantu na Manus long U17 divisen.



• U13 tim bilong Manus Chauka. Ol poto: SAPE METTA.



• U12 divisen pilai namel long Lae na Goroka.



• Pilai namel long ol Lae na Goroka long U12 divisen. Lephon: U12 tim bilong Goroka wantaim Goroka Taun Meya Michael Gotaha (lephan).



Kundiawa soim stail long 2001 Skul Soka sempionsip

SAPE METTA i raitim

LONG ol yia i kam na i go, Skul Soka Salens (sempionsip) i wok long na kamap bikpela tru. Dispela sempionsip i wok long pulim bikpela interes na laik long planti skul insait long kantri.

Las wik, long namba tri tem skul holde, ol yangpela skul mangi i pasim tru Nesenel Spots Institut (NSI) long Goroka. Dispela soka tonamen i kamap gutpela na bikpela long gutpela sapot bilong Orogen Minerals Limited.

Moa long 70 tim i bin kamap na salens long dispela tonamen. Namba bilong tim i abrusim mak bilong 1000 tasol bikos long hevi bilong mani long salim ol tim, planti senta i no kamap long dispela tonamen.

Dispela Orogen Skul Soka i wanpela gutpela soka resis bilong ol skul mangi we i developim ol yangpela insait long spot bilong soka.

Planti ol pilaia i bin kamap na soim planti gutpela stail bilong pilai soka.

Wanpela long ol dispela liklik senta em Kundiawa insait long Simbu provins. Tasol planti ol praimer skul insait long Simbu i no kamap.

Ol lain pikinini husat i kamap na makim Simbu long dispela Orogen tonamen em Kerowagi Praimeri skul husat i kamap wantaim wan-

pela Anda 17 (ol boi), Kuangl Praimeri skul i bin kam daun wantaim Anda 13 (ol boi), na Kundiawa i kam wantaim tupela Anda 15 tim. (ol boi na meri).

Dispela em i namba wan taim stret bilong Kundiawa i stap long resis bilong Orogen bihain long em i stat long 1991. Na maski sapos em i namba wan taim bilong ol, Anda 15 tim bilong ol meri i pilai gut na winim taitel bilong dispela grup.

Mausman bilong Kundiawa skul soka na tu hetmasta bilong skul, Max Teine i tokim *Wantok Nius* olsem soka i wok long kamap bikpela long Simbu provins tasol taim ol kain nesenel tonamen i save kamap, planti taim Simbu i save mis aut na i no save kamap na soim pes long ol dispela nesenel sempionsip.

Em i namba wan taim stret bilong ol skul pikinini long Kundiawa i stap insait long kain spot tonamen. Maski em i namba wan taim, ol boi na yangpela meri i pilai gut tru na opim ai bilong ol arapela ol yangpela man na meri long dispela skul soka tonamen.

Mista Teine i tok as tingting bilong kisim tupela tim i kam daun long Goroka, em long lukim ol i stap insait long soka tasol. Tasol tim bilong ol meri (Anda 15) i go insait long gren fainel na winim em bikpela samting tru long Kundiawa.

Em i tok tupela tim bilong em i bin trening inap wanpela yia. Na



• Ol yangpela Anda 15 meri husat i kukim stret soka fil bilong Nesenel Spots Institut las wiken long taim bilong 2001 Skul Soka salens. Foto: SAPE METTA

taim ol i go insait long kompetisen, ol i pilai olsem ol eksperiens tim husat i bin stap resis long Orogen resis bipo i kam inap nau.

Mista Teine i tok ol pikinini long Kundiawa i ken pilai soka na sapos ol i ken kisim gutpela sapot na ol samting bilong tening, Kundiawa na Simbu provins bai i ken paia stret long soka.

Em i tok soka em i no bilong ol lain long nambis tasol. I tru olsem

ol lain long nambis i gat nem na namba long pilai soka. Tasol nau ol lain long Haiains tu i gat namba long pilai soka, long wanem soka i kamap long Hailans na i wok long nau strong tru long olgeta Hailans senta.

Na Simbu em i wanpela long ol dispela senta. senta.

Em i mekim bikpela tok amamas i go long wanpela olupela nem pilaia bilong Lae bipo Aaron

Mungalion husat i save hat wok tru long bildim na developim soka insait long Simbu provins.

Mista Mungalion em i kosa bilong dispela tupela Anda 15 tim.

Klostu 10-pela yia nau Mista Mungalion i sindaun long Simbu na em i wok hat tru long strongim soka. Nau yet 4-pela asosiesen i kamap pinis long Simbu em Suai, Kerowagi, Kundiawa na Simbu skul soka asosiesen.

Skul soka i kisim bikpela luksave

JUNIA na skul soka insait long kantri nau bai kisim sampela luksave i kam long Papua Niugini Futbol Asosiesen (PNGFA) na tu Osenia Futbol Konfederesen (OFC) bihain long ol i fomim PNG Junia Soka Asosiesen.

Dispela junia asosiesen i kamap bihain long gutpela 2001 Skul Soka salens i kamap long Nesenel Spots Institut long Goroka. Dispela skul soka sempionsip em Orogen Minerals Limited i sponsarim.

Insait long wanpela spesel miting, ol i makim wanpela interim komiti long go pas long wokim plen bilong PNG Junia Soka insait long kantri.

John Mogi bilong Pot Mosbi em i kisim wok siaman, Paddy Kelly bilong Goroka husat i siaman bilong Ogenaising Komiti bilong 2001 sempionsip i kamap namba tu.

Sekretari na tresera bilong PNGJSA em Geoffrey Gideon.

Ol arapela komiti memba i makim wanwan rijen long dispela junia asosiesen em

Scholastica Bogg (Momase), Michael Sanginambuk (Southern), Kanawi Sindol (NGI) na Max Teine (Hailens).

Wanpela bikpela wok bilong dispela komiti em long luksave long ol senta husat i no save kisim gutpela helpim so PNGJSA i ken helpim ol.

Bikpela plen bilong bihain taim em long stretim as bilong wanwan senta na bihain toktok wantaim ol skul long strongim soka salens.

Mogi i tok em i amamas long kisim sans gen long lukautim dispela Orogen Skul soka salens.

Em i amamas olsem em i gat gutpela komiti long mekim wok bilong ransim junia na skul soka insait long kantri.

"Wantaim helpim bilong ol ogenaisa na tu ol 4-pela mausman bilong 4-pela rijen, mi gat bilip olsem mi ken mekim gut wok olsem interim siaman," Mogi i tok.

Interim siaman i tok em i gat bilip olsem PNGJSA bai kamapim plen bilong em bikos em i gat tupela save-man bilong soka i stap long helpim em.

Tupela helpman em Edris Kumbuwah na Joe Turia husat i wanpela olupela PNG pilaia na tu mausman bilong Sponsa Orogen long taim bilong sempionsip long Goroka.

Long gutpela lidasip bilong Kelly, Goroka bai holim gen 2002 skul soka sempionsip.

Ol i oraitim Goroka long holim sempionsip gen long neks yia long wanem, Nesenel Spot Institute i gat olgeta gutpela soka fil long pilai.

Arapela samting tu, Goroka i stap namel we ol hailens tim na tu ol arapela tim i ken flai i kam pilai na gobek gen.

NSI i gat gutpela haus slip, kaikai na tu i gat ol wokman i save moa long spot i ken givim helpim long taim bilong bikpela tonamen olsem.

Paddy Kelly i tok olsem ol i orait long makim maus bilong lsten Hailens long holim gen dispela tonamen.

Mista Kelly wantaim komiti bilong em i mekim bikpela wok tru long 2001 skul sempionsip i mas kamap gut. Na dispela i karim kaikai las wik ya.

Nau yet i gat ripot olsem PNGJSA i tingting long salim wanpela Anda 15 tim i go long Anda 16 soka sempionsip we bai kamap long Australia long neks yia.

Tasol long dispela, PNGJSA i mas kisim gutpela toktok wantaim PNGFA na kisim sapot bilong ol tu.

• U12 tim bilong Bulolo husat i bin stap insait long dispela 2001 Orogen Skul soka tonamen long Goroka.



Skul soka i gat stail

TONAMEN Dairekta bilong 2001 Skul Soka salens Geoffrey Gideon i amamas tru bihain long sempionsip bilong skul soka i pinis gut tru.

Dispela sempionsip ya i bin kamap long Nesenel Spot Institut long Goroka. Orogen Minerals Limited i sponsarim dispela tonamen.

Em i tok planti ol liklik senta i soim pes na i bagarapim tru sindaun bilong ol biknem soka senta.

Insait long fainel bilong ol Anda 17 (man), Huon Gulf i winim taitel na Anda 17 meri i winim taitel. Ol boi Lae i autim Pot Mosbi 1-0 long winim tropi.

Manus i kamap namba tri na Kainantu i pinis namba foa ples tasol ol i kisim Fair Play tropi.

Na long resis bilong ol meri,

Pot Mosbi i autim Goroka Secondary 1-0 long gren fainel.

Mista Gideon i tok dispela gem i gutpela stret. Ol meri Goroka Secondary i pinis namba tu long pul bilong ol tasol ol i kamapim gutpela gem na surik i go long pilai insait long fainel.

Ol meri Lae Skul Soka i pinis namba tri na Boreboa bilong Pot Mosbi i pinis namba foa na kisim Fair Play tropi.

Insait long resis bilong Anda 15, Wardstrip bilong Port Mosbi i winim namba wan ples, Huon Gulf i pinis namba tu na Pot Mosbi Skul ov Ekselens i pinis namba tri na Bulolo husat i pinis namba foa kisim Fair Play tropi.

Na long Anda 15, Gideon i tok ol meri Simbu i gat kik ya. Ol i mekim save long ol Pot Mosbi

long penalti. Ol meri Simbu i kikim tripela penalti na ol Pot Mosbi i nogat gutpela kika na nogat wanpela gol i kamap.

Pot Mosbi i pinis namba tu, Markham i kisim namba tri ples wantaim Fair Play tropi.

Na long Anda 13, Lae Skul soka i winim namba wan ples, na Huon Gulf i pinis namba tu na Star Mountain i pinis namba tri na kisim tropi.

Lae Anda 11 i winim tropi na Goroka i stap namba tu. Madang i kisim Fair Play tropi.

Gideon i tok em i amamas tru long olgeta tim i soim pes. Na bikpela i go long ol skul tim insait long Hailens we planti bilong ol i no save gut long soka tasol ol i soim stret olsem ol i ken pilai.

PNGFA bai kisim vot i nogat bilip

IGAT bikipela plen nau i kamap long holim vot i nogat bilip long presiden bilong Papua Niugini Futbol Asosisen (PNGFA) Madiu Andrew na ol eksekutiv bilong em.

Dispela vot i nogat bilip bai kamap long taim bilong PNGFA mens nesanel klab sempionsip long Kimbe, Wes Nu Briten.

Wanpela man i no laik givim i tokim Wantok Nius olsem namba tu presiden Seth Daniel i go pas long holim dispela vot i nogat bilip.

Wantok Nius i no inap kisim toktok bilong Seth Daniel tasol i save olsem Mista Daniel em wanpela strongpela

sapota bilong Mista Ivan Ngahan taim em i stap olsem sekretari.

Nau yet, Mista Ngahan i aut na PNGFA i makim wanpela nupela sekretari, Gabriel Pise.

Man ya i tokaut olsem Seth Daniels i sponsorim pinis 8-pela opisel na tim long go pilai long Kimbe we miting bai kamap.

President bilong PNGFA Madiu Andrew husat i go pas long saspending Mista Ngahan na bihain rausim kontrak bilong em i bilip olsem Mista Ngahan i no mekim gut wok taim em i stap sekretari.

Aninit long mama lo bilong PNGFA, ol i sasim Mista Ngahan na givim em tupela

wik long bekim. Tasol bekim bilong Mista Ngahan i no go gut wantaim tingting bilong PNGFA na ol i askim em long risain.

Wantok Nius i save gut olsem taim Mista Ngahan i saspending, Mista Seth Daniels i no wanbel wantaim ol arapela memba bilong eksekutiv na i wok long painim we long rausim ol.

Dispela liklik politik bilong soka nau i wok long mekim na i westim bikipela taim tru bilong PNGFA long bringim mani bilong Gol Projek i kam insait long kantri. Man i go pas long toktok em Mista Ngahan.

Telikom i no wanbel PMSA



• Fabian Chow i mas luksave long arapela divisen

SEMPION tim bilong Wimen's divisen, Telikom, i askim Pot Mosbi Soka Asosiesen long mas luksave long olgeta divisen i stap insait long kompetisen.

Mausman bilong Telikom Simon Koima i mekim dispela toktok bihain long Telikom i no kisim wanpela prais bihain long gren fainel las wiken. Telikom i winim birua tim, Cosmos, 2-0 long fainel long las wik Sande.

Koima i laik tok klia long ol esksekutiv bilong PMSA olsem primia divisen tasol i no kamapim soka asosiesen. Ol i noken putim olgeta tingting long primia divisen na givim beksait long arapela divisen.

"Soka divisen long PMSA i strong bikos em i gat ol arapela divisen olsem wimen, fes divisen, seken divisen, yut divisen, na nau Pot Mosbi Skul Soka Asosiesen. I tru skul asosiesen i no mekim bilong PMSA tasol ol i save givim planti ol yangpela pilaia i go long yut divisen bilong PMSA," Koima i tok.

Mausman i tok Telikom i mekim toktok bikos em i sempion klab bilong kantri na tu Pot Mosbi. Na kain pasin bilong givim prais long presentesen i save hat tru. Planti taim presentesen i no kamap na ol kain samting olsem prais tu i no save kamap.

Koima i tok em i no laik daunim gutpela wok bilong Fabian Chow tasol ol olupela eksekutiv long PMSA i mas save. Sapos ol primia divisen i kisim prais orait Telikom olsem primia tim bilong ol meri tu i mas gat prais.

Wantok Nius i no inap kisim toktok bilong presiden bilong PMSA Mista Chow.

Ragbi lig rausim Bruce Mamando

BIKEM fowat bilong PNG Kumuls Bruce Mamando bai i no inap makim kantri moa long pilai long nesanel tim, Kumuls.

Dispela em wanpela tingting em PNG Ragbi Lig Bot aninit long siaman John Numapo i tingting long mekim bihain long Mamando i semim PNGRFL Bot long sampela pasin bilong makim ol Kumul pilaia i no stret.

Tasol Bruce Mamando husat i save pilai wantaim Not Kwinsien Cowboys i autim tingting bilong em taim ol Kumul selekta i no kisim sampela ol gutpela pilaia olsem Elias Paiyo, Michael Mondo na Andrew Norman long dispela gem we bai kamap long Sande egensim Australia Kangaroos.

Mamando husat em hap Hagen na Australia i ting dispela ol pilaia i fit tasol PNGRFL Bot wantaim ol selekta i no bihainim gut pasin bilong makim ol kumul pilaia.

Aninit long mama lo bilong PNGRFL long makim ol Kumul, ol PNG pilaia i pilai long NSW Kantri, Metropolitan kompetisen na Kantri kompetisen bai i no inap makim kantri long nesanel tim.

Mamando i bilip olsem dispela seleksen pasin i no gutpela na i no givim sans long ol pilaia husat i fit.

Paiyo, Mondo na Norman i gat ol strongpela ran. Mondo i sevim PNG Kumuls taim em i skroim tupela trai long Goroka na helpim PNG Kumuls i winim ol lain French Rooster long mun Jun.

Siaman Numapo i tok em i no amamas long kain pasin bilong

Mamando. Em i tok bikipela fowat bilong Kumul i no respektim disisen bilong PNGRFL long makim ol pilaia na tu em i no toktok wantaim PNGRFL selekta na yusim ol niuspepa long autim wari bilong em.

Bihain long Mamando i aut, ol selekta i bun na makim Chris Lome. Em wanpela strongpela pilaia bilong Pot Mosbi Vipers.

Mista Numapo i tok ol i makim Lome long wanem em i pilai gut tru na tu em fit long makim sais bilong ol Australia Kumuls.

Chris Lome nau bai joinim kasen bilong em Marcus Bai. Tupela i kamap long wan famili na tupela bai pilai long Kumul.

Lome em i no nupela pilaia. Em i bin pilai long Kumul bipo long 1998 taim PNG i salensim Fiji Bati long tripela Tes mes.

Numapo i tokaut klia olsem Lome i no stap long fainel tim. Em i mas tren strong na winim spes long tim.

Dispela tingting bilong kisim Lome bai i no gutpela tumas. Tripela arapela Shadow pilaia olsem Nigel Hukula, Rumints Kombs na Alfred Songoro i stap long sambai lista bilong tim.

Tasol Mamando i strong yet olsem toktok em i mekim i gutpela long strongim nesanel tim. Em i bilip olsem PNGRFL i mas mekim senis long rot bilong makim ol pilaia ovasis na ol i ken pilai long nesanel tim.

Mangi North Queensland Cowboys i no laik mekim planti toktok tasol em bai stap long Pot Mosbi long sapotim tim.

Olpela soka presiden i dai

WIMENS soka insait long kantri i lusim wanpela bikipela sapota bilong em.

Olpela presiden bilong PNG Futbol Asosiesen Peter Mommers i bin dai long Tunde long Wabag.

Ripot i kisim Wantok i givim planti kainkain stori long indai bilong em.

Peter Mommers em wanpela strongpela sapota bilong wimen soka insait long kantri na tu long Osenia rijen.

Taim em i stap presiden em i wokim bikipela wok tru bilong wimens soka.


Em i bringim Osenia Wimens Soka sempionsip i kam long kantri na tu Osenia rijen.

Em i mekim bikipela wok taim em i stap presiden long burgim olgeta asosiesen insait long kantri.

Mommers i mekim bikipela wok tu long bringim bikipela mani i kam long strongim soka insait long Aitape long taim bilong tsunami.

Presiden bilong Hailens Soka Federesen David Chung em i namba wan man long salim bikipela tok sori i go long famili bilong Mista Mommers.

• Ol mangi Kundiawa Anda 15 i soim stail bilong ol long Orogen Skul Soka Salens las wik.



• Peter Mommers.

Mista Chung i tok em i lainim planti samting long developim soka insait long hailens rijen long Mommers.

Taim Mista Mommers i kamap presiden, Mista Chung i kisim ples na karim aut wok bilong developim na strongim soka insait long Hailens rijen.

Provincial Police Komanda long Wabag i tokim Wantok Nius olsem Mommers i dai tasol ol i no tokaut long as bilong indai bilong olupela presiden bilong soka.

Ol opisel bilong PNGFA i no kisim tok klia yet long indai bilong Peter Mommer bikos i gat sampela senis i wok long kamap long opis bilong ol.

Nupela sekretari

Jenerel Gabriel Pise i no inap mekim toktok inap em i kisim orait bilong ful eksekutiv long mekim toktok bihainim indai bilong papa bilong soka long Hailens..

Long tingim ol gutpela wok bilong Mommers, Provinsal Gavman i givim nem bilong em long wanpela soka fil, Mommers Oval namel long Wabag taun

• Wantok Nius spot Desk tu i salim bikipela tok sore long famili bilong Peter Mommers.

Taim Mommers i stap presiden, em i save helpim tru dispela niuspepa long ol stori na nius bilong soka insait long kantri na tu ova-



ANZ givim K13,000 long soka klab

SAMTING olsem tripela wik i stap yet na PNGFA mens klab soka sempionsip bai kamap long Kimbe.

Ol maina primia na tu rana-ap tim bai go resis long painim aut husat em sempion klab tru insait long kantri. Unitech em sempion tim we i resis long Osenia klab semp-

ionsip i kamap long las yia.

Nau Unitech long Lae bai difendim taitel. Tasol wok redi long painim mani long go pilai em i hat tru.

Pot Mosbi Yunivesiti soka klab i gat wankain hevi. Tasol bikipela sponsa bilong ol, ANZ Bank i givim K13,000

long stap insait long dispela resis.

Menesing Dairekta bilong ANZ Allan Marlin i givim dispela mani i go long presiden bilong klab Kerenga Kua na kosa John Davani. Dispela mani bai lukautim tim long taim ol i stap long Kimbe.

Mista Marlin i amamas tru long sapotim klab long wanem em i karim gut nem bilong kampani bilong em, ANZ Bank.

Wanpela sinia pilaia bilong Yunivesiti klab, Ben Lakasa i save kamap long edvetisemen bilong ANZ Card. Na dispela em wanpela we bilong promo-

tim klab na kampani (ANZ Bank).

Kosa John Davani husat i lukautim klab long las taim i amamas tru long helpim bilong ANZ Bank. I bin gat planti kainkain paul toktok i kamap long ples bilong pilai tasol nau ol i save, dispela sempionsip bai kamap long Kimbe.

Setelmen spot bai kamap gen long Goroka

SAPE METTA i raitim

SETELMEN spot bai stat gen long dispela wiken insait long ol setemen eria insait long Goroka, lsten Hailens provins.

Pri-sisen bai stat long dispela de na fainel bilong em bai kamap bihain long tupela wik. Setelmen spot ya i bin stat long las yia. As tingting bilong kamapim dispela tonamen em long bungim ol yangpela man na meri long pilai spot na lusim ol bikhet pasin.

Siaman bilong Ogenaising Komiti na yut lida bilong Genoka Setelmen Moses "Degisi" Peter i tokim Wantok Nius olsem setelmen spot i bin stat long las yia na i kamap gut tru. Dispela spot ya i pulim bikpela interes bilong moa long 1000 man na meri.

Planti bilong ol dispela yangpela em ol i no save wok. Ol i save slip kirap na raun nating long taun i go inap long apinun.

Siaman Peter i tok lukluk long dispela yia i gat planti ol yangpela lainman na meri long ol arapela setelmen olsem Piswara, Plis Bareks na Minogere bai i kam insait na joinim ol lain yangpela bilong Genoka setelmen we okompetisen bai kamap strong tru.

"Mi wantaim ol komiti bilong

mi i bin statim dispela setelmen spot las yia we mipela i oge-naisim na ranim ol pilai namel long ol yangpela lain bilong Genoka setelmen tasol. Taim miepal i ranim ol gem, mipela i lusave olsem namb bilong ol patisipen bai go antap.

"Mipela i save olsem ol arapela setelmen lain bai kam joinim mipela na stap insait long resis ya," Peter i tok.

Em i tok dispela em i soim gutpela sain long wanem ol yangpela i mas tok nogat long bikhet pasin, trabel na hevi na go stap insait long kain komyun-niti sevis olsem.

Mista Peter i tok olsem 12-pela klab we i bai kamapim 24 tim i redi tasol long go insait na pilai pri-sisen. Dispela namba bilong tim em 12-pela bilong man na 12-pela bilong meri.

Em i tok Goroka taun i no pairap na bungim trabel na hevi long wanem ol dispela yangpela i wok long bisi long pilai spot. Peters i askim ol bisnis haus na kampani insait long Goroka long traime sapotim dispela tonamen.

Peters i tok PNG Coffee Exports bai go het long givim wankain sapot. Na opis bilong Peti Lafanama long Goroka tu i tokaut olsem ol bai givim sampela helpim taim sisen bilong ol i stat.

Aitape i kisim skul bilong soka

AITAPE Urban Soka Asosiesen (AUSA) i bin holim wanpela soka referi na kosing kosa long las mun.

Provinsal Spots Kodineta bilong Morobe na wanpela olpela intanesenel pilaia John Peka i bin go pas long ranim dispela 5-pela de kos. Em i tok bihain long dispela kos, planti ol lain i sindaun long kos ya i lainim planti samting tru.

Dispela woksop ya i pulim ol referi na kosa i kam long Aitape Is Kos, Aitape Wes Kos na Lumi yet.

Peka i tok olsem dispela woksop i kisim luksave bilong Papua Niugini Futbol Asosiesen (PNGFA), na em i namba wan taim dispela kain referi na soka kosa woksop i kamap long Aitape.

"Mi laik bai level bilong ol referi na ol kosa bilong Aitape i go antap na wankain olsem ol narapela referi na kosa bilong dispela kantri na tu long wol," Peka i tokim Wantok Nius.

Peka i tok em i lukim bikpela interes long ol husait i kamap long dispela woksop na em i

amamas tru olsem ol i soim bikpela interes long mekim kamap gutpela dispela spot.

"Spot em i wanpela samting we ol pipel i save bung wantaim long pilai, na mi amamas long lukim interese bilong ol dispela man na mi bai amamas moa yet sapos ol i askim mi long kambek na givim seken hap bilong dispela woksop," Mista Peka i tok.

Presiden bilong AUSA Peter Texan i givim bikpela tenk ya i go long Aitape Distrik Menesa bilong Sosel Sevis Dennis Kalinau.




• Yangpela bilong Anda 12 bilong Goroka i amamsim 2001 Skul Soka Salens wantaim pasin tumbuna. Em i bilas na kamap long opening long las wik. Foto: SAPE METTA

WINIM K100 PAINIM BAL RESIS NAMBA 8

RUL BILONG PILAI:

1. Makim X long boks long potu yu ting bai i stap
2. Makim X long pen tasol
3. Katim potu long sisos na salim long: PAINIM BAL RESIS NAMBA 7, Wantok Niuspepa, P.O. Box 1982, Boroko, NCD.
4. Nambawan entri i makim stretpela hap bal i stap, em bai win.
5. Las de bilong kisim ol entri em Fraide 31 Ogas, 2001.
6. Long Wantok bilong Fonde Septemba 27th, bai gat nupela K100 prais mani resis. Bai gat resis bilong olgeta mun i go inap mun Desemba, 2001.
7. Disisen bilong komiti i makim wanpela wina em i fainel.
8. Wina bai kisim sek mani, na i no long kes.
9. Sapos nogat wina bai skruim win moni i go long narapela resis.
10. Yu ken salim moa long wanpela entri, tasol noken yusim potu kopi.
11. Ol wokman meri na pikinini bilong Wantok i no stap insait long dispela resis.



Raitim nem na adres bilong yu: Nem.....Address.....

.....Krismas.....

Yu ken salim moa long wanpela entri, tasol no ken yusim potu kopi.

Madang volibal holim fainels

MADANG Amata Volibal Asosiesen (MAVA) bai holim semi na gren fainel bilong em long dispela wiken.

Insait long gem bilong ol meri, Drifters na PNGCC bai brukim bun long painim husat tru bai sambai long gren fainel. Wanem tim i lus bai gat seken sans. Tasol ol i mas bungim ol asples meri long Yabob.

Kepten bilong Drifters Nancy na Kepten bilong PNGCC Anne Kadam i wok long soim strongpela

pilai na save lidim gut ol yangpela bilong ol long nok-aut long las wiken.

Tupela kepten bai pilai bikpela gem tru. Strong bilong dispela tupela tim i stap long han bilong dispela tupela kepten bilong Drifters na PNGCC.

Na volibal resis bilong ol meri, Yabong bai skelim strong bilong ol lain Mungkas. Yabong em ol strit mangi bilong Madang taun na Mungkas em ol lain Bougenvil bilong Madang yet.

Mungkas i soim pinis long nok-aut olsem em i minim bisnis na i no inap givim sans long narapela tim. Tasol ol mangi Yabong tu i no wari. Ol i no boi nating. Ol i redim pinis olgeta teknik bilong kilim indai lam bilong ol Mungkas.

Kepten bilong Yabong Steven Aitsi na Augustin bilong Mungkas i gat planti save long rot bilong winim gem. Olsem na i gat bilip olsem dispela gren fainel bai wanpela bikpela na strongpela tru long wiken.

Ol pipel long Paliamba amamasim Independens wantaim volibal

Paliama na sekim. Papua Niugini i stap long Paliama. Long wanem, long Paliama i gat man o meri bilong wanwan provins na rijen insait long Papua Niugini i stap. Tasol ol yangpela pikinini man i gat liklik wari tasol long wanem i nogat mak bilong Manus provins i stap long ples bilong ol. na i luk olsem ol i wok long ples nau long kisim wanpela moning glori plawa bilong Manus aitan na i planim long dispela naispela lukaut long arere bilong pleto we ples bilong ol i sindaun antap long en.

Paliama em i nem bilong wanpeal ples insait long Is Sepik provins. Ples ya i stap wan kilomita longwe long Passam Nesenel Haiskul. Sapos yu sanap long arere bilong dispela pleto we ples Paliama antap long en, bai yu lukluk i go aut na lukim Mt Turu long Yangoru na i go olgeta long hap bilong Drekkir. Yu ken lukluk i go aut tu long Kubex (Kubalia) na Sepik Plain.

ELVIS MATHEW i raitim

OL PIPEL insait long Wewak taun i bin bung long Prince Charles oval na amamasim 20 Independens anivesari. Planti pipel bilong long ol ples i go het long mekim ol samting we ol i save mekim long olgeta Sande. Long ol Independens De i nogat mining o i no spesel long ol.

Na ol lain Paliamba i amamasim dispela Independens De wantaim spot bilong volibal. Dispela resis ya i pulim 7-pela tim bilong man na 6-pela tim bilong ol meri.

Ol gem i stat long Fraide na pinis long Mande. Long Sande Septemba 16, ol i go bung wantaim na holim bikpela selebresen wantaim ol kainkain aktiviti long soim amamas bilong ol long mining bilong Independens.

Sapos yu laik lukim na save Papua Niugini i stap long we, go long

Soka strong yet long Oil Palm

HUSAT i tok Nu Briten Palm Oil Limited Soka Asosiesen (NBPOLSA) i dai. Nogat ya. Ol i stap isi tasol long mekim ol sapota i guria.

Long dispela wik, NBPOLSA bai holim wanpela bikipela soka resis bilong semi fainel na gren fainel.

Wina bilong ol men's fainel bai kamap neks wik bipo long bikipela PNGFA Men's soka sempionsips.

I bin gat semi fainel bilong ol meri namel long wik. Dispela gem i bin stap namel long Bebere na Smallholders. Na arapela gem ya i bin stap namel long Mosa Mills na Medics. Skoa bilong ol gem i no kamap taim Wantok Nius i go long printim.

Wina bilong Mosa Mills na Medics bai go wetim gren fainel. Tim i lus bai salensim wina bilong Bebere na Smallholders.

Presiden bilong NBPOLSA John Raka i tokim Wantok Nius olsem kompetisen bilong ol wokman long Nu Briten Oil Pam i strong tru. Planti ol gutpela kik resis i save kamap long Sarere na Sande.

Mesa semi fainel bai kamap long Sande. Olsem na Raka i askim olgeta klab opisel i stap long fainel long bihainim gutpela rot long pilai soka na bungim ol arapela man meri.

Em i askim ol yangpela long noken yusim dispela fainel long kamapim ol kain hevi bilong pait na kros.

Wes Nu Briten i win pinis long pulim nesenel soka klab sempionsip i kam long Kimbe. Na em i bikipela wok tru olsem na Raka i askim olgeta sapota long bihainim gutpela tingting na pilai gut long fainel.

Pise em nupela sekretari bilong PNGFA

PAPUA Niugini Futbol Asosiesen i makim pinis nupela jenerel sekretari bilong em. Nem bilong sekretari ya em Gabriel Pise.

Pise em i no nupela man long wok soka. Em i bin wanpela nesenel pilai na wanpela lapun papa bilong Yunivesiti soka tim.

Sapos yu laik skorim gol egensim Yunivesiti, yu mas rausim em pastaim na skoa, sapos nogat em bai hat ya.

Pise i kisim ples bilong Ivan Ngahan. Ngahan i stap long saspensen na bihain ol i pinisim em long wok olsem sekretari bihain long sampela sas bilong em i no bihainim gut tingting

na laik bilong PNG Futbol Asosiesen.

Gabriel Pise em wanpela strongpela man bilong soka. Em i save sapatim planti tim olsem Sunam, Stone Axe na tu Yunivesiti.

Pise i stap longpela taim long Pot Mosbi, na bihain em i kisim wok long Tabubil. Na em i strongim soka

bilong Star Mountain.

Pise i winim dispela wok kontrak olsem sekretari long tripela yia.

Insait long wanpela pas bilong PNGFA, presiden Madiu Andrew i askim Mista Pise sapos em i ken kisim wok o nogat. Tasol long dispela wik yet, Mista Pise i amamas na sainim

kontrak.

Ol arapela lain kisim wok em Haiveta Kivia olsem Media Opisa na Paul Pondo em Operesen Menesa.

Gabriel Pise i bin wok olsem ripota wantaim Wantok Niuspepa na Times of PNG bipo em i go kisim wok long Ok Tedi.

Gazelle i statim sisen bilong en

GAZELLE Sofbal Asosiesen bai statim sisen bilong em long dispela wiken. Olgeta gem bai kamap long ToMaringa Spots oval.

Samting olsem 52 tim long 12-pela klab bai resis long 5-pela divisen bilong man na meri.

Ol klab em Black Pythons One, Black Pythons Two, Rebels, Burmah Tigers, Burmah Raiders, Burmah Hawks, St Marys, Unicats, Gazelle Cubs, Central Gazelle, Turalom, Royals na Dragon.

Ol primia tim bilong las yia i kisim promosen. Na wanem tim i stap las i surk go bek long lowa divisen.

Insait long mens primia divisen, i

gat 8-pela tim, na long Fes divisen i gat 10-pela tim na long B gret i gat 14 tim.

Na long disien bilong ol meri, namba wan divisen i gat 7-pela tim na namba tu divisen i gat arapela 7-pela tim.

Kalenda bilong Gazelle Sofbal Asosiesen i stat long dispela wik Sarere na pinis long las wik bilong Februari. Na long nok-aut na gren fainel i mas kamap long pinis bilong mun Mas.

Teknikel opisel bilong Gazelle Cleopas Warapit i tok em i amamas long lukim ol pilai bilong arapela kompetisen long Kokopo na Rabaul i kam joinim ol klab long Gazelle Sofbal

Asosiesen.

Kompetisen nau bai strong tru bikos long ol kain pilai olsem Emil Lucas, Allan Vovono, Kevin Paskalis, Mark Taling, Kennedy Kirita, Sylvester Vott, Noah Kauks, Joe Kalimet, Eric Paul, Charlie Kokoba, Andrew Paul, Cornelius Kirita, Derick Diap husat i joinim ol tim long Gazelle asosiesen.

Warapit i tok ol i lusim tingting pinis long kalenda bilong PNG Sofbal Federesen na nau i tingting long bihainim lokel kalenda - Governors Cup. Dispela bai kamap gen long Kokopo.

Em i tok Governors Cup i strong long wanem, ol tim i save kamapim strongpela gem tru ya.



• Instrukta Ludwick Peka i givim setifiket i go long wanpela kosa husat i sindaun long kosa kos las wik we i bin kamap long Aitape.

Turubu i soim stail long Indipendens

TURUBU Is Kos Volibal Asosiesen insait long Is Sepik em wanpela nupela volibal asosiesen. Ol lain Turubu i amamasim Indipendens wiken bilong ol wantaim volibal kompetisen.

I gat 8-pela tim bilong man na 9-pela bilong ol meri i bin resis insait long dispela wan wik volibal resis.

Man i go pas long dispela tonamen Aron Saniwa i tok olsem dispela em i namba wan taim bilong ranim dispela kain resis na em i amamas long lukim planti kain save na stail bilong pilai volibal i stap namel long ol man bilong ples.

Em i amamas stret long lukim pilai i ran gut we i nogat pait na kros i bin kamap. Dispela wanpela kain sain o luksave nau olsem volibal em wanpela gutpela gem stret we yu i no inap painim kainkain hevi bilong bodi na paitim narapela manmeri taim yu pilai.

Willie Bagore, Siaman bilong Noten Zon Volibal Federesen i bin kamap olsem opisel ges bilong dispela tonamen long Turubu.

Mista Bagore i tokim Wantok olsem em i gat bikipela amamas stret long kam stap long ples na luksave long hevi bilong volibal na tu wankain kain rot federesen i ken helpim ol lain viles asosiesen.

Mista Saniwa wantaim ol opisel bilong Turubu Volibal i amamas tru long lukim wanpela bikman bilong Noten Zon Volibal Federesen i painim taim long stap insait long selebren bilong ol.

Mathew Raka wanpela biknem referi bilong nesenel level tu i bin kamap na helpim lukautim ol gem na gren fainel. Bagore na Raka i save stap long Madang na ranim Madang Volibal Asosiesen.

Nem bilong ol tim i stap long resis em (man) Yawara 1, Yawara 2, Sumata 1, Sumata 2, Turubu 1, Turubu 2, Sakuta 1 na Sakuta 2. Na tim bilong ol meri em Yawara 1 na Sumata 3.

Yawaw i bin strong tumas na bagarapim sindaun bilong ol meri Sumata 3-2 na winim gren fainel. Na long man, Sumanta Besta Tin Pis i bomim stret ol maning Turubu basis 3-2 na ol i winim gren fainel.

Noten Zon Volibal Federesen i bin helpim na givim tupela disaplin awat medal i go long tupela disaplin pilai long man na meri.

Dr Mosely bosim atletik union


PAPUA Niugini Atletik Union i makim biknem Dr Mosely Moromoro olsem nupela presiden bilong en.

Insait long Anuel Jenerel Miting (AGM) long Goroka las wiken, ol i makim Dr Mosely olsem nupela bos. Samu Sasamu i kamap namba tu presiden na Tony Green i kisim wok sekretari/tresera.

Mista Green i tokaut long miting olsem em i lusim wok long narapela i ken kisim long wokim wok pablik rilesen na tu painim sponsasip. Na em i ken i gat inap taim long wokim wok edministresen.

Green husat i holim wok praedren inap 4-pela yia pinis. Na em i tingting long strongim wok atletik insait long kantri.

Dr Mosely em i dairekta bilong Gas Commercialisation wantaim Chevron Niugini, na em i gat bikipela bisnis kontek wantaim ol arapela bisnis man na meri na tu long komyniti wok.



• Wokman bilong bilong PRL oval, Dongi, i pusim lawn mowa long katim gras na redim long bikipela de long Oktoba 7 taim PNG Kumuls bai pilai wantaim Australia Kangaroo.

Kiunga i holim gen prilimineri fainel

IAN KAKARERE i raitim

KIUNGA Ragbi Lig i givim oda long gem namel long Rusa Cowboys na Kiunga Waliya long kamap gen long dispela wiken.

Tupela tim ya i bin bung long prilimineri fainel we tupela tim wantaim i dro. Referi Billy Evoa i stapim gem bikos ples i tudak na i nogat inap lait long surikim gem i go fultaim.

Tupela tim wantaim Cowboys na Waliya i wanbel long dispela disisen. Presiden bilong Kiunga i tokaut olsem gem ya bai kamap long neks wik Mande.

Riserve gret pilai bilong Cowboys Mike Wariengra husat i, save pilai long A gret i helpim dispela tim long win ya. Cowboys i kamapim gutpela gem na luk tu gut long winim dispela gem.

Long wanwan taim

Jason Mamaea bilong Waliya i brukim difens bilong Cowboys na tromoi bal i go long Elias Kup husat i givim sapat na em i tromoi i go long kepten na winga Yaeti Sikili long skorim trai.

Tupela tim wantaim i amamas tumas long putim trai na dispela i bagarapim stret sans bilong ol.

Insait long namba wan hap, skoa bilong ol i sanap 4-4.

Samting olsem 10-pela minit i go

insait long namba tu hap, bikipela klaut na ren i pundaun na dispela i bringim tudak i kam hariap. Olsem na referi Billy Evoa i stapim gem. Waliya i winim riserve na Anda 17 gem.

Na prilimineri fainel bilong riserve gret tu i stap namel long dispela tupela tim. Waliya i strong tru na winim Cowboys 16-12.

Tupela tim wantaim i skroim tripela trai. Tasol fulbek bilong Waliya Kenneth Kaliya i

mekim bikipela senis long winim dispela gem.

Faiv-et Andy Andibu, prop Martin Tuta na seken rowa Robert Girinai i skorim ol trai bilong Waliya na Kaliya i kikim ol konvesen.

Na long sait bilong Cowboys, Mike Wariengra, huka Mark Mili na David Mara i skorim 4-pela poin wanwan.

Insait long Anda 19 divisen, Waliya i wilwilim Fly Storms 22-18.

WANTOK SPOTS

DISPELA WIK INSAIT LONG WANTOK NIUSPEPA



Lukim moa poto
bilong
Skul Soka salens

- pes 27



Aitape holim
soka referi
na kosa kos

- pes 30



Skul soka fomim
asosiesen


- pes 28



• Brad Fittler,
Kepten.



• Darren Lockyer.



Trent Barrett.



• Robbie Kearns.



• Nathan Blacklock.

PNG Kumuls bai putim gutpela gem

PNG Kumuls bilong 2001 i gat bikpela wok tru long traिम winim o daunim skoa Australia Kangaroo i givim ol.

Australia Kangaroo i bin wilwilim stret PNG Kumuls 82-0 long

Townsville bipo ol i go pilai long Wol Kap long 2000.

Kosa Bob Bennett i gat bikpela wok stret long rausim ol dispela taim nogut.

Insait long Kumul

kem long Pot Mosbi, kosa Bennett i toktok strong long strongim difens long stapim ol Kangaroos.

Mista Bennett bai yusim gem plen long traिम stapim ol lain

Australian Kangaroo long namel. Bikos ol Kangaroo i save olsem long beklain ol Kumul bai autim ol wantaim spit ya.

Mista Bennett nau i gat wari long fitness bilong fowat David Westley.

Westley i no bin kamap wantaim ol arapela PNG Kumul pilaia i stap long Australia long Tunde.

Na Westley i gat tripela de tasol long strongim fitness level bilong em long bungim

ol Australia Kangaroo.

Mista Bennett i tok Kangaroo i gat planti ol yangpela husat i gat spit na bai putim strongpela gem egensim Kumuls.

Kumul bai strong long ol ovasis pilaia long winim gem. Ol pilaia olsem Westley yet, Marcus Bai, Mark Mom, Tom O'Reilly, Duncan Nawii na John Wilshere long strongim Kumul.

Kangaroo i gat kepten Brad Filter wantaim Brett Tarrent long winim gem bilong ol.



• Winga bilong Kumuls Marcus Bai sindaun long trening na tingting long plen bilong autim tiket bilong Australia Kangaroo. Foto: IVAN BAYAGAU

Baim fi pastaim na kik long Nesenel klab sempionsip

HENRY MORABANG i raitim

PAPUA Niugini Futbol Asosiesen (PNGFA) i askim ol asosiesen long pinisim afiliesen fi bilong ol long ol sempion tim i ken stap insait long 2001 PNGFA mens klab sempionsip long Kimbe.

Insait long wanpela pas i go long memba asosiesen, PNGFA i askim olgeta senta long baim ful afiliesen fi.

Wanpela mausman bilong Ogenaising Komiti long Kimbe John Raka i tok olsem wanem ol asosiesen i no memba, ol maina primia tim na rana-ap tim bai i no inap stap long Nesenel klab sempionsip.

Raka i tokaut olsem nau yet 8-pela senta i kamap ful memba. Ol senta ya em Pot Mosbi, Lahi, LFA, Tabubil, Wabag, New Briten Palm Oil Limited, Kimbe na Madang.

Em i tok ol sempion tim long ol dispela senta tasol i ken soim pes long nesenel klab sempionsip.

Nau yet, ol ogenaising komiti i kisim pinis 19 tim olgeta. Ol tim ya em Sobou, Unitech, Bugandi (Lahi), Buresong, Blue Kumuls (LFA), Momase, Royals (Madang), Naruns, Zumins (Kaiapit), Dito (Tabubil), Hatololo/Dolphins (Buka), Kelperau/Seedler (Manus), Saigai (Higaturu), Rapatona/Leki (Kimbe) Mosa Oil Mill na Stores United (NBPOLSA) na University, PS United (PMSA).

Raka i tok namba bilong ol tim bai stap long sempionsip long dispela yia i antap tru. Na long histori bilong PNGFA (soka), em i bikpela namba stret.

PNGFA tu i singaut long wanwan ol tim long baim nominesen fi long stap insait long resis. Nau yet 4-pela tim tasol i baim ful nominesen.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.